

SAN LUCAS

Asajajë Caquë Toyaye

1 ¹⁻²Iti du'ru huëose'e ñasicohua'ipi de'o coca quëajëna, asajë jai pai toyahuë, mai quë'ro yo'ose'ere. ³Jaje pa'ina, yë'ëje asare paquë iti yo'ose'eje pa'ye du'ru huëose'ere papi toyayë, më'ëna, Teofilo, yë'ë cajei. ⁴Më'ëpi më'ëre ye'yase'ere tĩñarepa asa tĩ'aja'quë caquë.

Huiñaë Quëase'e Juan Coase'ere

⁵Herodes Judea pai ëjaë pa'i maca, te'i Maija'quë huë'e ñacaiquë Zacarías hue'equë paji'i, Abías tsëcapë aquëpi. ¹ paco Elisabet hue'ecopi, Maija'quë huë'e ñacaiquë Aarón tsëcapë aco paco'ë. ⁶Cayahua'i de'oye nuñerepa pa'icohua'i paë'ë, Maija'quë ña hue'ña pa'iohua'ipi i cuañese'e cui'ne i case'ere de'oye sehuocohua'i paë'ë. Jaje pa'icohua'ini yecohua'ije co'aye pa'iyë caye ti peocohua'irepa paë'ë. ⁷Jaje pa'iquëta'are mamajëre peocohua'i paë'ë. Elisabetpi mamajëre pama'co paco'ë, carao. Cui'ne jaje pa'iohua'ipi si'a Jupë aiohua'i maña paë'ë.

⁸Te'e mu'se Zacarías ja're Maija'quë huë'e ñacai'cohua'i pa'icohua'ipi yequë yo'o tējina jare jajese'e si'a iohua'i tsëcapë yo'oye paji'i, Maija'quë pa'i hue'ñana. ⁹Jaje pa'iohua'ija'a nepi ma'ñare ëojë yo'oye pa'iquë'ni cajë neñajëna, Zacaríasna tompëpi, iti yo'oye. Tomeina, Maija'quë huë'ena cacapi. ¹⁰Cacani huëo sēñere ëoquëna, hue'seja'a jai pai Maija'quëre sejë paë'ë. ¹¹Ja maca Ëjaë jo'yaëpi huiñaëpi Zacarías huëo sēñe ëo sai'huë ëja te'tena ñai nēcapi. ¹²Nëcaquëna, Zacaríaspi ñani me neja'quë a'ni caquë quëquë huesëquëna. ¹³Ëjaë jo'yaëpi capi, ite:

“Zacarías ca'rama'ë pa'ijë'ë. Maija'quëpi më'ë seña asapi. Jaje pa'ina, më'ë paco Elisabetpi tsihua'ëre pasio. Pacona, më'ëpi i mami hue'yojë'ë, Juanre. ¹⁴Më'ë ite sihuaja'quë a'ë, cui'ne yecohua'ije jai pai ite coasi maca sihuaja'cohua'i a'ë. ¹⁵Më'ë mamaquë cato de'oyerepa yo'oquë pa'ija'quë api, Maija'quë jo'yaëpi. Jaje pa'ipi ja yë'ta'a ite coama'në Maija'quë joyopi ñni pa'ija'quë api. Pa'ina, cuepe ëaye neñe coño ucuma'quë pasipi. ¹⁶Jaëpi jai pai Israel paire cui'naohua'ipi iohua'i mai Ëjaë Diosuna co'ye asa coñe necasipi. ¹⁷Maija'quë ñacaina, iquë Juan de'oye yo'oquë pa'ija'quë api, mai Ëjaë pai deojajë. Jaje pa'ipi, tsoe hue'ña Maija'quë jëjo daoquë

Elías yo'loquë pa'isi tuture hue'equë pasipi. Jaëpi pëca ja'quëohua'i ja're mamajë de'oye pa'ye necasipi. Jaje sehuoma'cohua'ire ponaja'quë api, Ejaëre de'oye asaja'cohua'ire, mai Ejaë pai deojajë.”

18 Zacaríaspi Maija'quë huiñaë seji'i, ñeje:

“¿Yë'ëje ai maca pa'ina, cui'ne yë'ë pacoje aio maca pa'ito me yë'ë nuñere pa'ë caquë asaye'ni?”

19 Caquëna, Maija'quë huiñaë ite sehuouña:

“Yë'ë Gabriel a'ë, Maija'quëre necai pa'iquë. Jaje pa'ina, yë'ëre ipi jëjo dauna, iye huajë coca quëasi'i, më'ëre caquë da'ë. 20 Jaje pa'iquëta'are yure më'ë yë'ë nuñerepa quëayera asama'ë pa'isi do'ire cama'quë de'oni cama'ë pa'ija'quë a'ë, më'ë mamaquëre coa macaja'a iye case'e ti'a ja'ñe a'ë, iti mu'se ti'aëna.”

21 Jaje yo'loquë Maija'quë huë'e ëo hue'ñana cacasiquëpi tsoe nëina, yecohua'i hue'se pa'icohua'i iquere yo'loquë Zacarías etama'quëpi nëi pa'ini cajë utehuë. 22 Utejëna, ja'ropi Zacarías etani jaohua'ire cama'ë paji'i. Jaje cama'ëna, ñani cani ñañeje pa'ye Maija'quëre se hue'ñana cacani ñapi, cuasahuë. Jaje pa'ipi coa jëtë a'uñese'epi capi, cama'quë ponëse'e sëte.

23 Zacarías Maija'quë huë'e co'ai mu'seña carajaisi maca, saji'i, i huë'ëna.

24 Ja jetyo'je i paco Elisabet tsj ëtapë de'o. De'oni cinco ñañëohua'ire io huë'epi yequë hue'ña saima'o ai cuasaco paco'ë, ñeje: 25 Ejaëpi yure yë'ëre jaje ñacai yo'opi, paipi tsj pama'coa cajë cue'cuema'pë pa'ijajë caquë.

Huiñaë Quëase'e Jesús Coase'e

26 Seis ñañëohua'i pa'i maca Maija'quëpi i huiñaë Gabrielre Galilea yejana Nazaret hue'e daripëna jëjo saopi. 27 Nomi tsjo María hue'ecopi ëmëohua'ire yo'oma'core do'i ñaja'quëni caquë. Ja'o cato José hue'equëna, huejaja'coa. Ca nëosicopi paco'ë, ëjaë David tsëcapë aquëna. 28 Maija'quë jëjo daoquëpi io pa'i hue'ñana cacani capi:

“Pëpayë, më'ëre. Sihuajë'ë. Mai Ejaëpi më'ë ja're pa'iji. Diusupi si'a nomiohua'i sihuaye jerepa isipi, më'ëre.”

29 Jaje caquëna, iopi Maija'quë jëjo daoquëre ñani quëquëo i cocare asaco cui'ne ja maca co'ye se'co'ë: “¿Me yo'loquë jaje pëpaquë'ni?” 30 Jaje cacona, Maija'quë huiñaëpi capi, iote:

“María ca'rama'o pa'ijë'ë, Maija'quë më'ëre sihuaquë api. 31 Yurepi pai quë'io de'oni më'ë tsihua'ëre pajal'coal'ë. Paco i mami hue'yojë'ë, Jesure. 32 Jaë cato jerepa pa'i pa'ija'quë api, jaje pa'ipi Maija'quërepa mamaquë paipi hue'yoquëni. Jaje pa'ina, Maija'quëpi pai ëjaë David ñu'i sailhuëre isija'quë api, pai ëjaëre de'huani. 33 Israel paire ti cuañequërepa pa'ija'quëpi, i cuañeñe cato carajaiñe peoja'coa.”

34 Ja maca Maríapi Maija'quë huiñaëre se'co'ë:

“¿Me iye jaje yo'o ja'ñe a'ni, yë'ë ëmëohua'i ja're coní pa'ima'core?”

35 Cacona, Maija'quë huiñaëpi sehuouña:

“Maija'quë joyopi më'ëna necaina, cui'ne Maija'quërepa tutupi më'ëna sirio tsiocaiyeje tsio daija'coa. Ja do'ire më'ë mamaquëre Maija'quë mamaquë

hue'yoja'cohua'i a'ë. ³⁶Jaje cui'ne mē'ë cajeo tsēcāpē aco Elisabetje tsihua'ëre paja'coa, aio macata'a. Tsi pama'coa paī cajē pa'isicota'a seis ñañēohua'ire paī quē'io pa'ico, yure. ³⁷Maija'quēre cato neñese'e pa'iji. Peoji, i ja'rujaiñe."

³⁸Ja maca Maríapi cao:

"Yē'ë cato Ējaē jo'yao maca'ë. Maija'quēpi mē'ë case'eje yo'oja'quē yē'ëre sihuayē."

Jaje Maija'quē huññāē iyese'e quēani saji'i.

Maríapi Do'i Saiye Elisabet Quē'rona

³⁹Ja mu'seña María esa sacco'ë, Judea cuti quē'rore paī daripē pa'i hue'ñana. ⁴⁰Sani Zacarías cui'ne Elisabet pa'i huē'ena cacani pēpao. ⁴¹Pēpacona, Elisabetpi io pēpaye asa maca tsihua'ë ėtapē pa'iquēpi tī'topi Maija'quē joyopi ioni pa'ina, paco'ë, Elisabetpi. ⁴²Jaje pa'ioipi tutu cao:

"Maija'quēpi mē'ëre yequē nomiohua'ire sihuaye necaiye jerepa de'oye necaji'i. Cui'ne mē'ë mamaquē ai de'oquērepa pa'ija'quē api. ⁴³¿Ique o'ni, yē'ë jaje yē'ë Ējaē pēca ja'copi do'i dani ña ja'ñe? ⁴⁴Mē'ë yē'ëre pēpacona, asa maca tsihua'ë yē'ë ėtapēpi sihuaquē teapi. ⁴⁵Ai sihuayē, mē'ë case'ere care paji caco asa do'ire."

⁴⁶Ja maca María cao:

Yē'ë ai sihuayē, Maija'quēre.

⁴⁷Cui'ne yē'ë joyopi sihuayē, Maija'quē yē'ëre huasoquēna.

⁴⁸Maija'quēpi i jo'yao ai cuasaye peocore de'oye cuasapi.

Yureta'a jaje yo'ouquēna, si'a paipi ai sihuaco si'anē caja'cohua'i a'ë.

⁴⁹Maija'quē ai jerepa tutu quē'ipi yē'ëna de'oye neca'ë'ë.

Yē'ë Ējaē i mami cato ai de'oyerepa.

⁵⁰Si'anē oiquē api, ĩte ca'racohua'ire.

⁵¹Tutu quē'i co'amaña yo'ouquē nepi, i jēñapi.

Jerepa pa'iohua'i a'ë cuasa joñoa hue'ecohua'ini meñe quēconi huahue huesopi.

⁵²Ñaj'ë, i yo'ose'ere: Ējaohua'i pa'isicohua'ini meñe peocohua'ire nequē Cui'ne ĩti jerepa pa'iohua'i a'ë cuasama'cohua'ini ñese mēose'ere.

⁵³Ao ěa ju'icohua'i pa'isicohua'ini de'oye ao timēpi.

Cui'ne jaiye co'amaña pasicohua'ini coa peo jēña ne saopi.

⁵⁴De'hue cōcaji'i, Israel paire.

I jo'yare huññeyema'ë oji'i.

⁵⁵Abrahamre ca nēose'ere de'oyerepa yo'opi, mai aiohua'ire.

Cui'ne jaje Abraham tsēcāpē Israel paire de'oye yo'oja'quē api, si'anē jajese'e.

⁵⁶Ca tējini pēpao, Elisabet huē'ena, toaso ñañēohua'ire. Pēasicopi pani tējini jeteyo'je io huē'ena co'io.

Juan Ti Doquē Cōase'e

⁵⁷Ja jeteyo'je Elisabet tsihua'ëre cōa mu'seña tija'ëna, mamaquēre pao.

⁵⁸Io cajeohua'i cui'ne do'icohua'i ja'ye pa'icohua'i sani pēpahuē, ĩote,

Maija'quë de'oye yo'ose'ere asani sihuajë. ⁵⁹Ocho mu'seña pa'i maca sahuë, cui'ri ca'nihuë tãañu'u cajë Israel pa'i deojajë cajë, cui'ne pëca ja'quë Zacarías mamire sëoñu'u cajë yo'ohuë. ⁶⁰Jaje cajëna, pëca ja'copi cao:

“Pani, i cato Juan hue'eye pa'iji.”

⁶¹Jaje cacona, iote cahuë:

“¿Me yo'oquë jaje hue'equë'ni, më'ë pairepa ja mamire hue'ecohua'i peoyë. Jaje pa'i mami hue'ecohua'i peoto?”

⁶²Ja maca tsihua'ë pëca ja'quëre moñopi ññojë sei'ë:

“¿Ique mamire hue'yoye yëquë'ni?” ⁶³Sejëna, pëca ja'quëpi soquë totore dajë'ë caquëna, isirena, iona toyapi: “I mami cato Juanpi.” Jaje toyaëna, si'a hua'i ai cuasajë ñahuë. ⁶⁴Ja macapi Zacaríasjë cui'naëpi coca caquë de'oni Maija'quëre sihuaquë ca huëopi. ⁶⁵Jaje iye yo'ose'ere ñani i quëno maca pa'icohua'i ai cuasahuë. Cui'ne iye yo'ose'ere si'a Judea ai cuti pa'icohua'ire quëajëna, asahuë. ⁶⁶Si'ahua'i iti quëaye asacohua'i itire cuasahuëni asa'ñe nëina, sëniroja'ë'ë:

“¿Me yo'oquërepa ai de'oja'quë a'ni, jaë tsihua'ë?”

Maipi ñahuë, Maija'quëre papi ite ñacaise'e.

Zacarías Jujuse'e

⁶⁷Zacarías Maija'quë joyo timësiquëpi Maija'quë isi yë'opi capi:

⁶⁸Sihuañu'u, mai Èjaëre Israel pa'i Diusure.

Jaë cato maina dani huasopi.

⁶⁹Maina Maija'quëpi isipi tutu quë'ire, paire huasoquëre.

Jaë cato i jo'yaë David tsëcapë aquëpi.

⁷⁰Maija'quëpi ñeje ca nëoa'ji'i, i case'ere quëacacohua'i tsoe hue'ña acohua'i ja're:

⁷¹Maire huasosi'i, si'aohua'i maire coejë sañope yo'ojëna, pa'icohua'ire.

⁷²Mai aipëre teaye ñaquë

I ca nëose'e huãñëma'ë de'oye necaji'i.

⁷³⁻⁷⁵Yë'ëna isisicohua'ipi nuñe pa'icohua'ipi ca'rama'pë

Yë'ëre necaicohua'i ti pa'ija'cohua'i a'ë caquë

Mësarute sañope yo'oyere huasosi'i ca nëopi, mai ai ñecuë Abrahamre.

⁷⁶Maija'quërepa quëacaiquë hue'yoja'cohua'i a'ë, paipi,

Më'ëpi mai Èjaë saija'a ma'are nui ma'arepa sani ne de'huaja'quëni.

⁷⁷I paire de'hue iohua'i co'aye yo'o do'ire sai de'huacaiye pa'iji, quëaja'quë a'ë, më'ëpi.

Ja do'ipi huasosicohua'i pa'ija'cohua'i a'ë.

⁷⁸Maija'quë oi cui'ne teaye ña do'ipi,

Èsë ñata maca mëi miañeje pa'ye maire huasoquë ma'tëmopi

daija'quë api, maire miaja'quë.

⁷⁹Huesëcohua'ire juni tējicohua'ire miacai

Cui'ne de'oye i maire huasoye asajajë caquë pa'yere ye'yaja'quë api.

⁸⁰Juan ai de'opi. Cui'ne i joyoje ai de'opi. Ai de'oquëpi pai peo hueña cuene yejare paji'i, Israel paire quëa huëo macaja'a.

Jesús Coase'e

(Mt. 1.18-25)

2 ¹Ja mu'seña pai ëjaë César Augustopi si'a yeja pa'icohua'ire cuëcueye pa'iji caquë cuañepi. ²Iye du'ru macarepa paire cuëcueye cato yo'ohuë, Cirenio Siria cuañequë pa'i maca. ³Jaje pa'ina, si'ahua'i saiye paji'i, pai ñape iohua'i daripëre pana jaron a cuëcue cuañoja'cohua'ipi.

⁴José cato David tsëcapë aquë paji'i. Ja do'ire Galilea yeja daripë Nazaretpi sani Judea yeja daripë Belénna saji'i, Davidre coa sitona. ⁵Toya cuañoja'quëpi Belénna saji'i, María i huejaja'coa ca nëosicopi coañe ti'a huesésico ja're. ⁶Jaje sani Belénre pa'ijëna, María coañe ti'aëna, ⁷jaron a pao, io du'ru mamaquëre. Pani caña çatipëpi tunani huequë ai de'huana oao, pai pëa hueña peo do'ire.

Huiñaëpi Yëi Ñamare Ñacohua'ire Quëaye

⁸Belén quëno macare yëi ñamare ñacohua'ipi ñamique tsiore iohua'ini ñajë paë'ë. ⁹Pa'ijëna, cuasama'tore papi Èjaë huiñaë ñai nëcaquëna, Maija'quë miañepi iohua'ire mia huesoquëna, ai quëquë huesëhuë. ¹⁰Jaje ña quëquëjëna, Maija'quë huiñaëpi capi:

“Ca'rama'pë pa'ijë'ë, mësarute huajë coca quëasi'quë daiyë, mësar u si'ahua'i asani ai sihua ja'ñere. ¹¹Yure David daripëna tsitu'ure coao, mësarute huasoja'quëpi. Jaë cato Cristo Èjaëre papi. ¹²Mësar u ñani i api cuasa ja'ñere caña çatipëpi tunani huequë ai de'huana oasiquëpi uina ti'aja'cohua'i a'ë.”

¹³Te'i Maija'quë jo'yaë huiñaë ñai macapi yecohua'i ma'tëmo acohua'ije ñaihuë. Ñeje cajë Maija'quëre sihuajë:

¹⁴Sihuajë de'oyerepa cañu'u, Maija'quëre ma'tëmo aquëre,
De'oye pa'yere pa'ijë'ë, ipi sihuaquëna pa'icohua'ipi.

¹⁵Maija'quë jëjo daosicohua'i ma'tëmona co'isi maca yëi ñamare ñacohua'ipi iohua'ija'a sa'ñe ca huëohuë.

“Jaje pa'lito esa Belénna sani ñañu'u, ëjaë maire quëase'ere.”

¹⁶Sani ti'ahuë, Maríare, Josére cui'ne tsihua'ëpi huequë aocona oasiquëpi uina. ¹⁷Jaje ite ñani Maija'quë jo'yaë iohua'ire quëase'ere quëareña. ¹⁸Quëajëna, asacohua'ipi ai cuasareña. ¹⁹Jaje yecohua'i yo'ojëta'are María cato io joyona de'hua'o, si'aye iye, ti yo'ose'ere cuasaco. ²⁰Yëi ñamare ñacohua'i si'aye iohua'ire case'ejë paye pa'ina, ñani Maija'quëna sihuajë jëjëjë co'ihuë.

Maija'quëna Jesure Isiye

²¹Ocho mu'seña pa'i maca tsihua'ë ca'ni maña tējajë cui'ne i mamije hue'yohuë, Jesús, huiñaë Maríare ja peoco pa'i maca quëase'ere.

²²Ts̄itu'ure pasi jeteyo'je si'sire tsoa to mu'seña t̄i'aëna, Jerusalén daripëna saijë ts̄itu'ureje sahuë, Maija'quëna is̄iñu'u cajë, Moisés cuañese'epi jaje caye sète. ²³Jaje yo'ohuë, ëjaë cuañese'epi ñeje toyase'le pa'i do'ire: "Si'a ëmë ts̄i du'ru çacohua'i Maija'quëna is̄isicohua'i pa'ija'cohua'i a'ë." ²⁴Ëjaë cuañëñepi caji: "Caya pi'are panita'a caya su'tere is̄ijë'ë." Ja yo'oyere cajë saë'ë.

²⁵Ja mu'seña Jerusalén pa'iquëpi Simeón hue'equëpi paji'i. Nuiñerepa pa'iquëpi Maija'quëre sei pa'iquëpi, Israel paire huasoyere utequë paji'i. Jaje pa'ina, Maija'quë joyopi Simeón ja're pa'i ²⁶quëapi, më'ë ju'inë paja'quë a'ë, ëjaë jëjo daoquë Cristore ñama'ë pani. ²⁷Maija'quë joyopi quëaquëna, Maija'quëre s̄e hu'ëna sani pa'ina, Jesús pëca ja'quëohua'i tsihua'ëre cuañese'le cayeje neñu'u cajë Maija'quëre s̄e hu'ëna dahuë. ²⁸Dajëna, Simeónpi tsihua'ëre çani Maija'quëna sihuaquë capi:

²⁹Ëjaë, yë'ë yureta'a sihuaquë ju'inë pa'iji.

Më'ë ca nëose'ere ñasiquëpi.

³⁰Yë'ë ñaco capi huasoquëre ñahuë,

³¹Si'a pai ña hue'ñana më'ë necaisiquëre.

³²Jaë api, Israel peocohua'ire miacaija'quë

Cui'ne i do'ire yecohua'ipi Israel pai ai de'ocohua'i a'ë, caja'cohua'i a'ë.

³³Simeón tsihua'ëre ñaquë cayere ai cuasareña, pëca ja'quëohua'i. ³⁴Ja maca Simeón Maija'quëpi de'oye ñacaija'quë icohua'ire caquë Maija'quëre seji'i. Seni tējini Maríare capi, Jesús pëca ja'core:

"Asajë'ë. Iquë tsihua'ë jai paire Israel paire ne tañojaquë api. Cui'ne jai paire Israel paire Maija'quëre tuiye huëoquë yo'oja'quë api. Jaje pa'ina, jai pai ite sañope caja'cohua'i a'ë. ³⁵Cui'ne, iquë do'ire jai pai pai ñape iohua'i joñoa cuasaye ñaño pa'ija'coa. Jaje pa'iquëta'are më'ëreta'a si'aye iye yo'oyete cuasani hua'tipi më joyoja'a tota etojaiñeje pa'ye pa'ija'coa, oi do'ire."

³⁶Cui'ne jarote te'o nomio yequë mu'se pa'i ja'ñere asaco quëaco. Ana hue'eco, Fanuel mamaco paco'ë. Aser tsëcapë aco, aio maca paco'ë. Nomi ts̄opi huejani siete ometëca ëjere pani hua'jesicopi paco'ë. ³⁷Yure cato hua'jeopi ochenta y cuatro ometëca paco'ë. Maija'quëre s̄e huë'epi etama'copi ñamiña cui'ne mu'seña Maija'quëre sihuaco ao aima'o seo paco'ë. ³⁸Ja'o Anapi iti jaje yo'ojë ca maca dani Maija'quëre du'ru se de'oji caco pëpa t̄oni Jerusalén paire huaso ja'ñere utecohua'ini quëao, tsihua'ë Jesús yo'o ja'ñe ayere.

Nazaretna Co'iyë

³⁹Ja maca si'aye ëjaë cuañese'le yo'o tējini co'ihuë, Galileana iohua'i pa'i daripë Nazaretna. ⁴⁰Tsihua'ë i ai de'oyeje ai tutu quë'i cui'ne ai ta'ñe pa'i de'opi, Maija'quëpi ite de'oyerepa ñacaina.

Jesús Maija'quë Huë'ere Pa'iyë

41 I pëca ja'quëohua'i coa si'a ometëcaña Jerusalénna saë'ë, Israel pai Egíptopi etasi mu'sere cuasajë tsi'siyena. 42 Jesús doce ometëca tì'ani pa'i maca si'ahua'i Jerusalénna ja fiesta yo'oyena tsi'siñu'u cajë saë'ë, noni jaje yo'ojë pa'icohua'i sëte. 43 Ja fiesta carajaquëna, co'i maca tsihua'ë Jesús Jerusalénna pëapi, pëca ja'co cui'ne José huesëjëna. 44 Te'e mu'serepa ma'aja'a Jesujë daiji jai pai conì cuasajë saë'ë. Saijëta'a do'ijë quë'ro cui'ne ìohua'i ñacohua'i quë'ro co'ejëna, peopi. 45 Peoquëna, ñani ja maca yureta'a co'ihuë, Jerusalénna co'eñu'u cajë.

46 Toaso mu'seña pa'i maca tì'ahuë, Maija'quë huë'ere pa'ina, cuñese'e ye'yacohua'i ja're conì ja'rusiquëpi ñu'i ìohua'i cayere asaquë cui'ne ìohua'irejë sañope sëi yo'oquëna. 47 Si'a pa'icohua'i Jesús si'aye ta'ñë asaquëpi sañope de'oyerepa sehuoyere asajë quëquëhuë. Merepa ai asaquë'ni, jaë cajë ai cuasareña. 48 Pëca ja'quëohua'ipi ìte tì'ajë ai cuasajëna, pëca ja'copi cao:

“Tsihua'ë, më'ëni më ja'quë cui'ne yë'ë co'a ju'ijë co'erojainë. ¿Më nesi'quë jaje yëquëre, huesë ëaye yo'ou'ni?”

49 Jaje cacona, Jesupi ìote capi:

“¿Me yo'ojë yë'ëre co'eye'ni? Huesëma'pë yë'ë cato ja'quë co'amañare yo'ojä'quë a'ë.”

50 Jaje caquëna, ìohua'ipi cuasaquë cayere asa tì'ama'pë paë'ë.

51 Ja maca ìohua'i ja're conì co'ipi, Nazaretna. Si'anë de'oye sehuaquë paji'i, pëca ja'quëohua'ire. Pëca ja'copi iyere si'aye ìo joyona de'huaio.

52 Jaje yo'oquë Jesús ai de'opi, ì capë cui'ne ì cuasayeje. Maija'quëpi cui'ne paipi conì ì de'oye pa'iyere ñajë de'oquë api cuasahuë, tayoye peoquëna.

Juan Ti Doquëpi Yëhuoye

(Mt. 3.1-12; Mr. 1.1-8; Jn. 1.19-28)

3 1 Tiberio César pai ëjaë paji'i. Ipi quince ometëca cuañequë pa'i maca Poncio Pilatopi paji'i, Judea cuañequë ëjaë. Herodespi Galilea cuañequë paji'i. I yo'jei Felipepi Iturea cui'ne Tranconite cuañequë paji'i. Cui'ne Lisanaspi Abilinia cuañequë paji'i. 2 Maija'quë huë'e ñacaicohua'i ëjaohua'i cato Anás cui'ne Caifás paë'ë. Jaohua'i pa'i mu'seña Maija'quëpi Zacarías mamaquë Juanna capi, cuëne yejare pa'ina. 3 Juan cato Jordán tsiaya quë'roja'a sai si'a hue'ña pai pa'icohua'ire capi: Ja'ñë co'aye cuasase'ere jëoni ponëne pa'iji. Ponëni oco dosicohua'ini Maija'quëpi mësarü co'aye yo'ose'ere saï de'huaja'quë api. Jaje yëhuopi. 4 Tsoe ja'rë Maija'quë caye quëacaiquë Isaíaspi toyaquë pa'ise'eje cui'ne japi tì'api, ì toyase'e caji:

Cuëne yejapi pai cui'neje asa cuãñoji,
Ne de'huajë'ë, mai Ejaë ma'are.

Nuñerepa ma'a necaijè'è, i cu'i hue'ña.

⁵ Yo'cohuè pa'ise'ere ne timè ja'ñe a'è.

Jai cuti cui'ne a'ri cuti pa'ise'ere nui yejarepa ne ja'ñe a'è.

Nui ma'aña peose'ere nui ma'aña de'huaye a'è.

Dea pëa què'i ma'aña pa'ise'ere nui yeja ne ja'ñe a'è.

⁶ Ja maca Maija'què paire huasoye si'a pai ñaja'cohua'i a'è.

⁷ Ite oco do cuañoñu'u cajè paipi i què'rona daicohua'ire Juanpi capi:

“iAña tsècapè acohua'i! ¿Nepi mësarute quèare'ni, Maija'què pëi nejoquëna, jëa ja'ñere? ⁸ Pönèsicohua'i pani, pönèsicohua'i yo'oyere yo'ojè'è. Jaje yo'ojëna, ñani dosi'i. Abraham tsècapè a'è cama'pè pa'ijè'è. Ja caye ti'a ma'ñe a'è. Maija'quëpi yëni iye quëna pëaje Abraham tsècapëre neñe pa'iji. ⁹ Tsu'upo tsoe ne de'huasicoa, soquè ñëa cueja'core. Si'a soquè ñëa de'oye quëi ma'ñe cato cüeni toana ëocoa. Maija'què tsu'upoje pa'i.”

¹⁰ Ja maca paipi ite seteña:

“¿Jaje pa'ito iquere neja'cohua'i a'ni?”

¹¹ Sejëna, Juanpi sehuopi:

“Caya ju'i caña paquè pani te'ore isiye pa'iji, ti peoquëna. Aiñe paquè pani peoquè ja're conì aiñe pa'iji, te'e.”

¹² Pa'i do'i curiquè secohua'ijje oco do cuañoñu'u cajè daisicohua'ipi pa'ijè Juanre sei'è:

“¿Ye'yaquè, iquere yèquè neja'cohua'i a'ni?”

¹³ Sejëna, Juanpi capi:

“Cuañese'le caye pa'ina, jerepa curiquè sema'pè pa'ijè'è.”

¹⁴ Soldado pa'icohua'ipi ite seteña:

“Cui'ne yèquè, ¿iquere neja'cohua'i a'ni?”

Cajëna, sehuopi:

“Tutu yo'ojè sioma'pè pa'ijè'è, yecohua'i payere. Coa coso do'ire tsioma'pè. Cui'ne mësarute saiñere ti'api cuasajè pa'ijè'è, sihuani.”

¹⁵ Juanni Cristo pa'ima'què cuasajè pai utehuè. I a'è caquëna, asañu'u cajè. ¹⁶ Cuasajëna, Juanpi capi:

“Ocopi doyè, mësarute. Ja yè'ta'a yè'è jeteyo'je daija'què api, yè'è jerepa de'oquëpi. I jo'yaè i zapato joyecaiquè yè'ère tëtto saiquè api. Yè'è jerepa teaye pa'i a'è. Jaè cato doja'què api, Maija'què joyopi cui'ne toapi.

¹⁷ Tsoe pala cajiji, trigo jëoquè iti case'le de'huaquè ja'ose'le huahueja'core. Iti care pase'le i de'hua hue'ñana de'huaquè ja'ose'le toa ti yayama'cona ëoja'què api.”

¹⁸ Neje caquè paire de'o coca yèhuoquè cui'ne jaiye yequeje Juan quëapi. ¹⁹ Cui'ne Herodes pai ëjaëpi yo'jei Felipe nëjo Herodíasni jioni paquëña. Jaje yo'o ma'ñe a'è caquè cui'ne i yeque co'aye yo'ose'ena conì yèhuopi, Juan. ²⁰ Jaje quëaquëta'are Herodespi i caye asama'è. Ja yè'ta'api yeque co'aye yo'o coquè Juanre co'a paire co hue'ñana copi.

Jesure Doye*(Mt. 3.13-17; Mr. 1.9-11)*

²¹Ja yè'ta'a co cuañoma'quëpi Juan oco doquë pa'ina, Jesuje do cuañosiquë paji'i, cui'ne ipi Maija'quëre se maca ma'tëmopi jaca saiona. ²²Maija'quë joyopi su'teje pa'ipi ina nëca meni pajije ñajëna, ja maca yè'ose'e ma'tëmopi jutapi, ñeje:

“Mè'è a'è, yè'è mamaquërepa. Mè'ëni ai sihuaquë pa'iyë.”

Jesús Ñecuëohua'i*(Mt. 1.1-17)*

²³Jesús treinta ometëca paquëpi Maija'quë co'amañarepa ne huëopi. Paj caye cato José mamaquë paji'i. ²⁴José paji'i, Elí mamaquë. Elí paji'i, Matat mamaquë. Matat paji'i, Leví mamaquë. Leví paji'i, Melqui mamaquë. Melqui paji'i, Jana mamaquë. Jana paji'i, José mamaquë. ²⁵José paji'i, Matatías mamaquë. Matatías paji'i, Amós mamaquë. Amós paji'i, Nahúm mamaquë. Nahúm paji'i, Esli mamaquë. Esli paji'i, Nagai mamaquë. ²⁶Nagai paji'i, Maat mamaquë. Maat paji'i, Matatías mamaquë. Matatías paji'i, Semei mamaquë. Semei paji'i, José mamaquë. José paji'i, Judá mamaquë. ²⁷Judá paji'i, Joana mamaquë. Joana paji'i, Resa mamaquë. Resa paji'i, Zorababel mamaquë. Zorobabel paji'i, Salatiel mamaquë. Salatiel paji'i, Neri mamaquë. ²⁸Neri paji'i, Malqui mamaquë. Melqui paji'i, Adi mamaquë. Adi paji'i, Cosam mamaquë. Cosam paji'i, Elmodam mamaquë. Elmodam paji'i, Er mamaquë. ²⁹Er paji'i, Josué mamaquë. Josué paji'i, Elizer mamaquë. Elizer paji'i, Jorim mamaquë. Jorim paji'i, Matat mamaquë. ³⁰Matat paji'i, Leví mamaquë. Leví paji'i, Simeón mamaquë. Simeón paji'i, Judá mamaquë. Judá paji'i, José mamaquë. José paji'i, Jonán mamaquë. Jonán paji'i, Eliaquim mamaquë. ³¹Eliaquim paji'i, Melea mamaquë. Melea paji'i, Mainán mamaquë. Mainán paji'i, Matata mamaquë. Matata paji'i, Natán mamaquë. ³²Natán paji'i, David mamaquë. David paji'i, Isaí mamaquë. Isaí paji'i, Obed mamaquë. Obed paji'i, Booz mamaquë. Booz paji'i, Salmón mamaquë. Salmón paji'i, Naasón mamaquë. ³³Naasón paji'i, Aminabab mamaquë. Aminabab paji'i, Aram mamaquë. Aram paji'i, Esrom mamaquë. Esrom paji'i, Fares mamaquë. Fares paji'i, Judá mamaquë. ³⁴Judá paji'i, Jacob mamaquë. Jacob paji'i, Isaac mamaquë. Isaac paji'i, Abraham mamaquë. Abraham paji'i, Taré mamaquë. Taré paji'i, Nacor mamaquë. ³⁵Nacor paji'i, Serug mamaquë. Serug paji'i, Ragau mamaquë. Ragau paji'i, Peleg mamaquë. Peleg paji'i, Heber mamaquë. Heber paji'i, Sala mamaquë. ³⁶Sala paji'i, Cainán mamaquë. Cainán paji'i, Arfaxad mamaquë. Arfaxad paji'i, Sem mamaquë. Sem paji'i, Noé mamaquë. Noé paji'i, Lamec mamaquë. ³⁷Lamec paji'i, Musalén mamaquë. Musalén paji'i, Enoc mamaquë. Enoc paji'i, Jared mamaquë. Jared paji'i, Mahalaleel mamaquë. Mahalaleel paji'i, Cainán mamaquë.

³⁸Cainán paji'i, Enós mamaquë. Enós paji'i, Set mamaquë. Set paji'i, Adán mamaquë, cui'ne Adán paji'i, Diosu mamaquë.

Jesure Neñañe

(Mt. 4.1-11; Mr. 1.12-13)

4 ¹Maija'quë joyo ìni pa'ina, Jordán tsiayapi co'liquëna, Maija'quë joyopi sapi, cuëne huesësi yejana. ²Jarote cuarenta mu'seña ao ti aima'ë pa'ina, jeteyo'je ao ëaye nëi maca ³huatipi ìte neñasi'i, caquë capi: “Maija'quë mamaquë sète iye quëna përe cuañejë'ë, pan pë de'ojaco.”

⁴Caquëna, Jesupi ìte capi:

“Toyase'e caji, Coa aose'e ai pa'iye peoji, pai. Peoquëna, ai jerepa si'aye Maija'quë ca cocare de'oye sehuocaiye pa'iye pa'iji.”

⁵Ja jeteyo'je huatipi sapi, ai cutihuëna. Sani iye yeja pa'yere te'epi esa ìñopi si'aye, paire cui'ne ìote pa'iyeje. ⁶Ìñoni huatipi ìte capi:

“Yë'ëpi më'ëre si'a iye tutu, cui'ne iye jai yejaña de'o co'amaña isisi'i. Yë'ëna isise'e a'ë, si'aye iye. Jaje pa'ina, yë'ë yëyeje isiye pa'iji, yë'ë isiye yëquëna. ⁷Më'ëpi do're ja'runi yë'ëni sequë pa'ito më'ë tse pasipi.”

⁸Jesupi ìte sehuopi:

“Yë'ë quëno maca pa'ima'ë pa'ijë'ë, Satanás. Saijë'ë. Toyase'e caji: Sejë'ë, më Èjaë Diosuni cui'ne ise'ere necaijë'ë.”

⁹Ja jeteyo'je huatipi Jerusalén daripëna sani Maija'quë hu'ë jetena mëani capi:

“Maija'quë mamaquërepa pani tito sa tomejë'ë, iye macapi yejana.

¹⁰Toyase'e caji:

Maija'quëpi ì huiñaohua'ire cuañeina, më'ëre ñacaija'cohua'ire.

¹¹Më'ëpi tomequëna, ìohua'i jëñapi tseaja'cohua'i a'ë,

Quëna pëana më nëcañoa a'si nema'quëni cajë.”

¹²Caquëna, Jesupi ìte sehuopi:

“Yequeje toyase'e caji: Më'ë Èjaë Diosure neñama'ë pa'ijë'ë.”

¹³Caquëna, huati Jesure si'aye neñani yo'o jujani, tsoe maca jëoni saji'i.

Jesupi Galileana Yo'o Huëoye

(Mt. 4.12-17; Mr. 1.14-15)

¹⁴Jeo saquëna, Jesupi Galileana co'ipi, Maija'quë joyo tutu timësiquëpi. Jaje pa'ina, pai ì pa'yere quëajëna, ja yejaña pa'icohua'i asahuë. ¹⁵Pai dari ñape tsi'si huë'ña pa'yena ye'yaquë pa'ina, si'ahua'i ìte de'oquëre papi cajë sihuahuë.

Jesús Nazaretre Pa'iye

(Mt. 13.53-58; Mr. 6.1-6)

¹⁶Ja maca Jesús Nazaretne saji'i, ì ai de'osi daripëna. Huajë mu'se tija'ëna, pai tsi'si huë'ena cacani ja'rupi. Jaje ì si'anë yo'oye sète. Ja'rusipi

Maija'quë coca pëpë ñasi'i caquë huëni nëcapi. ¹⁷Nëcaquëna, Isafas Maija'quëre quëacaiquë toyaquë pa'ise'ere isiëña. Iti maca aquëpi isiquëna, hui'yoquë ti'api, ñeje toyase'e pa'i hue'ñare:

¹⁸ Mai Ejaë joyopi yë'ëni pa'iji.

Jaje pa'ina, yë'ëna de'o cocare isipi, carajaicohua'ina quëa ja'ñere.

Cui'ne ai oicohua'ire yëhuo huasoja'quë a'ë.

Tsea cuañosicohua'i pa'icohua'ire quëa huasoja'quë a'ë.

Cui'ne ñama'cohua'ini ñacohua'ire neja'quë a'ë.

Co'aye yo'ojëna, ai yo'ojë pa'icohua'ini de'o pa'iyë isija'quë a'ë.

¹⁹ Mai Ejaë oi necai tëcahuëre paipi asaja'cohua'i a'ë caquë yë'ëre jëjo daopi.

²⁰ Jaje Jesús ña tējini tēoni pa'i tsi'si huë'e coçaiquëna, isini ja'rupi. Ja maca si'ahua'i ai ñahuë, ise'ere, pa'i tsi'si huë'ere tsi'sicohua'i. ²¹ Ñajëna, iohua'ire je'nërepa ca huëopi:

“Yure iye mu'se ti'api, iye toyase'e cayë mësaru asa maca.”

²² Si'ahua'i Jesús de'oquë api cajë i case'ere merepa de'oye caëna, cajë ai cuasajë sa'ñe cahuë:

“¿Iquë coa José mamaquë api, pa'ima'quë?”

²³ Jesupi capi, jaohua'ire:

“Jujuquë sëte co'ye jujujë'ë, caja'cohua'i a'ë. Casicohua'ipi yequeje caja'cohua'i a'ë. Capernaum yejana yo'ose'eje yure iño më'ë yejare pana yo'ojë'ë, yëquë asase'eje.”

²⁴ Ja maca ai seña maca ca saquë cui'ne capi:

“Nuñerepa cayë. I ai de'o sito pa'icohua'i cayë Maija'quëre quëacaiquëre tel'je de'oyerepa sihua cuañosiquë peopi. ²⁵ Maija'quëre quëacaiquë Elías pa'i mu'señare Israel pa'i hua'jeohua'i jai pa'i paë'ë. Ja mu'seña tres ometëca jerepa ocoma'ëna, si'a yeja pa'icohua'i ao ëa ju'ijë ai yo'ohuë. ²⁶ Jaje ai yo'ojëta'are Maija'quëpi Elíasre Israel pa'i hua'jeohua'ire jëjo saoye paipi. Paquë Sareptare hua'jeo pa'ico quërona jëjo saopi, Sidón yejana. ²⁷ Cui'ne Maija'quëre quëacaiquë Eliseo pa'i mu'señaje jai pa'i Israel pa'i ja'ju dahuë ju'icohua'i paë'ë. Pa'ijëta'are tel'ireje jujucaiyë paipi. Paquë Siria yeja aquë Naamáni jujucaji'i.”

²⁸ Jaje caquëna, asani tsi'sisicohua'ipi ai pëti huëohuë. ²⁹ Ja maca huëni nëcapi Jesure tseani pa'i daripë peo hue'ña hue'sena etoni sahuë, cuti sa'nihuëre pana. Jaropi jëjo toñu'u cajë. Iti cutihuëre pa'i pa'i daripë paji'i. ³⁰ Jaje jëjo toñu'u cajë sasicohua'ita'are Jesús iohua'i jopoja'a etani saji'i.

Co'a Huati Joyo Hue'equë

(Mr. 1.21-28)

³¹ Ja maca Jesús saji'i, Capernaumna Galilea yeja daripëna. Jarona sani huajë mu'seña paire ye'ya huëopi. ³² Iohua'ire ye'yayere asajë ai ñahuë. ¿Merepa jaje cuañequë quëayeje pa'yerepa quëaquë'ni? cuasajë.

³³ Jaro tsi'si hue'ñare paji'i, tel'i ëmë huati joyo hue'equë. Jaëpi cuipi.

34 “Yëquère yo'oma'ë. ¿Me nesi'quë yëquère yo'oquë'ni, Jesús Nazaret aquë? ¿Nejosi'quë daiquë? Më'ère yë'ë ñañë. Më'ë cato Maija'quë mamaquë, de'oquëre pa'ë.”

35 Jā maca Jesús co'a joyore capi:

“Cama'ë. Jāëte jēoni saijë'ë.”

Jāje ca maca co'a joyopi pai ña hue'ñana co'aye neñe peoyerepa yejana ne taoni eta saji'i. 36 Si'aohua'i ña quëquëni sa'ñe iohua'ija'a cahuë:

“¿Ique yë'o a'ni, jā jerepa pa'ye iye? Cuañequëna, huatiohua'ije ite sehujë etayë.”

37 Jāje yo'oquëna, paipi Jesús yo'oye ayere jā yeja si'a hue'ña quëarojateña.

Jesupi Simón Pedro Huaore Jujuye

(Mt. 8.14-15; Mr. 1.29-31)

38 Jā maca Jesús tsi'si huë'epi etani Simón huë'ena cacapi. Jārote pacó'ë, Simón huao suña dahuë ai ju'icopi. Jāje pa'iona, Jesure jujucaijë'ë, cajë sei'ë. 39 Jā maca Jesús suña dahuë ju'iconi ñaquë suña dahuëre pi'ra saouna, suña dahuë peocopi huëni aore neni ao.

Jesús Jai Paire Jujucaiye

(Mt. 8.16-17; Mr. 1.32-34)

40 Ësë cara mesi maca jai paire ju'icohua'ire dahuë, coa si'a ju'i dahuë quë'iohua'ire Jesuna. Dajëna, ju'icohua'ire i jëtëpi pai ñapere patoquëna, co'yahuë, si'aohua'i. 41 Ju'icohua'ire pa'isicohua'ipi huatiohua'i etajë Maija'quë mamaquëre papi cuijëna. Jesupi jā cayere ësepi, tsoe iohua'ipi Maija'quë jëjo daoquë Cristo api asa do'ire.

Jesús Yëhuoye, Galilea Quë'rore

(Mr. 1.35-39)

42 Jesús nea hue'ñarepa pai peo hue'ñana saquëna, saima'quëni cajë co'ejë ti'ahuë. 43 Ti'asi maca Jesupi capi, jaohua'ire:

“Quëaye pa'iji, de'o coca Maija'quë pa'i te'te ayere yequë pai daripëaje. Jāre caquë jëjo daosiquë a'ë.”

44 Jāje Jesús cu'i quëarojaji'i, Galilea tsi'si huë'ñana.

Tsiaya Hua'ire Yo'eye

(Mt. 4.18-22; Mr. 1.16-20)

5 1 Jesús Genesaret Jaira tëtëpare pa'i quëaquëna, jai pai qui'yerepa Maija'quë coca asañu'u cajë dateña. 2 Daijëna, Jesupi caya yohuë, peo huëapi huahuaquëna, ñapi. Iti yohuë acohua'ipi yo'e nëare tsoa toñu'u cajë tumareña. 3 Ñani jā maca Jesús yohuëna aya mëji'i. I aya mëisi yohuë Simón tse pacó'ë. Jā maca capi, a'ri maña so'ona jëjo sao huahuojë'ë, yohuë. Huahuojëna, ja'runi ñu'i Jesús paire ye'ya huëopi. 4 Ye'ya tējini Simónre capi: “Hua'i pa'i hue'ñana yohuëja'a sani mësaruru yo'e nëapi hua'ire neñu'u.”

⁵Simónpi sehuopi:

“Ye'yaquë, si'a ñami te'e hua'ireje neñe peoyerepa ai yo'ohuë, nema'pë. Jaje pasicohua'ita'a mël'ëpi cuañeñe sête hua'i yo'erë jëo dëosi'i.”

⁶Caní jëo dëosi maca hua'ipi airepa tímërena, hua'i yo'erëpi tēi huëo.

⁷Jā maca yequë yohuëre cajeohua'i pa'icohua'ire jëñapi soihuë. Soina, dani si'ahua'i caya yohuëa ea tete macarepa aya tímëhuë. ⁸Jā maca Simón Pedro iyere ñani do're ja'runi Jesure capi:

“Saijë'ë, Èjaë, yë'ë quëno maca pa'ima'ë. Yë'ë co'aye yo'oquë a'ë.”

⁹Coa quëquë huesëni jaje caquëna, i ja're coní pa'icohua'ijë hua'ire nese'ere cuasajë ai quëquëhuë. ¹⁰Cui'ne, Zebedeo mamajë Jacobo cui'ne Juan, Simón cajeohua'ijë quëquë huesësicohua'i pa'ë'ë. Jaje quëquëjëta'are Jesús capi, Simónre:

“Ca'rama'ë pa'ijë'ë. Mël'ë yurepi pa'ire yo'ecaiquë pa'ija'quë a'ë.”

¹¹Jā maca yohuëare tē'tëpana sani jëoni Jesús ja're saë'ë.

Jesús Jujucaiye, Jā'ju Dahuë Ju'iquëre

(Mt. 8.1-4; Mr. 1.40-45)

¹²Jesús pa'i daripëre pa'ina, te'i pa'i jā'ju dahuë ju'iquëpi titani Jesure ñani i tsiapi yejare pana semeni seji'i. Ñeje caquë:

“Ejaë, mël'ëpi yë'ëre jujuye yëni jujujë'ë. Yë'ë ju'i dahuë.”

¹³Jā maca Jesús i jëtëpi patoquë capi:

“Yë'ë jujucaiyë.”

Caquëna, jare iti macapi jā'ju dahuë peoquë de'opi. ¹⁴Jā maca Jesús ite capi:

“Quëama'ë pa'ijë'ë, pa'ire. Coa Maija'quë huë'e ñacaicohua'ise'ere sani iñoj'ë. Iñoni mël'ë co'ayere tsoa toquë yo'o do'ire isijë'ë, Moisés cuañequë pa'ise'ere. Jaje yo'oquëna, si'a hua'i mël'ë ju'iquë pa'isiquëpi de'oquë ponëni yo'oye ñaja'cohua'i a'ë.”

¹⁵Jaje pa'iquëta'are Jesús yo'oyepi jero sa'ana jai saji'i. Jaje pa'ina, jai pa'i i caye asañu'u cajë daijëna, ju'icohua'ijë da'ë'ë, juju cuañoñu'u cajë.

¹⁶Jaje yo'ojëna, Jesús pa'i peo hue'ñana sai Maija'quëre seji'i.

Quë'quë Dahuë Ju'iquëre Jujuye

(Mt. 9.1-8; Mr. 2.1-12)

¹⁷Jesupi ye'yaquëna, jarote ja'rusicohua'ipi ñuë'ë. Fariseo acohua'i cui'ne cuañese'e ye'yacohua'i coní, Galilea yejare si'a hue'ña pa'icohua'ipi daisicohua'i pa'ë'ë. Pa'ijëna, yecohua'ipi Judeapi cui'ne Jerusalénpí daisicohua'ijë pa'ë'ë. Pa'ijëna, Jesupi paji'i, Maija'quë tutu ju'icohua'ire jujucaiye. ¹⁸Paquëna, yo'oye peoquëpi ju'iquëni cai saihuëna oasiquëni cuajjë Jesús pa'i hue'ña çoreña, ñajaquë cajë. ¹⁹Dajëta'are caca hue'ñapi jai pa'i tímëstico pa'i do'ire cacaye pajë ña jujani huë'e jeteja'a mëni peo coje tēteni ju'iquëre pa'i jopoj'a meñe casahuë, Jesús ña hue'ña cai saihuëna oasiquëni. ²⁰Jā maca Jesús iohua'ipi ite jujuquë api cuasayere ñani ju'iquëre capi:

“Mè'è co'aye yo'ose'ere saì de'huacaiyè.”

²¹Jaje caquëna, asani cuañese'e ye'yacohua'i cui'ne fariseohua'i cuasa huëoreña: “Paipi yequë co'aye yo'ose'ere saì de'huacaiye peoji. Jare Maija'quëse'e saì de'huacaiye pa'iji. ¿Iquei'ni, iquë ja jerepa Maija'quëre cue'cuequë caquë?”

²²Jesupi jaje cuasajëna, ñani capi:

“¿Me yo'ojë jaje cuasaye'ni? ²³Co'aye yo'ose'ere saì de'huaye cui'ne iquëre jujucaiyë paì cato yo'o ti'a ma'ñe a'è. A'jiñe yo'oye peoji. ²⁴Jaje pa'ito de'oji. Iñosi'i, mësarute. Yè'è Paì Mamaquëpi te'ipi iye yeja cuañequëre papi co'aye yo'ose'ere saì de'huacaiquë pa'iyë.”

Jaje se cani ju'iquëre capi:

“Mè'èni cayë, huëijë'è. Më uicore ini mè'è huè'ena saijë'è.”

²⁵Caquëna, ja macarepa iti ju'iquë pa'isiquëpi jaohua'i ñajëna, huëni nëcani i uisicore se de'huani Maija'quëre sihuaquë caquë saji'i, i huè'ena.

²⁶Saina, si'ahua'i ña quëquëni Maija'quëre sihuajë careña.

“Yurena ñahuë, pajje yo'o ma'ñere yo'oye.”

Jesús Levíre Soiye

(Mt. 9.9-13; Mr. 2.13-17)

²⁷Iye yo'osi jeteyo'je Jesús etaquë Leví hue'equëre ñapi, pa'i do'i saì hue'ñare ñu'i curire seina, ñani capi:

“Tuijë'è, yè'èni.”

²⁸Ja maca Leví i yo'oye si'aye se jëoni Jesús ja're cõni saji'i.

²⁹Ja jeteyo'je Leví jai fiesta nepi, i huè'ena, Jesuni sihuaquë. Jarote cui'ne jai paì pa'i do'i secohua'i cui'ne yecohua'i cõni aì sailhuëna ja'rusicohua'ipi pa'è'è. ³⁰Pa'ijëna, ñani fariseohua'i cui'ne cuañese'e ye'yacohua'i Jesure ye'yecohua'ipi de'oye yo'oma'cohua'i a'è, cuasajë sañope ca huëojë careña:

“¿Me yo'ojë mësaru pa'i do'i secohua'i ja're cui'ne co'aye yo'ocohua'i ja're cõni aijë cui'ne ucuye'ni?”

³¹Cajëna, asani Jesupi sehuopi:

“De'oye pa'icohua'i cui'ne huajëcohua'i jujuquëre co'eye pañë. Jaje pa'ina, ju'icohua'ipi co'ecohua'i a'è, jujuquëre. ³²Ja do'ire de'ocohua'ini soisi'i caquë, daisiquë peoyë. Co'acohua'ini soisi'i caquë daisiquë a'è, jaohua'ipi ja'rë yo'ose'e jëoni ponëjajë caquë.”

Jesure Señe, Aima'pë Señere

(Mt. 9.14-17; Mr. 2.18-22)

³³Caquëna, iohua'ipi Jesure seteña:

“Juanre ye'yecohua'i yo'oye sète aima'pë Maija'quëre ai sejë yo'oyë, cui'ne fariseo ye'yecohua'ijë. ¿Me yo'ojë mè'è ye'yacohua'ise'e si'anë aijë cui'ne ucujë pa'iyë'ni?”

³⁴Cajëna, Jesupi sehuopi:

“¿Hueja aó aija'cohua'ire soisicohua'ire aima'pë pa'ijë'ë cacohua'i a'ni, mësarü, huejaquëpi ití macare coní pa'ito? ³⁵Jaje pa'iquëta'are yequë mu'se huejaquëre yë'ëre sioye pa'iji. Ja maca huejaquëpi peoëna, aó aima'pë pa'ija'cohua'i a'ë.”

³⁶Cui'ne quëa inopi, iohua'i ñañena coní ñeje:

“Yecohua'ijë huajë ju'i care tëani ai ju'i care sëoma'cohua'i a'ë. Jaje yo'ocohua'i pani coa huajë ju'i care nejoñë. Cui'ne huajë ca catipëpi ai ju'i cana sëosicohua'i pa'ito te'ojë pa'io ña cuañone paji. ³⁷Jare cui'ne pa'iji. Cuiya'i cono doye peoji, ai ca'nihuë de'huasicono. Jaje ai ca'nihuëna huajë cuiya'i cono doto yete saiye pa'iji. Jaje yete saina, si'aye nejoñë pa'iji, cuiya'i cono cui'ne ca'nihuë de'huasi topëje nejoñë pa'iji. ³⁸Jaje pa'ina, huajë cuiya'i cono doye pa'iji, jare cui'ne huajë ca'ni topëna. Jaje huajëyese'e pa'i de'oye quëcoja'coa. ³⁹Jaje pa'ina, o'sasi cono ucucohua'ijë huajë cono ucuye pañë, o'sasi cono ai de'oye a'ë, cajë.”

Jesure Ye'yecohua'ipi Huajë Mu'se Yo'oye

(Mt. 12.1-8; Mr. 2.23-28)

6 ¹Te'e huajë mu'se Jesús ta sitoja'a saina, ire ye'yecohua'ipi trigo tsa'ña tëajë saë'ë. Yo'oni jeteyo'je jëñapi ití case'e po'tejë aë'ë. ²Jaje yo'ojëna, fariseo acohua'ipi ñani se'ë:

“¿Moisés cuañese'e caji huajë mu'se yo'oye peoji. Jaje pa'iquëta'are me neñu'ju yo'oye'ni?”

³Cajëna, Jesupi sehuopi:

“¿Ñama'cohua'ini David cui'ne i cajeohua'i coní aó ëa ju'ijë yo'ose'e?

⁴Maija'quë huë'e ñacaicohua'ise'e Maija'quëna isise'ere aó ainëre aó ëa ju'i Maija'quë huë'ena cacani aore imani ai cui'ne i ja're pa'icohua'ireje aopi.”

⁵Cui'ne capi, jaohua'ire:

“Pai Mamaquëre papi tutu payë, huajë mu'se pa'itojë cuañëne.”

Jëtë Cuënesicore Paquëre Jujuye

(Mt. 12.9-14; Mr. 3.1-6)

⁶Yëquë huajë mu'se Jesús pai tsi'si huë'ena cacani, ye'ya huëoquëna, jarote paji'i, tel' emë ëja tël'hui jëtëre cuënesicore hue'equë. ⁷Pa'ina, cuañese'e ye'yacohua'i cui'ne fariseohua'i coní cuasahuë. Jesupi huajë mu'sere jujuquëna, ñani ite sañope cañu'u cajë utejë ñahuë. ⁸Jaje cuasaye ñaquëta'a cuënesi jëtë hue'equëre capi:

“Huëijë'ë. Huëni ja maca jopore pare nëcajë'ë.”

Caquëna, huëni nëcapi. ⁹Ja maca Jesús yecohua'ire capi:

“Sesi'i, mësarute te'ore. ¿Iquepi de'ouë'ni, huajë mu'se yo'oye, de'oye panita'a co'aye? ¿Paire huasoye panita'a paire coa nejoñë?”

¹⁰Ja maca si'ahua'ire seña të'ijani Jesús capi, ju'iquëre:

“Më jëtëre mëajë'ë.”

Caquëna, ì case'eje yo'opi. Yo'oquëna, ì jëtë cuënesico pa'isico de'oco paco'ë. ¹¹Jaje yo'oquëna, ñani yecohua'i ai pëti ëaye ñajë ca huëohuë, sa'ñe ìquepi Jesure sa'ñope ne'ñe pa'ioni cajë.

Jesús Doce Ye'yecohua'ire Soiye

(Mt. 10.1-4; Mr. 3.13-19)

¹²Ja mu'seña Jesús Maija'quëre sesi'i caquë saji'i, ai cutihuë. Jaropi si'a ñami Maija'quëre seji'i. ¹³Nata tomesi maca ì ye'yacohua'ire soini doce pa'iohua'i ì ja're pa'icohua'ire hue'yopi, jëjo daocohua'ire. ¹⁴Jaohua'i cato paë'ë: Simón, jare jaëni se hue'yo cosiquë paji'i, Pedro. Cui'ne ì yo'jei, Andrés paji'i. Jacobo, Juan, Felipe, Bartolomé, ¹⁵Mateo, Tomás, cui'ne Alfeo mamaquë Jacobo paji'i. Simón Cananista tsëcapë aquë paji'i. ¹⁶Judas Jacobo yo'jei paji'i. Cui'ne yequë Judas Iscariote Jesure yehuoja'quëje.

Jesús Jai Paire Ye'yaye

(Mt. 4.23-25)

¹⁷Jesús ai cutihuëpi ì ye'yacohua'i ja're conì cajequëpi përepë yejana pëapi. Jarote jai pai paë'ë. Si'a hue'ña acohua'i, yecohua'ipi Judea cui'ne Jerusalén cui'ne jai tsiaya tët'tëpa Tiro cui'ne Sidón qu'ero acohua'i daisicohua'i paë'ë, Jesús cayere asa'nu'u cajë cui'ne johua'i ju'i dahuëre jujucaijaquë cajë daisicohua'ipi. ¹⁸Huati yo'oquëna, ai yo'ojë pa'icohua'ipi juju cuãnosicohua'i de'ohuë. ¹⁹Si'a pai Jesure patosicohua'ipi ì tutupi si'ahua'i co'yasicohua'i paë'ë. Jujusicohua'ire ñani pato do'ire si'ahua'i yëhuë, patoye.

Nuñerepa Case'e Pai Ayere

(Mt. 5.1-12)

²⁰Ja maca Jesús ì ye'yacohua'ire ñani capi:

“Sihuacohua'i pa'ijë'ë, mësaru teaye pa'iohua'i, Maija'quë te'tena de'oye cacani paja'cohua'i a'ë.

²¹Sihuacohua'i pa'ijë'ë, mësaru ao ai ëa ju'icohua'ipi jeteyo'je si'aye ti'aja'cohua'ipi. Sihuacohua'i pa'ijë'ë, oicohua'i pa'isicohua'ipi jeteyo'je soja'cohua'ipi.

²²Pai Mamaquëre tui do'ire paipi mësarute pëijë coejë johua'i qu'eroe etojë cue'cueye pa'iji. Jaje yo'oto sihuajë'ë, yë'ëre tui do'ire. ²³Jaje yo'ojëna, ai sihuajë'ë, ma'tëmona mësarute caquë de'huacaisi co'amañare jerepa paja'cohua'ipi. Mësarute co'aye yo'oyeje pa'ye yo'oa'huë'ë, Maija'quë tsoe hue'ña quëacaicohua'ire.

²⁴Jaje pa'iquëta'are jaiye yure co'amaña pajë sihua tosicohua'ireta'a, sihuaye peoja'coa.

²⁵Teayerepa mësarureta'a yure ao ani timëni sihuajë pa'isicohua'ire jeteyo'je ao ëa ju'iñe pasipi. Teayerepa mësaru yure so huajëjë pa'isicohua'ireta'a jeteyo'je oiye pasipi.

26 Teayerepa mäsaru pa'iyeni si'a pa'i de'o pa'ire pa'ë cajëna, pa'icohua'li maña. Tsoe acohua'ijë jaje cui'ne de'ocohua'li a'ë ca'ahuë'ë, Maija'quë jëjo daocohua'ijë pa'icohua'ita'a coa cosocohua'ini.

Mäsarute Sañope Yo'ocohua'ire Oiyë

(Mt. 5.38-48; 7.12)

27 Jaje pa'iquëta'are mäsaru yë'ëre asacohua'ire cayë: Oijë'ë, mäsarute sañope cacohua'ire. De'oye yo'ocaijë'ë, mäsarute cocohua'ire. 28 De'oye pa'ija'ñere cacaijë'ë, mäsaruni sañope ai yo'o ja'ñere de cacohua'ini. Secacaijë'ë, mäsarute tea ju'icohua'ireje. 29 Yecohua'ipi tsiana te'le te'te tëtoru yequë te'te tsiaje nëocaijë'ë. Cui'ne yecohua'ipi më sësëquëna ju'iconi jioni sato hu'ëhuë ju'icoreje se isi saojë'ë. 30 Secohua'li pa'ito isijë'ë. Yeque më tseconi jiosicohua'li pa'ito, coa ñajë'ë, cui'naoni seña pajë'ë. 31 Yecohua'ipi mäsaruni de'oye yo'ojajë cuasayeje pa'ye yecohua'ini se de'oye yo'ojë'ë, mäsarupi.

32 ¿Jaje pa'iquëta'are mäsarupi mäsarute oicohua'ise'ere oicohua'li pani, iquere de'oye yo'oye'ni? Co'ahua'ijë cui'ne sa'ñe oiyere yo'ocohua'li pani. 33 ¿Jaje pa'ina, mäsarupi mäsarute de'oye yo'ocohua'ise'ere de'oye yo'oni iquere de'oye yo'oye'ni? Co'acohua'ijë cui'ne yo'oyere yo'oni. 34 ¿Jaje mäsarupi de'oye co'yocohua'ise'ere co'yoja'cohua'li a'ë cuasajë isicohua'li pani iquere de'oye yo'oye'ni? Co'acohua'ijë co'yoja'cohua'li a'ë cuasajë yo'oyere yo'oni. 35 Jaje pa'iquëta'are mäsaru cato oiyë pa'iji, mäsarute sañope yo'ocohua'ire. Jaohua'ire de'oye yo'ojë isiyë pa'iji, co'yoja'cohua'li a'ë cuasaye peoyerepa. Jaje yo'osicohua'ini ma'tëmo jaiye de'o co'amaña isiyë pa'iji. Cui'ne mäsaru pa'ija'cohua'li a'ë, Maija'quë Èjaërepa mamajë, cui'ne ije oiquë api, co'acohua'ire cui'ne i isiyere de'oji cama'cohua'ireje. 36 Jaje cui'ne mäsaruje oijë'ë, yecohua'ire, Maija'quë oiyëje.

Pai Yo'oyere Ña De'hua Cayë

(Mt. 7.1-5)

37 Jaje pa'ina, co'acohua'li a'ë cama'pë pa'ijë'ë, yecohua'ire. Jaje pajëna, Maija'quëje mäsarute co'acohua'li a'ë cayë paja'quë api. Yecohua'ire nejoñe pajë'ë. Jaje pajëna, Maija'quëje mäsarute nejoñe pasipi. Yecohua'li tayo yo'oyere sai de'huacaijëna, Maija'quëje mäsaru tayo yo'oye sai de'huacaija'quë api. 38 Yecohua'ire isicohua'li pa'ijëna, Maija'quëje mäsarute isisipi. Isija'quë api, i topëna de'oye cuasa ti'acore pani. Dëso quiosiconi, ña'co quiosiconi, timësicore pani, mäsaru yecohua'ire isiyëje pa'ye Maija'quëje isija'quë api, mäsarute."

39 Jesupi ñeje yo'oyëje pa'ye a'ë capi:

"Ñama'quëpi yequë ñama'quëni sai saquë pa'ito cojena tomeja'cohua'li a'ë, si'a jupë. 40 Ye'yecohua'ipi iohua'ire ye'yaquëre tëto saiscohua'li peoyë. Ye'ye tējinita'a ti'ñañe pa'iji, iohua'ire ye'yaquëje pa'iohua'li.

41 ¿Me jaje pa'ito, më'ë yo'jei ñacoare ne'cua pa'icore se ñaquë casi'ni? ¿Më'ë ñacoare soquë tiro ja'iore papi ju'icore du'ru ñama'ë pa'ini? 42 Më'ë ñacoare

pare soquë tiropi ju'iona ti ñama'ë pa'iquëpi me mël'ë yo'jeire casi'ni: 'Huau, mël'ë ñacoare ne'cua ju'icore dutasi'i, nëocaij'ël'ë.' De'oquëre pa'ë coa caquë yo'oquë maca. Mël'ëpi du'ru macarepa mël'ë ñacoare soquë tiro ju'iconi duta jëoj'ël'ë. Jeteyo'je de'oye ñaquëpi mël'ë yo'jeire ne'cua ju'icore dutacaiye pa'lji.

Mël'ë Yo'oyere Ñajë Asaja'cohua'i A'ë, Mël'ëre

(Mt. 7.17-20; 12.34-35)

⁴³De'o soquë yëpi co'a ca quëiñe peoji. Jaje cui'ne co'a soquë yëjë de'o ca quëiñe peoji. ⁴⁴Jaje pa'ina, soquë ñëa ñape ñañe pa'lji, iti quëiñena. Miu soquë yë pani quëiñe paji, cōsa care. Jaje cui'ne miu pisi pani quëiñe paji, cuiya'i care. ⁴⁵Jaje pa'ina, de'o pai pani caji, de'oyere, i joyo de'oyepi pa'yere. Cui'ne co'aquë pani co'ayere caji, i joyo co'ayepi pa'yere. Yë'opopi caji, joyo pa'yepi etaquëna.

Caya Huë'ña Ne Hue'ña

(Mt. 7.24-27)

⁴⁶¿Me yo'ojë mësaru yë'ëre Èjaë, Èjaë cajëta'a yë'ë cayejë ne ma'ñe'ni? ⁴⁷Quëasi'i, yë'ëna dani asacohua'ipi cui'ne yë'ë cayejë yo'ocohua'i pa'yere. Iyejë pa'ye pa'lji. ⁴⁸Jahua'i cato ëmë cutihuëna nëconi huë'e nesiquëjë pa'i pa'lji. Tsiayapi co'jenije ti'ama'ëna taiñe paja'quë api. De'o vejana nesi do'ire. ⁴⁹Jaje pa'iquëta'are asaquëta'a yë'ë case'eje yo'oma'quëpi mejahuëna nëconi huë'e nesiquëjë pa'i pa'lji. Tsiaya co'jeni ai tutu tsaj'ina taiñe pa'lji."

Jesupi Romano Jo'yaëre Jujuye

(Mt. 8.5-13)

7 ¹Jesús coca ca tējini saji'i, Capernaum yejana. ²Jarote romano soldado pai capitán i jo'yaë i oiquëre papi juni huesë tējiquëre paquëpi paji'i. ³Jaje pa'ina, capitánpi Jesure asani jëjo saopi, judío aiohua'i acohua'ini, dani i jo'yaëre jujucaija'quëre seni daja'cohua'ire caquë. ⁴Jahua'i Jesure tsiojani ai se huëohuë, ñeje cajë:

"Iye capitán de'oquë api, mël'ëpi ite cōcati'ñe pa'i a'ë. ⁵Cui'ne judío paire oiquë api. Jaje yo'oquëpi pai tsi'si huë'e saicaina, mai secore nehuë."

⁶Jaje cajëna, Jesús asani iohua'i ja're cōni saji'i. Saijë i huë'e ti'añe ja'i macare pa'ljëna, capitánpi jëjo daopi i cajeohua'ire Jesure ñeje quëaja'cohua'ire:

"Èjaë, ai yo'oma'ë pa'lj'ël'ë. Jaje pa'ina, cayë yë'ë co'aquë huë'ena daima'ë pa'lj'ël'ë. ⁷⁻⁸Yë'ë ëjahua'i cuañeñere yo'oquë pa'iquëpi yë'ë soldado paire meñe cuañequëna, sehuocohua'ire payë. Jaje paquëpi yë'ëpi cayë, jahua'i aquëni: 'Saij'ël'ë,' caëna, saiji. Cui'ne yequëni 'daij'ël'ë' caru, daiji. Cui'ne yë'ë jo'yaëni: 'jare nej'ël'ë' cuañeru neji. Jaje mël'ëpi co'yaj'ël'ë cuañeru, yë'ë jo'yaëpi co'yasipi asayë, yë'ë. Jaje pa'ina, daima'ë cuañej'ël'ë, yë'ë jo'yaë co'yajaquë."

⁹Jaje case'ere asani Jesús ai sihuapi, tai'ne caquëre papi pa'iquë'ni caquë. Jaje cuasani ite tuicohua'ire capi:

“Ti ñama'ë paë'ë, Israel paipi jaje yè'ëre necaija'quë api cuasacohua'ire iquë yo'ose'ëje care paye.”

¹⁰Jä maca i jëjo daosicohua'i huë'ena co'ini capitán jo'yaë tsoe co'yasiquëni ti'ahuë.

Posë Ju'isiquëre Huëoye

¹¹Iye yo'osi jeteyo'je Jesús saji'i, Naín hue'e daripëna. Saina, cui'ne i ye'yacohua'i cui'ne jai paí cõni saë'ë. ¹²Paí daripë eta sa'rona ja'yë ti'asi maca ju'isiquëni tañu'u cajë sacohua'ire ñapi. Jai paí cõni saë'ë, iti daripë acohua'ijë. Pëca ja'quë juquëna, hua'jeopi te'ire nëcoquëpi ju'isiquë paji'i. ¹³Jaje saijëna, Ejaëpi jaote teaye ñani oi capi:

“Oima'o.”

¹⁴Jä maca Jesús tsiojani mahuëna patopi. Patoquëna, iti sacohua'i nëcajaë'ë. Jä maca Jesús ju'isiquëni capi:

“Posë, yè'ëpi cayë më'ëre, huëijë'ë.”

¹⁵Caquëna, iti ju'isiquëpi huëni ja'runi coca ca huëopi. Pëca ja'cona huëoni isipi, Jesús. ¹⁶Jä maca iyere ñani si'ahua'i quëquëni Maija'quëre de'okuëre pa'ni sihuajë ca huëohuë ñeje:

“Mai aquëpi Maija'quë quëacaiquë pa'iji, jerepa pa'ipi.”

Cui'ne cahuë:

“Maija'quëpi i paire cõcasi'i caquë daji'i.”

¹⁷Jaje Jesús yo'ose'ere Judea pa'icohua'i cui'ne Judea yeja niamoa pa'icohua'ijë asahuë.

Juan Ti Doquë Jëjo Saocohua'i Jesuna

(Mt. 11.2-19)

¹⁸⁻¹⁹Juanpi si'aye iye yo'ose'ere asapi, ite ye'yecohua'ipi quëajëna. Jaje asani daija'quë api ca nëosiquë ¿Cristorepa pa'ima'quë, panita'a ja yè'ta'a yequëre uteye pa'iquë? cuasaquë i ye'yacohua'ire cayahua'ire soini Jesús quë'rona jëjo saopi, seni asaja'cohua'ire. ²⁰Jëjo saosicohua'ipi Jesús quë'rona ti'ani cahuë:

“¿Cristo iti daija'quë api ca nëosiquë pa'ima'quë më'ë? Panita'a ja yè'ta'a ¿yequëre uteye pa'iquë? caquë Juan oco doquëpi yëquëre jëjo daopi.”

²¹Sa ti'ajëna, Jesupi jai paire ju'icohua'ire cui'ne ai yo'ocohua'ire huati quë'iohua'ire eto saoquë, cui'ne ñama'cohua'ire jujuquë yo'opi.

²²Yo'oquëni sejëna, Jesupi sehuopi, jaohua'ire:

“Sani Juanre cajë'ë: Mësarü ñajë cui'ne asase'ere quëajë'ë, ñama'cohua'i pa'isicohua'i ñañere, cu'ima'cohua'i pa'isicohua'ipi cu'iyere, ja'ju dahuë hue'ecohua'ipi peocohua'i tomeñere, asama'cohua'ipi asayere, ju'isicohua'ipi huëiyere, cui'ne teaye ai yo'ocohua'ini huaso coca quëayere. ²³Coa asani yè'ëre ire papi caquë jëa coeye paquëpi sihuaquë de'oye pasipi.”

²⁴Juan jëjo daosicohua'ipi co'isi maca Jesupi paire ca huëopi, Juan ayere ñeje:

“¿Iquere sani ñare'ni, cuene yeja saiscohua'i? ¿Tutupi catëna ju'acquëna, huahuëyere ñare? Páni. 25 Jaje pa'ina, ¿iquere sani ñare'ni? ¿Ëja de'oni jai do'i cañare ju'iquëni ñare? Páni. Jaje pa'ina, mësarupi ñacohua'i a'ë, pa'i ëjaohua'i huë'ña pa'icohua'ipi jai do'i cañare ju'ijë pa'icohua'ire. 26 T'ijupë cayë, jaje pa'lito: ¿Iqueini sani ñare'ni, Maija'quë jëjo daoquë? Jaje pa'ijë'ë. Nuñerepa cayë, Maija'quë quëacaiquë jerepa pa'í api. 27 Toyase'e cato caji:

Jëjo saosi'i, yë'ëre quëacaiquëre më'ë sai huë'ñana

Më'ëre ma'a ne de'huacaija'quëre.

28 Jaje pa'ina, cayë, mësarute. Pa'i pa'í huë'ñana iquë Juan oco doquëje pa'í ti peopi, Maija'quë quëacaiquë jerepa pa'í. Jaje pa'iquëta'are ai a'riquë macapi Maija'quë pa'í te'te jerepa pa'í pa'ija'quë api.”

29 Jaje caquëna, asani si'aohua'i Juanre oco do cuañosicohua'i co'a pa'i cui'ne pa'í do'í curi secohua'i Maija'quë de'oyerepa yo'ose'ere sihuajë nuñerepa pa'í api, Maija'quë. 30 Jaje pa'iquëta'are Juan oco do cuañoma'cohua'ipi fariseo pa'ipi cui'ne cuañese'e ye'yacohua'ipi Maija'quë iohua'ire caquë yo'oyere asacaiye coereña, co'aye a'ë cajë. 31 Ëjaëpi yequeje capi:

“¿Iquena coní iye'në pa'ire ja yo'oyeje pa'iohua'i a'ë caquë quëara'ye? ¿Ique yo'oyeje pa'iohua'i ña cuañone'ni? 32 De'oji, jaje pa'lito tsipi jai pa'í pa'í huë'ñana ca'a yo'oñu'u cajë ja'rusicohua'ipi caje tsini pi'cohuëre jucacaitoje bailaye pahuë. Cui'ne oiyeje pa'iohua'ita'a jëjëñere jëjëcaitoje oire paye pahuë. Yure pa'icohua'i cui'neje pa'iyë. 33 Juan oco doquëpi ai aima'quëpi cui'ne o'sa ucuma'quëpi pa'ina, mësarupi ite huati quë'í api cayë. 34 Ja jeteyo'je Pa'i Mamaquë daji'i, ao aiquëpi cui'ne o'sa ucuquëpi. Jaje pa'ina, mësarupi jaiye aiquë api cui'ne jaiye o'sa ucuquë api, co'aye yo'ocohua'i cajeipi cui'ne pa'í do'ire curi secohua'i cajeipi cayë. 35 Jaje pa'iquëta'are Maija'quë mamajëpi i iñoñere cayahua'í yo'oye de'oji, asayë.”

Fariseohua'í Aquë Simón Huë'ere Pa'iyë

36 Fariseo aquëpi Jesure soipi, i huë'ena sani ao aijë'ë caquë. Soina, Jesús sani ao ai saihuëna ja'rupi. 37 Ja'runi ñu'ina, iti daripë, te'o nomio co'aye pa'isicopi asani i pa'í huë'ña daco'ë, ai huëo së ma'ña da'care quëna huëna daco. 38 Dani iopi Jesús quëno macana do're ja'runi oio io oi copi i quëo tsoani jeteyo'je io nañapi tëno cuenani tsu'suco sihuaco huëo së ma'ñapi i quëoje doco. 39 Jaje yo'ocona, fariseo Jesure soisiquëpi ñani cuasapi: “Iquë Maija'quë coca quëacaiquërepa pani ite co'a nomiopi papico yo'oye asara'pi, co'a nomiopi yo'oco caquë.” 40 Cuasaquëna, Jesupi fariseore capi:

“Simón, më'ëre yeque maña caye payë.”

Caquëna, fariseopi sehuopi:

“Cajë'ë, ye'yaquë.”

41 Jesupi capi:

“Curiquë prestaquëni caya ëmëohua'í curire co'yoye pahuë. Quinientos denario te'ipi do'í papi, yequëpi cincuenta denario do'í papi. 42 Jaje do'í

pacohual'ipi saï tì'añe pajëna, ñani curiquë prestasiquëpi jaohual'ire oi ipi saï de'huapi. Jaje pa'ito yure quëajë'ë. ¿Nepi jaohual'i aquë ai jerepa oiye'ni, ite?"

43 Caquëna, Simónpi sehuopi:

"Iti ai jaiye do'li pasiquëpi ite saï de'huacaisiquëre ai oji'i, cuasayë."

Jaje caquëna, Jesupi sehuopi:

"Nuñerepa cayë, më'ë."

44 Ja maca Jesús nomiore ñani capi, Simónre:

"¿Ñaquë io yo'oye? Më'ë huë'ena yë'ë caca maca më'ëpi oco dacaima'ë paë'ë, yë'ë nëcañoa tsoa ja'ñere. Jaje pa'iquëta'are icopi io oisi ocopi tsoacaco'ë, nëcañoare cui'ne nañapi tëno cuënao. 45 Më'ëpi sihuaquë pëpama'ë. Jaje pa'iquëta'are io cato caca macapi sihuao de'oyerepa pëpao, ja yë'ta'a yo'oco. 46 Më'ëpi yë'ëre siopë hui'yape pë'nama'ë paë'ë. Jaje pa'iquëta'are io cato yë'ëre huëo së ma'ñapi nëcañoana doo. 47 Jaje pa'ina, më'ëre cayë, io ai oio yo'oyepi io jaiye co'aye yo'ose'ere saï de'hua cuañosico pa'io, iñoco. Jaje pa'iquëta'are a'ri mañare saï de'hua cuañoquëpi a'ri maña oiye iñoji."

48 Jaje se cani capi, iote:

"Më'ë co'aye yo'oco pa'ise'e saï de'huacaë'ë."

49 Jaje caquëna, soisicohua'i ñu'icohua'ipi sa'ñe iohua'ija'a ca huëohuë:

"¿Iquei'ni, iquë jaje co'aye yo'ose'ere saï de'huacaiquë?"

50 Jaje cajëta'are Jesupi capi, iote:

"Maija'quëpi huasoja'quë api cuasani yo'o do'ire huasosico pa'iyë, më'ë. Señaco de'oye saijë'ë."

Jesure Cõcaicohua'i Nomiohua'ipi

8 1 Ja jeteyo'je Jesús jai daripëana cui'ne a'ri daripëana si'a hue'ña cu'i quëarojai, cui'ne Maija'quë cuañe tē'tena cacani de'oye pa'iyere quëapi. Ite cohüë, doce i ye'yacohua'ipi. 2 Cui'ne nomiohua'ipi huati quë'iohua'li pal'isicohua'li cui'ne ipi ju'li dahuëje jujucaisicohua'ipi ite con'i cuahuë. Jaohual'i ja're con'i María Magdalena hue'ecoje sacco'ë, iti siete huatiohua'ire eto cuañosicopi. 3 Cui'ne Herodes yëyere ise'e cuasaquë huë'e de'oye necaiquë Chuza i nëjo Juana cui'ne Susana, cui'ne jai pai yequë nomiohua'ije iohua'li co'amañapi cõcaë'ë, ite.

Taquëpi Pa'iyë

(Mt. 13.1-9; Mr. 4.1-9)

4 Pai daripëa ñape etani daë'ë, Jesure ñañu'u cajë. Jaje jai pai datena, ñani quëapi, iohua'li ñañe ayena. Caquë iñoquë ñeje capi:

5 "Taqüëpi tas'i'li caquë tsiona sani iti care jëaquëna, ma'ana tomëpi. Tomëina, cu'icohua'ipi tsacu huesohuë, cui'ne yequë care pi'api ocue huesohuë. 6 Yequë capi tomëpi, quëna yëjana. Tomëni ai de'oquëta'a ocopi peoquëna, cuëne juji'i. 7 Yequë capi tomëpi miu pisi quë'rona. Tomëni ai de'oquëna, pisije te'e ai de'oni huë huëapi. 8 Cui'ne yequë capi tomëpi de'o yëjana. Tomëni ai de'oni cien ca jaiye iti ñëa ñape quëji'i."

Jaje iyere Jesús ca tējiquē ai tutu capi:
 “Mēsarupi cajoro quē'iohua'i pani asajē'ē.”

Me Ne Ja'ñere Pai Ñañena Coni Quēaē'ni
 (Mt. 13.10-17; Mr. 4.10-12)

⁹Ja maca i ye'yacohua'ipi seil'ē: ¿Iquere ja mē'ē jaje quēaē'ni, iohua'i ñañena coni? ¹⁰Cajēna, ipi jahua'ire sehuopi:

“Maija'quē i te'te ayere pajije asa tī'a ma'ñere iñoquēna, de'hue asayē, mēsaru. Jaje pa'iquēta'are yecohua'ini cayē iye yo'oyeje pa'ye a'ē caquē iohua'i ñañe ayepi iti ñajēta'a ña ma'ñeje pa'iohua'i pa'iyere caquē. Cui'ne itire asajē coa noni asa huesojē ti asa tī'añe pajajē caquē.

Taquē Quēase'e Ayere
 (Mt. 13.18-23; Mr. 4.13-20)

¹¹Iye a'ē. Iye quēase'e caye: Iti ca cato Maija'quē cocajē pa'ye. ¹²Ma'a cato quēaji, Maija'quē coca asacohua'ini. Jaje asacohua'ini huatipi dani iohua'i joñoana de'huase'ere peo hue'ña jioni asama'cohua'ire neni ne huesoyere quēaji. ¹³Quēna yejana iti ca tomesese'e cato Maija'quē cocare du'ru macarepa sihuajē asasicohua'ipi pa'ijēna, jeteyo'je ai yo'oyepi tī'asi maca yo'o jujani jecohua'ini quēaji. ¹⁴Miu pisi quē'rona iti ca tomesese'e cato quēaji. Asajēta'a ja yē'ta'a iohua'i ai cuasayere yo'ojē pa'icohua'ini jaje yo'ojē co'amaña jaiye payena cuasajē cui'ne yeja sihuayere yējē co'a ju'lijēna, pisi meapi hue hue'ñañeje pa'ye yo'oquēna, iti ca quēima'pē pa'iyere. ¹⁵Cui'ne yequē ca de'o yejana tomesese'e cato quēaji, de'o joyopi jaje yo'oñu'u cajē asacohua'ini cui'ne yēhuose'ere asani cui'ne yo'ocohua'ipi cui'ne yo'o jujama'cohua'ipi nuñerepa itire pa'ijē iti ca quēicohua'ije pa'icohua'i pa'iyere.

Miacaiye Ayere Quēaye
 (Mr. 4.21-25)

¹⁶Toa tsēoma'cohua'i a'ē, tsēoni jeteyo'je yequē co'amañapi sjoja'coni panita'a cai saihuē huē'ehuēna nēcoja'coni. Jaje yo'oye pajē coa ai jerepa emēje'na nēcojē yecohua'i cacajēna, miacaija'core. ¹⁷Yahuese'epi ti yahue huesose'e pani huesoye peoji. Cui'ne pai asa ma'ñepi ti asama'pēna, pa'iyere peoji. Si'aye asa ja'ñe a'ē, tīñarepa.

¹⁸Jaje palito de'oye asajē'ē. Jaje palina, paquēna ai jerepa se isi coñe paliji. Jaje pa'iquēta'a peoquēni ai jerepa se sio coñe paliji, i payē, cuasase'e mañaque si'aye.”

Jesús Pēca Ja'co Cui'ne I Yo'jeohua'i
 (Mt. 12.46-50; Mr. 3.31-35)

¹⁹Ja maca Jesús pēca ja'co cui'ne i yo'je tsī coni tītahuē, i pa'i hue'ñana. Tītasicohua'ita'a jai pai pa'i do'ire i pa'i hue'ña tī'añe pahue.

²⁰Jaje palina, yecohua'ipi Jesure quēahuē:

“Mē ja'co cui'ne mē'ē yo'je tsī coni hue'sere pa'iyē, mē'ēni ñañu'u cajē dani.”

21 Cajëna, ipi capi:
 “Maija'quë coca asani cui'ne iti cayeje yo'ocohua'ipi yë'ë ja'co cui'ne yë'ë yo'je tsi pa'iyë.”

Jesupi Tuture Cui'ne To'añere Cuañeñe

(Mt. 8.23-27; Mr. 4.35-41)

22 Te'e mu'se Jesús jai yohuëna i ye'yacohua'i ja're coni tumëni capi:
 “Jaira je te'tena jeñu'u.”
 23 Caëna, ja je'ejëna, Jesús caji'i. Caina, ai tutu dapi. Jairare pa'ijëna, tutu dani co'poyepi yohuëna oco timë huëopi, ea du'iyë ja'i macarepa.
 24 Ña quëquëni caiquëre sëtoni cahuë:
 “Ye'yaquë, Ye'yaquë, ea du'iyë, mai.”
 Cajëna, Jesús huëni nëcani tuture cui'ne co'poyere yo'oma'o capi. Ca macarepa tsiña de'huaje pa'iorepa de'opi, ti co'poma'co. 25 Co'poma'co de'ona, i ye'yacohua'ire capi:
 “¿Je ja'ye tsoe Maija'quëpi necaija'quë api cuasaye jeore?”
 Jaje caquëna, jaohua'i cato quëquë huesësicohua'ipi ai ñahuë. Ñajë johua'ija'a sañe cahuë:
 “¿Iqueire pani, iquë, tutu cui'ne oco asani sehuocaiquërepa?”

Huatiahua'i Pa'ise'e Gadara Yeja Aquëre

(Mt. 8.28-34; Mr. 5.1-20)

26 Ai yo'osi jeteyo'jere papi Gadara yejana ti'ahuë, Galilea je'ñerepa pa'iconna. 27 Ti'ajëna, Jesús tumaquëna, te'i emë iti daripë aquëpi tsio daji'i. Ai tsoe iquë huatire hue'equëpi, ju'i cañaje ju'ima'quëpi cui'ne huë'ejë pa'ima'quë paji'i. Jaje pa'ipi coa pai ju'isicohua'ire ta hue'ñare pare iquë paji'i. 28 Jaje pa'ipi Jesure ñani tani do're ja'runi ai cuipi:
 “¿Me yo'oquë Jesús yë'ëre josa yo'osi'quë daiquë'ni, Maija'quërepa mamaquëpi? Señë, më'ëre. Yë'ëre josa yo'oma'ë pa'ijë'ë.”
 29 Iye cato Jesupi huatire etani saijë'ë, cuañequëna, ja do'ire jaje capi. Iquë cato huatipi ite jo'ya nesiquëre papi ai tsoe. Jaje pa'ina, paipi ite quëna meapi sëahuë, saima'ë pa'ija'quë cajë. Jaje yo'ojetá'are huatipi tutu isiquëna, ne tète saoquë saiquëpi pai peo yejana huatipi saquëna. 30 Jesupi capi, ite:
 “¿Ique mami a'ni, më'ë?”
 Seina, ipi sehuopi:
 “Yë'ë Legión hue'equë a'ë.”
 Jaje cani capi, huatiahua'ipi ina jai pai cacani pa'i do'ire. 31 Jaje pa'ijë huatiahua'ipi Jesure se'ie. Jëjo saoma'ë pa'ijë'ë, nejo hue'ñare pana cajë. 32 Coa sесе quë'rona jëjo saojë'ë, yëquëre cahuë, ai cutihuëre jai pai sесе nëjje aicohua'ina. Cajëna, Jesupi de'oji, sehuouna. 33 Paite pa'isicohua'ipi etani sesena cacahuë. Cacajëna, sесе jai hua'que tëtëpapi tomejë jairana dutu jujuhuë.

³⁴Jā maca it̄i sesere ñacaicohua'ipi ña quēquējē huē'huēni p̄ai darina cui'ne yequē huē'ñana it̄i yo'ose'ere quēahuē. ³⁵Quēarena, paipi ñañu'u cajē saē'ē. Saijē Jesús pa'i huē'ñana t̄i'ajē ñajēna, huati quē'i pa'isiquēpi i quēno macare ju'i c̄a suñasiquēpi dahuēre pa'ipi yo'oma'quēpi ñuji'i. Ñu'ina, ñani ai ca'rahuē. ³⁶Jā maca it̄i ñasicohua'ipi daripēpi daisicohua'ire quēahuē, huati quē'i pa'isiquēni Jesupi jujuse'ere, nuñere cuasaquēre. ³⁷Jare asani Gadara yeja paipi si'ahua'i in̄i ai ca'ra do'ire seī'ē. Saijē'ē. Ìño pa'ima'ē pa'ijjē'ē cajē. Jaje cajēna, asani Jesupi jai yohuēna aya mēni saji'i. ³⁸Saina, it̄i huatire eto sao cuañosiquēpi sajē'ē yē'ēreje caquē seji'i. Seina, Jesupi ite p̄ējē'ē, cani capi: ³⁹“Co'ijjē'ē, mē'ē huē'ena. Co'ini si'aye mē'ēre Maija'quē ne de'huase'ere quēajjē'ē.”

Jaje caēna, sani si'a daripē cu'i quēapi, Jesús ite ne de'huase'ere.

Jairo Mamaco Cui'ne Jesús Cañare Patoco

(Mt. 9.18-26; Mr. 5.21-43)

⁴⁰Jaje Jesús jaira je te'tepi co'ina, si'ahua'i ite utejē pa'isicohua'ipi sihuajē p̄epahuē. ⁴¹Pēpa maca Jairo hue'equēpi p̄ai ts'i'si huē'ere ñacaicohua'i ējaēpi t̄it̄api. T̄it̄ani Jesús quēo yē'quē maca do're ja'rūni yē'ē huē'ena daijē'ē, caquē seji'i. ⁴²Te'o macare mamacore paquēni, doce ometēca pacopi, juni huesē t̄ejiconā. Sequēna, jujucaijā'quē Jesupi j̄arona saji'i. Saina, jai p̄ai con̄i qui'yerepa saē'ē. ⁴³Saquēna, saru dahuē ju'icopi ai yo'oco paco'ē, tsieje t̄ēcama'ona doce ometēca. Jaje pa'ioipi jujucohua'ini juju cuañosi'i caco si'aye io curi saio sao. Jaje yo'otoje jujuye peopi. ⁴⁴Jaje ai yo'ocopi Jesure tsiojani tuni i ju'i c̄ana patocona, jare it̄i macapi tsie t̄ēcapi.

⁴⁵Jaje patocona, Jesupi seji'i:

“¿Nepi yē'ēre patore'ni?”

Caquēna, si'ahua'i cahuē:

“Pahuē, patoye.”

Cajēna, Pedro cui'ne i cajeohua'i con̄i cahuē:

“Ye'yaquē, jai p̄ai si'a te'ñapi jē'lejēna, ñaquēta'a sequē'ni, ¿nepi yē'ēre patore'ni?”

⁴⁶Cajēna, Jesupi capi:

“Asayē, yē'ē tutupi yē'ēre patosicore jujuse'ere.”

⁴⁷Jā maca tsoe co'yasico pa'io yahue yo'ose'e peoquēna, tsoe asapi caco ca'raco tsa'sico dani do're ja'rūni Jesús quēo yē'quē macapi quēao, si'ahua'i ñajēna, io cuasani yo'ose'ere cui'ne io pato macapi esa co'yase'ere. ⁴⁸Quēa maca Jesupi capi:

“Huau, mē'ēpi jujuja'quē api cuasani yo'osi do'ipi jujusico pa'iyē, mē'ē. Señaco de'oye saijē'ē.”

⁴⁹Jā yē'ta'a Jesús cocare caquēna, Jairo huē'epi dani t̄itaquē Jairore capi:

“Mē'ē mamaco tsoe ju'co'ē. Ye'yaquēre ai jerepa josa yo'oma'ē.”

⁵⁰Caquēna, Jesupi asani capi, Jairore:

“Quëquëma'ë pa'ijj'ë. Yë'ëpi jujuja'quë api caquë utej'ë. Jaje cuasaquë utequëna, më'ë mamaco co'yasico pasio.”

⁵¹Huë'ena t'iasi maca te'ireje coñe papi, i caca huë'ña. Coa Pedro, Jacobo, Juan cui'ne tsihua'o pëca ja'quë cui'ne pëca ja'co jaohua'ise'e cacahuë, i ja're coni. ⁵²Si'ahua'i oë'ë, co'a juë'ë, ìoni cuasajë. Jaje oijëna, Jesupi capi, jaohua'ire: “Oima'pë pa'ijj'ë. Tsihua'o ju'ima'o paco'ë. Coa caico.”

⁵³Caquëna, tsoe ju'isiconi caji cajë i cayere cue'cuejë sohuë. ⁵⁴Ja maca Jesupi ju'isico jëtëna tseani capi:

“Tsihua'o huëijj'ë.”

⁵⁵Jaje caquëna, iti macapi pa'i huëo cui'naopi, nëcaco. Nëcaco, ja maca Jesús aore aojj'ë cuañepi. ⁵⁶Pëca ja'quëohua'ipi ai cuasahuë, iti yo'ose'ere. Ja maca Jesupi cuañepi, iye yo'ose'e yecohua'ire ti quëama'pë pa'ijj'ë, caquë.

Jesús Jëjo Saoye I Ye'yacohua'ire

(Mt. 10.5-15; Mr. 6.7-13)

9 ¹Jesupi i doce ye'yacohua'ire tsi'soni isipi, i tuture cuañecohua'i pa'ijajë coa si'aye tiñe pa'i co'a joñoare eto saojë cui'ne ju'icohua'ire jujujë yo'o ja'ñere. ²Maija'quë cuañe te'tena cacani pa'yere quëaja'cohua'ini cui'ne si'a ju'iñere jujucaija'cohua'ini jëjo saopi. ³Jaje jëjo saokuë capi:

“Tupë, turupë ao, curiquë sama'pë pa'ijj'ë. Ma'a sajë te'e ju'i ca sajë'ë, cayaye sama'pë, peojë saijj'ë. ⁴Te'e daripë yo'oye pa'ina, te'e huë'ena pëajj'ë, mësarute sihuacohua'i pa'ito. ⁵Yeque mësaruni cocohua'i pa'ito etani saijjë ya'o si'si pa'yere ti'to tojj'ë. Jaje yo'ojë japi iñoñe pa'iji, iohua'ire sañope Maija'quë yo'o ja'ñere.”

⁶Jaje caëna, etani sateña, si'a huë'ña pai pa'i huë'ñana, huaso cocare quëajë cui'ne ju'icohua'ini jujujë.

Juan Ti Doquëre Huaiye

(Mt. 14.1-12; Mr. 6.14-29)

⁷⁻⁸Jaje Jesús yo'oquëna, yecohua'ipi Juan huëisiquëpi huëni yo'o'ji, cajëna, cui'ne yecohua'ipi Maija'quë jëjo daoquë Elíaspi ñaipi cahuë. Cajëna, yecohua'ipi ai tsoe Maija'quë jëjo daoquë pa'isiquëpi huëni yo'o'ji, cahuë. Jaje cajëna, Galilea ëjaë Herodespi asaquë cui'na ja'yese'e cuasa huesëpi. ⁹Jaje pa'iquëta'a Herodespi capi:

“Yë'ëpi Juan siopëre yëto tējajj'ë caquë cuañehuë. Jaje pa'ito ¿iqueipi jaiye co'amaña yo'oquërepa pa'ina, cajëna, asaye'ni?”

Jaje pa'ina, Jerodespi ite ñasi'i caquë yo'opi.

Cinco Mil Ëmëohua'ire Aõe

(Mt. 14.13-21; Mr. 6.30-44; Jn. 6.1-14)

¹⁰I jëjo saosicohua'ipi co'ini Jesure quëahuë, iohua'i yo'orojaise'ere. Quëa tējijëna, ja jeteyo'je sai sapi, jaohua'ire, pai peo huë'ñana, Betsaida

daripë què'rona. ¹¹Jaje saicohua'ita'are paipi asani tuè'è. Tuijèna, Jesús sihuaquè pèpani Maija'què te'te ayere quèani cui'ne ju'icohua'ire jujupi.

¹²Neato de'o huèoquèna, ì doce ye'yacohua'ipi tsio dani Jesure cahuè: "Ja'ye huè'ña pa'i huè'ña ìno ti peoji. Paire quèajè'è, saijajè, sani huajèjajè, cui'ne paì daripèna sani ao hueroni aijajè."

¹³Jaje cajèna, Jesupi capi:

"Mèsarupi aøjè'è, jaohua'ire."

Caquèna, ìohua'ipi sehuohuè:

"Coa cinco pan pèa cui'ne caya tsiaya hua'ire pare payè. Jaje pa'ina, si'ahua'ire aone cani sani hueroyese'e pa'iji."

¹⁴Cinco mil èmèohua'i paè'è. Jaje pa'ijèta'are Jesupi ì ye'yacohua'ire capi:

"Cincuenta paìse'ere te'e macana ño'e saojè'è. Jare ja soçohua'ise'ere si'ahua'ire huahuejè'è."

¹⁵Ì case'ejè yo'ojèna, si'ahua'i ja'ru sahuè. ¹⁶Ja maca Jesús cinco pan cui'ne caya tsiaya hua'ire imani ma'tèmona ñaquè de'oji iye mè'è isise'e payè caquè Maija'quèrè pèpapi. Pèpani jè'yeni ì ye'yacohua'ina isipi, paire aøjè'è caquè. Ja maca jaohua'ipi paire aohuè. ¹⁷Si'ahua'i ìohua'i yèse'ere ti'asicohua'i paè'è. Anì tējisi jeteyo'je ìti nèase'ere doce do'rohuèa aya timèhuè.

Pedropi Jesús Ayere Caye

(Mt. 16.13-19; Mr. 8.27-29)

¹⁸Yequè mu'se Jesús te'ipi Maija'quèrè seji'i, paì peo huè'ñana. Seina, ì ye'yacohua'i datena, seji'i, jaohua'ire:

"¿Iqueipi caye'ni, paì yè'ère?"

¹⁹Caquèna, ìohua'ipi sehuohuè:

"Yecohua'ipi cayè, mè'ère Juan oco doquè api. Yecohua'ipi Elíaspi cayè. Yecohua'ipi mè'ère cayè, ai tsoe Maija'què jèjo daoquè pa'isiquèpi huèji'i."

²⁰Jaje cajèna, seji'i, ìohua'ini:

"¿Cui'ne mèsaruta'a yè'ère iqueipi caye'ni?"

Caquèna, Pedropi capi:

"Mè'è cato Cristo, maire huasoquè, Maija'què tsequèrè pa'è."

Jesupi Capi, Ju'ija'què A'è

(Mt. 16.20-28; Mr. 8.30-9.1)

²¹Jaje asajèna, Jesupi jaohua'ire ai cuañepi: Quèama'pè pa'ijè'è, yecohua'ire caquè, ²²cani capi, jaohua'ire:

"Paì Mamaquè ai yo'oja'què api, aiohua'i, Maija'què huè'e ñacaicohua'i èjaohua'ijè, cuañese'e ye'yacohua'ijè yè'ère coejè huani jeoja'cohua'i a'è. Jaje yo'osiquèta'a toaso mu'seña pa'i maca huèija'què api."

²³Ja jeteyo'je si'ahua'ire capi:

"Paipi yè'ère tuiye yèni jeoñe pa'iji, ìohua'i yè'è tse a'è cuasase'ere, yè'èse'e cuasase'ere. Jeoni yè'ère tuiye pa'iji, si'a mu'seña ai yo'oye pa'itoje. ²⁴Jaje pa'ina,

ἰ pa'iyere de'oye pasi'i cuasaquë pani, coa ne huesoye pa'iji. Jaje pa'ina, yë'ë do'ire ἰ pa'iyere ne huesosiquëpi jaëpi huasosiquë pasipi. ²⁵ ¿Te'ipi yo'onni si'aye iye yeja co'amañare hueroni paquëpi ja yë'ta'a ἰ joyo ise'le ne huesëquëna, pa'ito de'oquë? ²⁶ Jaje pa'ina, yë'ë mamire cui'ne yë'ë cocare asaquëta'a paini ca'raquë yë'ë yo'oye ayere quëama'ë pa'isiquëre cui'ne iteje yë'ë Pai Mamaquëpi ëjaë de'onni, ja'quë pa'iyepi cui'ne huñnaohua'i conni dai maca ca'raja'quë a'ë, ja'quëna quëayerere. ²⁷ Jaje nuñerepa cayë. Iye maca pa'icohua'ipi Maija'quë te'te ayere ñama'pë paja'cohua'i a'ë. Maija'quë te'te ayepi daina, ñajëna, jeteyo'je ju'iñe pa'iji.”

Jesús Tiñe Pa'i Pönëse'e

(Mt. 17.1-8; Mr. 9.2-8)

²⁸ Iye case'e pa'i maca ocho mu'se jeteyo'je Jesupi saji'i, ai cutihuëna Maija'quëre sesi'i caquë. Saina, conni saë'ë, Pedro, Jacobo cui'ne Juan. ²⁹ Ja maca sani Jesupi Maija'quëre ja sei tiñe pa'i tsiarepa pönëpi, cui'ne ἰ ju'i caje ai miacore papi ña ti'añe peocorepa pönëpi. ³⁰ Pönë maca Jesuje pa'iohua'ipi ñaini caya hua'i so'oja'a miañerepa nëcajë Jesús ja're cocare cahuë. Jaohua'i cato Moisés cui'ne Elías paë'ë. ³¹ Jesús Jerusalénna sani ai yo'oquë ju'i ja'ñere cahuë. ³² Ja maca ai huëo ca'añe Pedrore cui'ne ἰ cajeohua'ire nëise'epi peo hue'ñarepa tomeina, sëtasicohua'ipi ñahuë, Jesús irepa pa'iyere, cui'ne cayahua'i ἰ ja're nëcajëna. ³³ Ja maca Jesús quëno maca pa'isicohua'i jeo saijëna, Pedropi capi:

“Ye'yaquë, iño pëato de'o'ji. Toaso huë'ña ne'ñe pa'io; më'ë huë'e, Moisés huë'e, cui'ne Elías huë'e.”

Jaje caquëta'a Pedro coa huesë capi, cuasama'ë. ³⁴ Jaje ja yë'ta'a caquëna, siriopi nëca meni sjo huesopi. Sjo huesoquëna, ai quëquëhuë, siriio sa'nahuëre pa'ijë. ³⁵ Jaje pa'ijëna, siriopi yë'ose'e caye asahuë:

“Iquë yë'ë mamaquë yë'ë oiquëre papi ἰ cayere asajë'ë.”

³⁶ Jaje casi jeteyo'je ñajëna, te'i Jesuse'e paji'i. Pa'ina, ñani jaohua'i ti cama'cohua'i jo'cua paë'ë. Cui'ne yecohua'ireje iohua'i ñase'e ti quëama'pë paë'ë.

Jesupi Huatire Eto Saoye

(Mt. 17.14-21; Mr. 9.14-29)

³⁷ Se ñatasi mu'se ai cutihuëpi cajejëna, jai pai Jesure sañope ti'ahuë. ³⁸ Ja maca pai jopo aquëpi te'i tutu capi:

“Ye'yaquë, ñacajj'ë, care payë yë'ë mamaquë te'i macapi. ³⁹ Huatire hue'equëna, jaëpi josa yo'oquëna, cui'ne cuiquë yo'o'ji, cui'ne hue'hue nequëna, yë'opoj'a siri etoquë yo'o'ji, co'aye yo'oquë ti jeoñe coeji, ite. ⁴⁰ Tsoe më'ë ye'yacohua'ire sei'ë, huatire eto saojë'ë caquë. Jaje caëna, coa yo'o jujahuë.”

⁴¹ Caquëna, Jesupi asani ἰ ye'yacohua'ire capi:

“Maija'quë necaiquë api cuasama'cohua'ipi tiñere cuasacohua'i. ¿Je yëhuarepa tsoe mësaru ja're conì pa'i yo'oquëna, ñani Maija'quëpi nequë api cuasaja'cohua'i a'ni, mësaru? Jaje cani dajë'ë, më'ë mamaquëre ìñona.”

42 Jaje caëna, tsihua'ëpi ì quë'rona ja'ye tsiojaina, huatipi yeque hue'hue ne coquëna, taji'i, yejana. Jaje yo'oquëna, Jesupi huatire yo'oma'ë cani eto saoni tsihua'ëre jujuni pëca ja'quëna isipi. 43 Ja maca si'a paì ai cuasahuë, Maija'quë jaiye yo'oyere ñani.

Tijupë Jesús Capi, ì Ju'iñe Ayere

(Mt. 17.22-23; Mr. 9.30-32)

Cui'ne si'ahua'i Jesús yo'ose'ere ñani ai cuasajëna, Jesupi ì ye'yacohua'ire capi:

44 “De'oye asajë'ë, iyere. Huañeyema'pë pa'ijë'ë. Yë'ëre Paì Mamaquëre paì jëñana isiye pa'iji. Jaje pa'ina, ìohua'i yëyeje yo'oja'cohua'i a'ë, yë'ëre.”

45 Jaje caquëna, ì ye'yacohua'i ti asa ti'añe pahuë, ì caye. Jare jaje asaye pajajë ìpi cuasaye sëte. Jaje pa'ina, ìohua'i ca'racohua'ipi seni asaye pahuë, ì case'ere.

Nepi Jerepa Do'i Pa'iquë

(Mt. 18.1-5; Mr. 9.33-37)

46 Ja maca ì ye'yacohua'i sa'ñe cahuë, ìohua'ija'a nepi airepa pa'iohua'i pa'iohua'i a'ni, cajë. 47 Jaje cuasajëna, Jesupi ìohua'i cuasaye asani ja maca tsihua'ëre ì quë'rona dani nëcopi. 48 Dani jaohua'ire capi:

“Iquë tsihua'ëre yë'ë mamipi cuasajë ñacaini yë'ëni ñacaiyë. Cui'ne yë'ëre ñacaicohua'i pani yë'ëre jëjo daosiquëreje cui'ne ñacaiyë. Jaje pa'ina, iti mësaru aquëpi yecohua'ire ai jerepa ñacaiquë pani ai jerepa pa'ì pa'ija'quë api.”

Sañope Yo'oma'quë Caye Ayere

(Mr. 9.38-40)

49 Caquëna, Juan capi, ìte:

“Ye'yaquë, yëquë te'i ëmë më'ë mamipi caquë huatire eto saoquëre yo'oma'ë pa'ijë'ë cajë ësehuë, yëquë ja're conì cu'ima' do'ire.”

50 Caquëna, Jesupi capi:

“¿Me neñu'ju ësereni? Maire sañope cama'quë pani mai yo'oye yo'ocohua'i a'ë.”

Que Joyo Pa'iquë

51 Jesús ma'tëmo mëiñe ti'añe ja'i maca pa'ina, Jerusalënna sai huëoni saji'i, ì cuasa nëose'ere yo'osi'i caquë. 52 Saija'quëpi jëjo saopi, ì du'ru sani ì pëajato co'aja'cohua'ire, Samaria paì quë'rona. 53 Jaje pa'iquëta'are Jerusalënna saiye nëina, Samaria paì coehuë, pëa hue'ña isiye. 54 Ja maca jaje ësejëna, asani ì ye'yacohua'i Juan cui'ne Jacobo cahuë:

“Ëjaë, yëquë mè'ë jaohua'ire toapi cuañerena, ma'tëmopi tōmeni peo hue'ñarepa ëo huesoye. Tsoe Maija'quë jëjo daoquë Elías yo'oquë pa'ise'leje yo'oñu'u.”

55 Jaje cajëna, Jesús ñani jaohua'i case'ere coequë sañope capi:

“¿Ique joyore hue'eye'ni, mësarü? 56 Yë'ë Pai Mamaquë cato daima'ë pají'i, pai joñoare nejosi'i caquë. Coa ai jerepa pāini huasosi'i caquë daë'ë.”

Jaje cani jëoni yequë pai pa'i hue'ñana saë'ë.

Jesús Pe'teye Yëcohua'i Ayere Quëaye

(Mt. 8.19-22)

57 Ma'aja'a jaohua'i saijëna, te'li ëmë Jesure capi:

“Ëjaë, mè'ë ja're coní saie yëyë. Coa si'a hue'ña mè'ë saitoje.”

58 Jesupi sehuopi:

“Airo jo'ya mañaje coña pacohua'i a'ë cui'ne pi'a mañaje tsiaro pacohua'i a'ë. Pai Mamaquë cato ti peoquë api, i sïopë tëo paquë ui mañaque.”

59 Jesupi yequëre capi:

“Yë'ëre tuijë'ë.”

Jaje caquëna, ipi capi:

“Ëjaë, utejë'ë. Yë'ëta'a du'ru ja'quëre tajasi'i.”

60 Jesupi sehuopi:

“Yë'ëre cuasama'cohua'i ju'isicohua'ije pa'iohua'i pa'iyë. Jaohua'ipi cui'neje ju'isicohua'ini tajajë. Më'ë cato daijë'ë, Maija'quë pa'iyere yecohua'ire quëaja'quëpi.”

61 Ja maca yequëpi capi:

“Ëjaë, tuiye yëyë. Utejë'ë. Du'ru macarepa yë'ëta'a huë'e pa'icohua'ire pëpa tējisi'i.”

62 Jesupi ite capi:

“Yë'ë co'amañare ne huëosiquëpi, jaiye yeque yo'oyere cuasaquë yo'oquë pani yë'ë co'amaña ne tijañe peoji.”

Jesupi Setentare Jëjo Saoye

10 1 Jaje iye yo'osi jeteyo'je setenta pa'iohua'ini i saija'a daripëana du'ru jëjo saopi, cayaohua'ise'ere, ipi ñaquë sahuasicohua'ini.

2 Jëjo saoque capi, jaohua'ire:

“Nuñerepa cayë. Tëa ja'ñe cato jaiye a'ë. Jaje pa'iquëta'are iti necohua'ipi a'ri maña pa'iyë. Jaje pa'ina, sejë'ë, iti tse aquëni jai paire jëjo saojaquë neja'cohua'ire. 3 Ñajë saijë'ë. Mësarute jëjo saoyë, yëi ñamaje pa'iohua'ini yaije pa'iohua'i jopona. 4 Sama'pë pa'ijë'ë, curi topëje, cai topëje, cui'ne curiquëje, cui'ne zapatoje, cui'ne ma'aja'a saijë pai pa'icohua'i pa'ito coa sa pëpajë saijë'ë, tsoe nëcājani caye peoye. 5 Huë'ena cacacohua'i pani du'ru macarepa ñeje cajë'ë: 'Iye huë'e pa'icohua'ire

de'oye pa'iyepi pa'ijë'ë.' 6 Jaje pëpajëna, jaohua'ipi de'oye pa'iyere oicohua'li pa'ito mësaru pëpase'epi iohua'ini pa'ija'coa. De'oye pa'iyere oima'cohua'li pa'ito ja pëpase'epi mësaruna co'i çosipi. 7 Du'ru pëpasi huë'ena cacani pëani iohua'li aonere aijë cui'ne ucujë pa'ijë'ë. Co'amaña necohua'ire sëte iohua'ipi sañje pa'ye cocaiyepi pa'ijë'ë. Jaje pa'ina, huë'ña ñape cu'ima'pë pa'ijë'ë.

8 Pa'i daripëna ti'arena, jaro aquëpi i huë'ena pëpasiquëpi aore aoto aijë'ë. 9 Jarore ju'icohua'li pa'ito jujucijë'ë. Cui'ne quëajë'ë, Maija'quë cuañe të'tena mësarupi ponëne ja'yere pa'iji cajë. 10 Jaje pa'iquëta'are yequë hue'ña daripë pa'icohua'ipi mësarute coeto iti daripë ma'añana etani cajë'ë: 11 'Mësaru daripë ya'opi yëquë quëona së'ase'ere ti'to toñë, mësaru asaye yëma'pë pa'i do'ire iñojë.' De'hua cuasajë'ë, iyere, Maija'quë pa'i të'tena ja'yere pa'iji, mësarute. 12 Mësarute cayë, pa'i ñape yo'ose'e ne de'hua mu'se ti'asi maca jaohua'li co'aye yo'ose'e sañje pasipi. Sodoma daripë acohua'ire yo'ose'e jerepa co'ayepi.

Sehuoma'cohua'li

(Mt. 11.20-24)

13 Teayerepa më'ë Corazín daripë maca cui'ne Betsaida daripë. Jaiye pa'i yo'o ti'a ma'ñere yo'otojë coa ñahuë, më'ë. Jaro yo'ose'eje pa'ye Tirona cui'ne Sidón daripëna yo'okuëna, ñasicohua'li pani tsoe otira'huë. Iohua'li co'ayere cuasajë ai ju'li çare suñani huatapi jorëjë ai oiyere iñora'huë. 14 Jaje pa'iquëta'are pa'i ñape yo'ose'e mu'se ti'asi maca mësarupi ai jerepa co'aye yo'osi do'ire sai cuañoñe pa'iji. Tiro cui'ne Sidón daripëna pa'icohua'li seña maca. 15 Cui'ne mësaru Capernaum daripë pa'icohua'li yëquëpi ai jerepa tëto saiscohua'li a'ë ma'tëmo quë'rore pana cuasayë, mësaru. Pani mësaru cato coa ai jerepa huë'ehuëre pana cajë huesëja'cohua'li a'ë, toa yejana.

16 Mësaru cayere asacohua'li pani yë'ëni asaja'cohua'li a'ë, cui'ne mësaruni coecohua'li pani yë'ëni coeja'cohua'li a'ë, cui'ne yë'ëni coecohua'li pani yë'ëre jëjo daosiquëni coeyë."

Setenta Jëjo Saosicohua'ipi Co'iyë

17 Jaohua'li setenta pa'iohua'li ai sihuayë. Co'ini cahuë:

"Ëjaë, huatiohua'lique yëquë më'ë mamire cajëna, asajë ca'rajë etahuë."

18 Jesupi capi, jaohua'ire:

"Jaje pa'ijë'ë. Yë'ëje ñahuë, huati ëjaëpi ma'tëmopi mujuë ye'hueyeje pa'yerepa tomequëna. 19 Yë'ëpi mësarute tutu isihuë, añañe, punire tsa'cujëna, ti a'si neñe peo ja'ñere. Cui'ne maire sañope yo'okuë tutu jerepa isihuë, quëcoja'cohua'ire caquë. 20 Jaje pa'iquëta'are sihuama'pë pa'ijë'ë, huatiohua'li mësarute sehuoyere. Coa ai jerepa mësaru mami ma'tëmöre toyase'e pa'iyere sihuajë'ë."

Jesús Sihuyae
(Mt. 11.25-27; 13.16-17)

21 **J**a maca Jesús Maija'quë joyopi i ja're pa'iyë sëte ai sihuaquë capi: "Sihuyä, Ja'quë më'ëre ma'tëmo cui'ne yeja Èjaäre. Më'ëpi iyere ñnohuë, tsije pa'iohua'ina më'ëpi ta'ñe cuasajë pa'icohua'ire cui'ne ai asacohua'ire yahuese'ere. Jaje ti'api, më'ë yëyeje."

22 Yë'ë ja'quëpi si'a co'amaña yë'ëna isipi. Maija'quë mamaquë api cajë pai ña'ne pa'ñë. Coa ja'quëse'le asaji, i mamaquëre. Ja'quëreje pai ña'ne pa'ñë. Coa mamaquëse'le asaji, ite. Jaje asaquë i mamaquëpi i yëcohua'ina ñnochohua'ise'le asayë, i pa'iyë. 23 **J**a maca i ye'yacohua'ise'ere capi:

"Mësarü ña'neje ñacohua'ipi sihuacohua'i a'ë. 24 Jaje pa'ina, cayë, mësarute. Jai pai Maija'quë yo'lo ja'ñere quëcaicohua'i cui'ne pai ëjaohua'i mësarü ña'neje pa'ye ña'ne yëhuë. Jaje yëjëta'a ñama'pë paë'ë. Cui'ne asaye yëhuë, mësarü asayeje pa'yere. Jaje yëjëta'a asaye pa'huë."

De'loquërepa Samaria Aquëpi

25 **J**a maca cuañese'le ye'yaquëpi huëni Jesús quë'rona i ja're coca caquë, neñasi'i cuasaquë sani seji'i:

"¿Ye'yaquë, me neja'quë a'ni, ti pa'iyë ti'ña'ne cani?"

26 Jesupi sehuopi:

"¿Iti cuañese'ere ñato me pa'iquë'ni, më'ëpi asato?"

27 Caquëna, cuañese'le ye'yaquëpi sehuopi:

"Oijë'ë, më'ë Èjaë Diusure si'a më'ë yëyepi, si'a më'ë joyo, si'a më'ë tutu, cui'ne si'a më'ë cuasaye. Cui'ne oijë'ë, më'ë quëno maca aquëre më'ëja'a co'ye oiyëje pa'ye."

28 Caquëna, ja maca Jesupi capi:

"Ite de'oyerepa sehuohuë, më'ë. Jaje më'ë yo'oque pani, ti pa'iyë ti'aja'quë a'ë."

29 Jaje caquëna, cuañese'le ye'yaquëpi de'oye yo'oque a'ë caquë Jesure ñnos'i caquë sa'nope seji'i:

"¿Jaje pa'ito ne a'ni, yë'ë quëno maca pa'iquë?"

30 Caquëna, Jesupi sehuopi ite:

"Te'i pai Jerusalénpi ma'aja'a Jericóna mejli'i. Meina, co'amaña ñacohua'ipi tseani si'aye i paye cui'ne i ju'li caje jiuhuë. Ai t'ë'carena, ju'ise'ëje pa'i uina, jeoni saë'ë. 31 Cui'na ma'aja'a judío Maija'quë huë're ñacaiquë saiquëpi ma'are uina, ñani coa ñaquë sa saji'i. 32 Cui'ne iti ma'aja'a levita sai coa ñani saji'i.

33 Jaje sai sitore Samaria pai coecohua'i aquëpi cui'ne ma'aja'a sai teaye ñani.

34 **J**a maca tsojani a'sire hui'yape ocopi cui'ne o'sayepi tsoani ca'napa huëni jujupi. Jeteyol'je i caballona tëoni sapi, saicohua'i pëa huë'ena. 35 Se ñatasi mu'se Samaria aquëpi sai huëoni caya curiquë t'ë'ña isipi, iti huë'le aquëre. Isiquë capi: 'De'hua ñacaijë'ë, iquëre. Më'ëpi ai jerepa i do'ire necaisiquë pa'itoje yë'ëpi saisi'i

cui'naëpi co'li cosi maca.' ³⁶De'oji. Jaje pa'ito: ¿Toasocohua'i aquë jequë paquë'ni, ñahua'i huani oani saisiquë quëno maca aquë ite oisiquë, mël'ëpi cuasato?"

³⁷Caquëna, cuañese'e ye'yaquëpi capi:

"Ite ñani oi necaisiquë api cuasayë."

Caquëna, ja maca Jesupi capi, ite:

"Mël'ëje cui'ne sani yo'oquë pa'ijë'ë."

Jesupi Marta Cui'ne María Hu'ere Pa'iyë

³⁸Jesús ma'aja'a saiquëpi tì'api, a'ri daripëna. Jarote cui'ne paco'ë, Marta hue'ecopi. Jaopi io huë'ena pëpao, ite, cui'ne i ye'yacohua'ijë.

³⁹Cui'ne paco'ë, Marta yo'jeo María hue'ecoje. Jaopi Jesús quëo yë'quë macana ja'runi ñu'io asao, i cayere. ⁴⁰Asacona, Martapi jaiye huë'e co'amaña neñe pa'ina, ñani ai cuasa huesëco Jesús quë'rona tsio dani cao:

"¿Ejaë, yë'ëse'e necona, yë'ë yo'jeo coa ñu'ico ñaquë, mël'ë? Jaje pa'ina, cayë iote cajë'ë, yë'ëre sani cocaija'co."

⁴¹Jaje cacona, Jesupi sehuopi:

"Marta, Marta mël'ë jaiye neñere co'a ju'io, cui'ne ai cuasaco. ⁴²Jaje pa'iquëta'are te'lo pa'iji nuñerepa cocaiye. Jare María tì'ao, yecohua'ijë jioye ti peoyere."

Jesupi Ye'yapi, Maija'quëre Señe

(Mt. 6.9-15; 7.7-11)

11 ¹Tijupë Jesús Maija'quëre seni tējisi maca i ye'yacohua'i aquëpi capi, ite. Ejaë, ye'yajë'ë, Maija'quëre señe, Juan i ye'yacohua'ire ye'yaquë pa'ise'eje.

²Caquëna, Jesupi sehuopi:

"Secohua'i pani ñeje cajë'ë:

Yëquë Ja'quë ma'tëmo pa'iquë,

Mël'ë mami de'oyere pa'ë.

Mël'ë cuañeñe daijaquë yëquëna,

Mël'ë yëyepi yo'oye pa'ija'quë, iye yejaje, ma'tëmo yo'oyeje pa'ye.

³Iye mu'se ai ja'ñere isijë'ë, caraye peoye.

⁴Yecohua'ipi yëquëni do'li pajëna, sai de'huacaiyeje pa'ye mël'ëpi yëquë do'ire sai de'huacaijë'ë.

Neñañe pa'ito mël'ëpi co'ayere nejocaijë'ë."

⁵Jesupi capi, jaohua'ire:

"Mësarü aquëpi te'ire i cajeire paquëni jaëpi ñami jopo i huë'ena dani caji, ite:

'Cajei, toaso ao isijë'ë, co'yoja'quë a'ë.' ⁶Yë'ë cajeipi yure titaëna, aoñepi peoquëna, cayë, caji. ⁷Caquëna, tu'rihuëpi de sehuoquë casipi: 'Josa da cayë. Eta sa'ro sjosicoa.

Jere mël'ëre isisi'quë coa huëiyë'ni, tsi ja're uini.' ⁸Jaje casiquëta'a cajei pa'isi do'ire huëni isiye papi, coa josa jerepa sema'quëni caquë huëni isipi, si'aye ite carase'ere.

⁹Jaje pa'ina, yë'ëpi cayë, mësarute: Sejë'ë. Maija'quëpi isija'quë api. Co'ejë

tì'aja'cohua'i a'è. Eta sa'rona tè'cajèna, hui'yosipi. ¹⁰Jaje pa'ina, sequèpi ìsi cuañoñe pa'iji. Cui'ne co'equèpi tì'añe pa'iji. Cui'ne eta sa'rona tè'caquèni hui'yocaiye pa'iji.

¹¹Mamaquèpi panre seina, quèna père ìsi'ñe pa'i a'è mèsaru aquè je'què mamaquère çpanita'a hua'ire seina, añani a'o'ñe pa'i a'è? ¹²¿Panita'a tsiapère seina, punini a'o'ñe pa'i a'è? Pani. ¹³Ñajè'è. Mèsaru co'acohua'ita'a mamajère oijè de'oyere ìsicohua'i a'è. Jaje pa'iyè sète mèsaru Ja'què ai jerepa oiquè sète ì de'o joyore pañu'u cajè secohua'ire ìsija'què api."

Jesupi Huati Tutupi Yo'oji, Coa Caye

(Mt. 12.22-30; Mr. 3.20-27)

¹⁴Yequè mu'seña huatipi coca cama'quère nesiquèni Jesupi huatire eto sauna, coca capi, cama'què pa'isiquèpi caquèna, ñajè jai paì ai cuasahuè, merepa yo'o u'ni iye cajè. ¹⁵Yecohua'ipi cahuè:

"Huatiohua'i èjaè Beelzebú tutupi yo'oji, iquè, huatire eto saokuèna, ñajè."

¹⁶Yecohua'ipi paì yo'o tì'a ma'ñe ma'tèmo ayere yo'o ìñojè'è cajè se'è.

¹⁷Ja secohua'i cuasayere asaquèpi jaohua'ire capi:

"Te'e yeja èjaohua'ipi jopoja'a huasicohua'i pani sa'ñe uihuani co'ye ìohua'i yejare nejoñè. Cui'ne te'e caje tsècapè pa'isicohua'ipi hua saisicohua'i pani sañope yo'ojè ìohua'ija'a peo hue'ña ne huesèyè.

¹⁸Satanáspi ì tsècapèni sañope yo'oquè pani çme si'aohua'i cuàne tì'añe pa'iquè'ni? Iye cayè, mèsarupi yè'èni Beelzebú tutupi huatire eto saoji cajèna. ¹⁹Jaje yè'èpi Beelzebú tutupi yo'oquè pa'ito, çnepi mèsarute tuicohua'ire tutu ìsiye'ni, huatiohua'ire eto sao ja'ñe? Jaje pa'ina, ìohua'ini mèsarupi seni asajè'è, quèajajè. ²⁰Jaje pa'iquèta'are yè'è cato Maija'què tuture papi huatire eto saokuè yo'oyè. Jaje pa'ina, yè'è yo'oye cato Maija'què cuàne tètèpi tsoe tìtapi caquè ìñoñe a'è.

²¹Ai tutu què'ipi cui'ñasiquè ì co'amañare de'oye ñaquè pa'ito, yecohua'ije jioye peoji. ²²Jaje pa'iquèta'are yequè ai jerepa tutu què'ipi cacani ìte quèco saoye pa'iji. Ja maca si'aye ì quècoquè uihua ja'ñere pase'e jioni ì tse de'huaye pa'iji, ì pase'ere.

²³Jaje pa'ina, yè'è yo'oyere de'oji cacaima'què cato yè'ère sañope yo'oquè api, cui'ne yè'è ja're te'e tsi'soma'què pani, coa ne tiya saokuè api.

Co'a Joyopi Cui'naona Co'iyè

(Mt. 12.43-45)

²⁴Huatipi paini pa'isiquèpi eta saisiquè pani coa cuène yejañare cu'iji, pèa hue'ñare co'equè. Jaje co'equè tì'ama'è co'isi'i yè'è etani daisi huè'ena cuasaji. ²⁵Cani co'iquè ñaquèna, de'oyerepa yuani ne de'huase'èje pa'ipi pa'iji. ²⁶Pa'ina, ñani sani siete huatiohua'i ì jerepa co'acohua'i ja're çoni cacani cui'naèna, pèasi maca yureta'a ja'nè pa'ise'e seña maca co'aquè pa'ija'què api."

Nuñerepa Sihuaye

²⁷Jesús ja yè'ta'a ìtire caquëna, paì jopopi nomiopi cuiio:

“Mè'ère cōani ai de'huasico ai sihuaco pa'lico.”

²⁸Jaje cacona, ìpi capi:

“Ai jerepa sihuacohua'i pa'iyë, Maija'quë caye asacohua'ipi cui'ne sehuocohua'ipi.”

Co'acohua'ipi Señe, Paì Yo'o Tì'a Ma'ñere

(Mt. 12.38-42; Mr. 8.12)

²⁹Paìpi Jesús quëno macana tsi'sini saijëna, ìpi coca ca huëopi:

“Iye'në paì co'acohua'i a'ë. Jaje pa'iohua'ipi señë, paì yo'o tì'a ma'ñere yo'o ìnojë'ë cajë. Jare setojë Maija'quë yo'o ja'ñere quëacaiquë Jonás yo'oquë pa'ise'eje pa'ye de'oye yo'o ìñoñe pa'iji. Mësaru yëyere ìñoñe peosipi. ³⁰Jonás Nínive daripë paìre Maija'quë case'ere ìnocaiquë pa'iji. Cui'neje pa'isiquëpi yure Paì Mamaquëpi yure pa'icohua'ire ìñoja'quëpi pa'iji. ³¹⁻³²Nínive daripë pa'icohua'ipi paì ñape yo'ose'e ña mu'se huëni iye'në paìre sañope caja'cohua'i a'ë. Jonáspi Maija'quë cocare quëaquëna, asani ja'rë pa'ise'e jeoni ponësi do'ipi. Ìñore yure Jonásre tëto saisiquëpi pa'iji. Paì ñape yo'ose'e ña mu'se pa'i maca iye paìre ìohua'i yo'ose'eje pa'ye saì maca tì'a'ëna, hu'ehuë t'ëte paì ëjaopi huëni nejoñe pa'iji caja'coa. Io so'o yejapi Salomón ta'ñe yo'oye asasi'i caco daisi do'ire. Ìñore Salomón jerepa pa'ipi pa'iji, yure.

Maire Miacaiye

(Mt. 5.15; 6.22-23)

³³Toa tsëoni yahueye peoji, panita'a mahuë sa'nahuëna ayaye peoji. Jaje yo'oye pajë coa ai jerepa ëmëje'ena nëcoyë, daicohua'ire miacaija'coni.

³⁴Capëre ñaco ca miacaiye pa'iji. Jaje pa'ina, mè'ë ñaco capi de'oyere ñaño pa'ito më capëje de'oye miacaisico pa'iji. Jaje pa'iquëta'are mè'ë ñaco capi co'ato si'a mè'ë capëje ai yo'oyere pa'iji. ³⁵De'hua ñajë'ë, mè'ë miaño pa'iyere, neañena ponëma'coni caquë. ³⁶Jaje pa'ina, mè'ë capëpi miaño jopore pa'ito si'aye tiñarepa ñaño pa'iji, neaño peoto. Toa tsëocopi miacaina, ñañoje pa'ye.”

Fariseohua'ire Cui'ne Cuãnese'e Ye'yacohua'ire Sañope Caye

(Mt. 23.1-36; Mr. 12.38-40; Lc. 20.45-47)

³⁷Jesús coca ca t'ëji maca, fariseopi Jesure huëopi, ì huë'ena aō sani aijë'ë caquë.

Huëouna, sani ja'rupi aō aì saihuëna. ³⁸Ja'runa, fariseopi jëña tsoajë'ë aima'në cuãnese'ere yo'oma'aji'i, ñaquë cuasapi. ³⁹Jaje cuasaquëna, Èjaëpi capi, ìte:

“Mësaru fariseo paì cato coa ëmëje'e ucu duruhuëase'e cui'ne quëna ne'ñase'e tsoacohua'i a'ë. Jaje yo'ocohua'ita'a sa'nahuë cato si'sio. Yecohua'i payere yëcohua'ipi cui'ne co'ayepi tìmësicohua'i a'ë. Mësaru cui'ne pa'iyë. ⁴⁰Huesëohua'i, ña ma'ñe ëmëje'e nesiquëpi sa'nahuë

ayeje Maija'quëpi nese'e a'ë. ⁴¹Jaje pa'ina, peocohua'ina isijj'ë, mësaru sa'nahuë payere. Jaje yo'oto si'aye tsoa tose'e pa'lja'coa.

⁴²Teayerepa mësaru fariseo pa'i maña. Mësarupi diez topëa neni te'ore Maija'quëna isiyë, aïñena huëo sëñe nejë aïñere, cui'ne tase'e conì. Jaje de'oye yo'ojëta'a nuñerepa de'oye yo'oyere cui'ne Maija'quë oiyeye pa'ye yo'oyere peocohua'ipi pa'iyë. Jaje pa'ina, iyere yo'oye pa'lji, mësaru tsoe de'oye yo'oyena conì.

⁴³¡Teayerepa mësaru fariseo, pa'i maña! Pa'i tsi'si huë'ñare de'o saire ñu'ijëna, ñajë pa'ipi jerepa pa'iohua'i a'ë cajajë cuasacohua'i a'ë, cui'ne co'amaña huero hue'ñare nëcajëna, jai pa'i iti maca ñacohua'ipi jerepa pa'iohua'i a'ë cajë de'oye pëpajajë cajë, mësaruje teaye yo'ocohua'i a'ë.

⁴⁴Cuañese'e ye'yacohua'i cui'ne fariseo pa'i conì teayerepa coa cacohua'i a'ni, tasi daripëje pa'iohua'ini, pa'i ñama'pë tsa'cuje si'si neñeje yo'oyë.”

⁴⁵Jaje caquëna, cuañese'e ye'yaquëpi ñeje caquë sañope sehuopi: “Ye'yaquë, jaje më'ë canì yëquëreje tea ju'i cayë.”

⁴⁶Jaje caquëna, Jesupi sehuopi:

“Teayerepa mësaruje cuañese'e ye'yacohua'ije yo'oyë. Yecohua'ise'ere dëquë co'amañare hue'ocaiyë. Jaje yo'ojëta'a mësarupi te'e moño macaje se cçaiye coecohua'i a'ë.

⁴⁷Maija'quë yo'o ja'ñere quëacaicohua'ire jare mësaru aiohua'ipi huani jëoni tasi daripëare mësaru teayerepa ne de'huacohua'i a'ë. ⁴⁸Jaje yo'ojë mësaru aipë yo'ose'ere de'oji cuasajë yo'oye ñaño pa'lji, mësarupi iohua'i huani tasi daripëare ne de'huajëna.

⁴⁹Jaje pa'ina, Maija'quë i ta'ñe asayepi capi: ‘Jëjo saojaj'quë a'ë yequë mu'se yo'o ja'ñere ca nëocohua'ire cui'ne sahuani yë'ë coca quëacohua'ire nesicohua'ireje jaohua'ini huani jeajaj'cohua'i a'ë, yecohua'ini coa josa yo'ojë.’ ⁵⁰Jaje pa'ina, yeja de'huasi macapi ite quëacaicohua'ire huaisi do'ire yure pa'i paini Maija'quëpi seja'quë api. ⁵¹Abelre huaisi macapi cui'ne Sacariare huaisi macajaj'a acohua'i do'ire yëi ñamare ëo hue'ñana cui'ne Maija'quëre se huë'ena joporepa. Jaje pa'ina, nuñerepa cayë quëapi, yure pa'i paina seja'quë api, tsie do'ire.

⁵²Teayerepa mësaru cuañese'e ye'yacohua'i nuñerepa cocare yahueyë. Jaje yo'ojë coejë yecohua'i asañu'u cajë yëcohua'ireje ësejë sañope yo'oyë, mësarupi.”

⁵³Ñeje Jesús caquëna, asani cuañese'e ye'yacohua'i cui'ne fariseohua'i ai pëtitei'ë. Jaje pa'ljé jaiye se huëohuë. ⁵⁴Sejëna, tayo sehuouna, ñani tseañu'u, co'aquë api cajajë cuasajë.

Coa Cayere Sañope Yëhuoye

12 ¹Jai pa'i mil jerepa te'e macana tsi'sini airepa timëni sa'ñe ju'ajë yo'ohuë. Yo'ojëna, Jesupi i ye'yacohua'ini du'ru macarepa ca huëopi, ñeje:

“De'hua ñajë'ë, fariseohua'i porere. Jaje canì capi fariseohua'i coa cajë yo'oyere ye'yema'pë pa'ljé'ë caquë. ²Jaje pa'ina, asama'pëna yo'ose'ere tija

ja'ñe a'ë cui'ne yahue yo'ose'ere, asa ja'ñe a'ë. ³Jaje pa'ina, mësaru nea hue'ña yo'ose'ere mu'sepi asaja'cohua'i a'ë, cui'ne yahurepa tu'rihuëna sioni case'ere huë'e sa'nihuëpi nëcajè cui ja'ñe a'ë, pa'i asa hue'ñana.

Neni Mai Ca'raye Pa'iquè'ni

(Mt. 10.28-31)

⁴Jaje pa'ina, cayè, mësarute. Capè huaicohua'ire ca'rama'pè pa'ijè'ë. Jaohua'i cato jerepa yo'oye peoyè. ⁵Jaje pa'ina, quèasi'i. Ca'rajè'ë, huani jèosi jeteyo'je toa yejana jèjo saoquëni. Jaje pa'ina, ca'rajè'ë, Maija'quëni.

⁶Mësarupi asayè, cinco pi'ani caya t'è'ña isicohua'i a'ë cajè. Jaje a'ri do'iohua'ita'are Maija'què huänëyema'è ñacajji. ⁷Jaje pa'ina, mësaru nañaque cuëcuese'e a'ë, ca'rama'pè mësarupi. Jaje pa'ina, pi'a jerepa do'icohua'i a'ë.

Jesure Cacaiye Pa'iji

(Mt. 10.19-20, 32-33; 12.32)

⁸Si'aohua'i mësarupi yè'ëni ca'rama'pè yè'ë cajeipi cacohua'ire cato, yè'ë Pai Mamaquëje Maija'què huñnaohua'ina yè'ë cajeipi quèaja'què a'ë cayè.

⁹Jaje cui'ne yè'ëni ca'rajè cajei peoyè, pa'i asa hue'ñana casicohua'ire yè'ëje cui'ne Maija'què huñnaohua'i ña hue'ñana yè'ë cajei peoji, caja'què a'ë.

¹⁰Jaje pa'ina, yecohua'ipi Pai Mamaquère co'aye casicohua'i pani sai de'hua cuañoñe pa'iji. Jaje pa'iquèta'are yecohua'ipi Maija'què joyore co'aye casicohua'i pani sai de'hua cuañoñe ti peoji.

¹¹Mësarute tseani pa'i tsi'si huè'ñana, pa'nita'a pa'i yo'oye ñacohua'i què'rona co'aye yo'ocohua'i a'ë cajè sacohua'i pa'ito du'ru cuasama'pè pa'ijè'ë, me sehuoja'cohua'i a'ni cajè. ¹²Iti caye ti'asi maca Maija'què joyopi quèaquëna, mësaru caja'cohua'i a'ë."

Jaiyere Payepi Huajëya'ye Neñe

¹³Pai jopopi Jesure capi, ñeje:

"Ye'yaquè, se quèajè'ë, yè'ë a'yère yè'ëreje co'amaña huacaijaquè ja'què pase'e."

¹⁴Caquëna, Jesupi capi, ite:

"¿Ina, nepi yè'ëre pa'i yo'oye ñaquère cui'ne co'amaña huahuequère cuañere'ni?"

¹⁵Yequeje capi, Jesús:

"Si'aye co'amaña èayere de'hua ñajè'ë. Jaje pa'ina, pa'i pa'iyè cato jaiye co'amaña payepi còcaina, pa'iyè peoji."

¹⁶Jaje caquè pa'i pa'iyere tiñarepa quèasi'i caquè capi:

"Pa'iji, te'i èmè jaiye co'amaña paquè. Pa'ina, i tasi co'amañapi jaiye tèa ja'ñepi quèji'i. ¹⁷Ja maca ñani jaiye co'amaña paquèpi ¿me neja'què a'ni, iti de'hua hue'ñaje? ¿Jerona de'huaja'què a'ni, quèise'e? caquè cuasa huèopi.

18 Ja maca cuasapi, peo hueñña ja'rë de'hua hueñña pa'ise'e nejoni yeque jerepa jai hueñña nesi'i. Neni jarona de'huasi'i si'aye yë'ë tëase'e cui'ne si'aye yë'ë tsoe paye çoni. 19 Ja jeteyo'je de'huani yë'ëja'a casi'i: 'Jaiye co'amaña de'huase'e payë, tsoe ometëca pa'i ja'ñere pëa huajëquë sihuaquë ucuquë ai pasi'i' cuasapi. 20 Jaje cuasaquëna, Maija'quëpi ite capi: 'Huesë maca, iye ñami më'ë ju'ija'quë a'ë. Jaje pa'ina, më'ë de'huase'e çne tse pa'i ja'ñe a'ni?' 21 Ja maca ponëni si'aohua'ire capi. Jaje yo'oye pa'iji. Jaiye co'amaña paquëpi co'ye de'oye pa'iyese'e cuasaquë, Maija'quëre cuasama'quë cato."

Maija'quë I Mamajëre Ñacaiye

(Mt. 6.25-34)

22 Jeteyo'je Jesús i ye'yacohua'ire capi:

"Jaje pa'ina, mësarute co'a ju'ima'pë pa'ijë'ë, jere aija'cohua'i a'ni cuasajë. Cui'ne co'a ju'ima'pë pa'ijë'ë, jere caña ju'ija'cohua'i a'ni cuasajë. 23 Ao aïne jerepa do'iyë a'ë, pai pa'iyë. Cui'ne caña ju'iyë jerepa do'iyë a'ë, mai çapë. 24 Ñajë'ë, jaohua'i pë'përi, co'amaña tama'cohua'ita'a cui'ne tëama'cohua'ita'a cui'ne iti çä de'hua hue'e peocohua'ita'a cui'ne pëa hueñña peocohua'ita'a de'hue Maija'quëpi cocaina, pa'icohua'ini. Jaje pa'ina, mësarupi'ä seña maca do'icohua'i a'ë, pairepa sëte. 25 Jaje pa'ito çnepi mësarucohua'i ai co'a ju'i do'ire metro joporeja'a tsoacohua'i ai de'oja'cohua'i a'ni? 26 Jaje pa'ina, ai cuasa do'ire a'ri maña pa'ise'ere jaiye se mëoñu'u ai jerepa cuasaye'ni. Jaje pa'ito çme neñu'ju airepa yequë co'amañare co'a ju'iñe'ni?

27 Ñajë'ë, cui'ne jorore coa mëani pa'iyere co'amaña ne ma'ñeta'a cui'ne yëije oya ma'ñeta'a ai de'o joro pa'iyere. Jaje pa'ina, cayë, pai ëjaë Salomón maca i de'o hueññare pa'inije de'o jo'ya joroje pa'irepa ju'iyë papi. 28 Jaje Maija'quë taya mañata'a de'oye suñacaise'ere paji, coa yures'e pani ñamina'a tsoe ju'ise'e pa'ina, toana ëo ja'ñeta'a. Jaje pa'ito mësarute ai jerepa caña suñacaiye pa'iji, Maija'quë necaima'quë api, cuasacohua'i. 29 Jaje pa'ina, co'a ju'ijë cui'ne co'ejë cu'ima'pë pa'ijë'ë, jere aija'cohua'i a'ni cui'ne jere ucuja'cohua'i a'ni cuasajë. 30 Iye yeja pai jaje ai cuasajë pa'iyë, si'aye iyere. Jaje pa'iquëta'a mësarucohua'i tsoe mësarucohua'i ja'quëre payë, si'aye mësarute jopo caraye asaquëni. 31 Jaje pa'ina, mësarupi Maija'quë cuañe tëtëre ai oijë yo'oto Maija'quëpi de'hue jopo caraye isiquëna, co'amaña pajë'ë.

Ma'tëmo Co'amaña

(Mt. 6.19-21)

32 Ca'rama'pë pa'ijë'ë, yë'ëre asacohua'i mësarucohua'i a'ri pai maña'ë. Jaje pa'iquëta'are mësarucohua'i pa'ijë'ë i cuañe tëtëre isiyë yëji. 33 Mësarucohua'i pa'ito isijë'ë, curiquëpi cui'ne co'amaña carasicohua'ina do'i peoye coa isijë'ë. Jaje yo'ojë ai huano topëa de'o ma'ñere t'ajë'ë. Ma'tëmo co'amaña carajai ma'ñere, cui'ne ñaëje cacama'tore pul'juje pul'juma'tore paja'cohua'i. 34 Mësarucohua'i pa'ijë'ë, cui'ne jarote mësarucohua'i joñoaje pasipi.

Ne De'huasicohua'ipi Pa'ijj'ë

³⁵Ne de'huasicohua'ipi ñare pajë pa'ijj'ë. ³⁶Fiesta ña tëjini ëjaë co'ija'quëpi cayë, i jo'ya utejë pa'iyeye pa'iohua'i pa'ijj'ë. Titàni eta sa'rona tè'ca maca esa hui'yocaiyeje yo'oja'cohua'ipi. ³⁷Sihuaaja'cohua'i a'ë, iohua'i ëjaëpi utejë pa'ijj'ëna, titaëna ñani. Nuñerepa cayë, iohua'i ëjaëpi sihuaquë aó ai saihuëna soini aóre aója'quë api. ³⁸Ñami joporepa panita'a ñata ñami titaquëta'a, sëtasicohua'ini titaquë pa'ito sihuaaja'cohua'i a'ë, ite necaicohua'i mañapi. ³⁹De'hua asajj'ë, co'amaña ñaquë dai ja'ñere asasiquëpi utequë pa'ito i huë'e co'amaña imani saye peoji. ⁴⁰Mësarhu huesë maca Pai Mamaquë daija'quë api. Jaje pa'ina, de'hua ñajë utejë pa'ijj'ë.”

Nuñerepa De'o Jo'yaë Cui'ne Co'a Jo'yaë

(Mt. 24.45-51)

⁴¹Ja maca Pedropi capi:

“¿Ëjaë, iye ye'yase'e yëquëse'ere caquë ye'yaë? ¿Panita'a si'aohua'ire caquë ye'yase'e a'ni?”

⁴²Caquëna, Ëjaëpi sehuopi:

“¿Jaje pa'ito ne a'ni, ta'ñe asaquëpi cui'ne nuñe yo'oquëpi i ëjaë ñacaij'ë huë'e pa'iyeye case'ere de'oye sehuoquë, cui'ne i ëjaë jo'yareje aó de'oye aóquë yo'oquë? ⁴³I ëjaë titaquë ñaquëna, i case'eye yo'oquë, cato de'oye pa'ija'quë api. ⁴⁴Nuñerepa cayë, mësarute. Co'amaña paquëpi si'aye i co'amaña de'oye ñacaisiquëna, si'aye i co'amañare ñacaij'ë caquë isija'quë api. ⁴⁵Jaje isiquëni i jo'yaëpi ëjaë ja yë'ta'a tsoe nëija'quë api caquë i ëjaë jo'yani co'aye si'sequë yo'oquë cui'ne nomiohua'i iti huë'e pa'icohua'ire, co'aye yo'oquë cui'ne aó fiesta nequë ai huëoni cui'ne cono ucuquë cuepe huëoni. ⁴⁶Yo'o maca i ëjaë co'ija'quë api, i jo'yaë huñëyeni utema'ë huesëquë yo'o maca ja maca sehuoma'cohua'ire nejoñepi nejoja'quë api, i yo'osi do'ire ai si'seni.

⁴⁷I ëjaë yëye i jo'yaë asaquëta'a de'oye yo'oma'quëpi cui'ne i caye sehuoma'ë yo'oquë cato jaiye tè'ca cuañoñe pa'iji. ⁴⁸Jaje pa'iquëta'are i ëjaë yëye huesëquëpi, coa yo'oni a'ri maña tè'ca cuañoñe pa'iji. Jaje pa'ina, ai cuasaye isisiquëni ai seña pa'iji, cui'ne iti de'hue nequëni nequë api cuasani ai jerepa cuañeña pa'iji.

Jesús Do'ire Paipi Hua Saiye

(Mt. 10.34-36)

⁴⁹Iye yejana yë'ë toa tsëosi'i caquë da'ë. Tsoe co'arepa toa ne'su mëiñeye yo'oquëna, ñara'ye, merepa tsoe ne saose'e pa'ina, ñara'ye. ⁵⁰Ja saoma' do'ire yure cato oco doyeje pa'ye ai yo'oyepi yë'ëre yo'oquëna, tëjyerepa ai yo'oquë tëtto saija'quë a'ë caquë oiyë. ⁵¹¿De'oye pa'i ja'ñere dapi, cuasaye mësarhu? Pani. Coa ai jerepa huahueyere dahuë. ⁵²Jaje pa'ina, yurepi seña maca mu'seña cato

cinco te'e tsëcapëre pa'icohua'ipi huani toasocohua'i sañope yo'oja'cohua'i a'ë, cayahua'ini cui'ne cayahua'ipi toasocohua'ini sañope yo'oja'cohua'i a'ë. ⁵³Cui'ne pëca ja'quëpi mamaquëre sañope yo'oye pa'iji. Mamaquëpi pëca ja'quëre sañope yo'oye pa'iji. Cui'ne pëca ja'copi mamaconi sañope yo'oye pasipi. Cui'ne mamacopi pëca ja'core sañope yo'oye pasipi, huaopi io mamaquë nëjore sañope yo'oye pasipi. Cui'ne mamaquë nëjopi huaore sañope yo'oye pasipi."

Mai Yure Pa'iyë Cuasaye

(Mt. 16.1-4; Mr. 8.11-13)

⁵⁴Jesupi capi, paire:

"Ësë caje hue'ñapi nea siri mëina, ñani cacohua'i a'ë ocoja'coa. Carena, cui'ne ocoji. ⁵⁵Jaje cui'ne hu'ehuë te'tepi tutuquëna, ñani cayë ai ësë uja'coa. Jaje carena, cui'ne ësëquë uji. ⁵⁶Coa cacohua'i, mësaruru ta'ñe cacohua'i a'ë ma'tëmo cui'ne yeja yo'oyena, ñani. Jaje yo'ocohua'ita'a ¿me yo'ojë mësaruru pa'i tëcahuë ayere yure jaje yo'o macare pa'iyë cajë asa ma'ñe'ni, ta'ñe?"

Esa Ne De'huaye

(Mt. 5.25-26)

⁵⁷¿Me yo'ojë mësaruse'e tayo yo'oye ñani? ⁵⁸Jaje pa'ina, yequëpi më'ère do'i paquëpi cani saquë pa'ito më'ère do'i paquë api caquë saquëni du'ru ne de'huajë'ë, ja ye'ta'a pai yo'ose'e ñaquë quë'rona ti'ama'në. Jaje ne de'huaëna, pai yo'oye ñaquë quë'ro sama'ë pa'ija'quëre. Jaje më'ëpi yo'oma'ë pa'ito pai yo'oye ñaquëpi co'acohua'ire cocohua'ina isina, jaohua'ipi yureta'a co'acohua'ire co hue'ñana coja'cohua'i a'ë, më'ère. ⁵⁹Jarona cosiquë pani etaye peoji, më'ëpi si'aye më'ë do'i saima'ë pani."

Huajë Pa'iyena Ponañe Pa'iji

13 ¹Jare ja mu'seña Pilatopi Galilea acohua'ire huani jëani, cui'ne iohua'i ëojë señu'u cajë huaisicohua'i tsiena pai tsiepi co'meni yo'ose'ere, yecohua'ipi quëahuë, Jesure. ²Quëajëna, capi:

"¿Mësarupi cuasani huani jëosicohua'ipi Galilea paire seña maca co'acohua'i paë'ë, cuasaye? ³Pani. Jaje pa'ina, cayë, mësaruru. Ja'rë yo'oyere jëoni ponëma'cohua'i pani si'a pai mësaruje jaje yo'ocuañoja'cohua'i a'ë. ⁴Mësarupi cuasani Jerusalén pa'icohua'ire seña maca co'acohua'ini, diez y ocho paire Siloé tupëpi quëo huea'co'ë, cuasaye. ⁵Pani. Nuñerepa cayë. Jaje pa'ina, mësarupi huajëye pa'iyë ponëma'cohua'i pani jare cui'ne yo'o cuañoja'cohua'i a'ë."

Higuera Ñë Ayere Quëaye

⁶Ja maca Jesús pai yo'oyeje pa'ye neni quëaquë capi:

"I yejana tasi ñë paquëpi quëima'o paco caquë sani ñaquëna, quëima'co paji'i. ⁷Pa'ina, ñani ja maca yeja ñaquëre capi: 'ina, toasq ometëca

daiyë, iti cã quëise'e ñasi'i caquë. Daiquëta'a ti'ama'e pa'iyë, quëisico pa'iona. Jaje pa'ito cueni jeojë'ë. Me nesi'co coa yejare que'eñe nēcaco'ni.
 8 Caquëna, iti yeja ñacaiquëpi sehuopi: 'Ëjaë iye ometëcahuëse'e pa'ija'co, a'ji yeja neni yequë co'amañapi oã ñasi'i, quëija'core. 9 Jaje neruta'a quëti'ñe pa'io iti cã. Jaje neruje quëima'ona, ña jujani ja macata'a cueni jeojë'ë, capi."

Jesupi Nomiore Jujupi, Huajë Mu'se Pa'ina

10 Huajë mu'se pa'i tsi'si hue'ñana ye'yaquëna, 11 jarote paco'ë, te'o nomio diez y ocho ometëca ju'ico, huatipi ne quë'casicopi ti nuiñe nēcaye peocopi. 12 Pa'iona, ñani Jesupi soini capi:

"Nomio më'ë ju'i dahuë tsoe jeopi. De'oye pa'ijë'ë."

13 Caquë ja maca i jëñapi iona pato maca jare iti macapi nuñerepa nēcaco ponëni, Maija'quë de'oquë api, sihuaco ca huëo. 14 Jaje Jesús huajë mu'se jujuna, ñani pa'i tsi'si huë'e ñacaiquë ëjaëpi iyere ñani pëi, paire capi:

"Seis mu'seña pa'iji, co'amaña ne mu'seña. Ja mu'seña jaje pa'ito dani juju cuañojë'ë, pa'ni huajë mu'se juju cuañoñe."

15 Caquëna, ja maca Ëjaëpi sehuopi:

"¡Coa cacohua'i pa'i! ¿Joyema'cohua'ini mësarü acohua'i je'quë, huajë mu'se pa'ina, mësarü duruhuequëpi pa'nita'a burropi oco ucuja'quëre?"

16 ¿Ico nomio cato Abraham tsëcapë aconi Satanáspi diez y ocho ometëca huëse'ëje pa'ioni, joyeye co'aquë huajë mu'se pa'i do'ire?"

17 Jaje Jesús caëna, ite sañope cacohua'ipi huajëya'yerepa maire caë'ni cuasahuë. Jaje cuasajëta'are si'a pa'i sihuahuë, Jesús pa'i yo'o ti'a ma'ñere de'oye yo'okuëna, ñani.

Mostaza Cã Ayere Ye'yaye

(Mt. 13.31-32; Mr. 4.30-32)

18 Ja maca capi:

"¿Iqueje pa'ye a'ni, Maija'quë te'te aye? ¿Iquena cui'ne pa'ye neni iñora'ye? 19 Jaje cani capi, a'ri mostaza care taquëpi yejana taëna, ai de'oni jai soquë yë de'ona pi'api iti ñë capëana tsianoa nejë payeje pa'ye a'ë."

Pan Ne Pore Ayere Ye'yase'e

(Mt. 13.33)

20 Jaje cani yequeje capi, Jesús:

"¿Iquepi coní cui'ne pa'yeje ne iñora'ye, Maija'quë te'te aye yo'oye?"

21 Cani capi: Pan necopi harinare toaso jai ji'so neni cui'ne o'sa mëiñere a'ri maña iona co'meni iona si'a sëpë juju mëicoa. Ja juju mëiñeje pa'ye yo'oye a'ë, Maija'quë te'te ayeje."

A'ri Jato Sa'ro
(Mt. 7.13-14, 21-23)

22 Jerusalénna sai, p̄ai darip̄ēa cui'ne a'ri darip̄ē pa'icohua'ire ye'yaquē sa t̄eto saji'i. 23 Jaro pa'iquēpi seji'i, ite:

“Ējaē, ¿a'ri p̄ai maña pa'iyē, huaso cuañocohua'i?”

Caquēna, ipi sehuopi:

24 “A'ri jato sa'roja'a cacasi'i cani si'a mē cuasayepi yo'oj̄ē. Jaje pa'ina, cayē mēsarute p̄ai cacayere yēja'cohua'i a'ē. Jaje yējēta'a caca t̄i'ama'p̄ē pa'ija'cohua'i a'ē. 25 J̄a maca it̄i huē'e aquēpi huēni jato sa'ro s̄iosi maca, mēsaru hue'se pa'isicohua'ipi caja'cohua'i a'ē jato sa'rona tē'cajē ‘Ējaē, hui'yoj̄ē’. Jaje cajēna, ipi casipi ‘ñama'quē a'ē, mēsarute. Jero acohua'i a'ni.’ 26 Caquēna, mēsarupi ca huēoja'cohua'i a'ē: ‘Mē'ē ja're c̄oni āijē cui'ne ucujē yo'osicohua'i a'ē cui'ne jare mē'ēpi pa'i hue'ñana dani ye'yasiq̄ē a'ē.’ 27 Cajēna, sehuoja'quē api: ‘Tsoe cahuē ñama'quē a'ē, mēsarute. Jero acohua'i a'ni. Saij̄ē, co'ayese'e yo'ocohua'i.’ 28 Jaje casi maca Maija'quē tē'tere Abraham, Isaac, Jacobo, cui'ne Maija'quē yo'o ja'ñere quēajē pa'isicohua'i pa'ijēna, ñani mēsarupi hue'sena j̄ecosicohua'i pa'ijē cuji qu'i'cojē oija'cohua'i a'ē. 29 J̄a maca daja'cohua'i a'ē ěmēje'e tē'te cui'ne huē'ehuē tē'te, ěsē mēi hue'ña cui'ne s̄a'nihuē p̄api Maija'quē quē'rona tsi'sini ̄o āija'cohua'ipi. 30 J̄a maca yure teaye pa'iohua'i pa'isicohua'i jerepa pa'iohua'i pa'ija'cohua'i a'ē cui'ne yure jerepa pa'iohua'i pa'isicohua'ipi teaye pa'iohua'i pa'ija'cohua'i a'ē.”

Jerusalén Paire Jesús Ñaquē Oiyē
(Mt. 23.37-39)

31 Jare j̄a mu'se daē'ē, fariseo p̄ai dani ite cahuē:

“Saij̄ē, Herodes mē'ēre huani j̄eosi'i caji.”

32 Cajēna, ipi sehuopi:

“Sani caj̄ē, jaēte co'aquē ta'ñe asama'quere: ‘Yure, cui'ne ñamina'a huatiahua'ire eto saoquē yo'oni cui'ne ju'icohua'ire juju tējini ñamina'a jerepa mu'se saosi'i.’ 33 Jaje pa'iquēta'are j̄a yē'ta'a yo'oja'quē a'ē yure, ñamina'a cui'ne se ñatasi mu'seje. Co'aji, Maija'quere quēacaiquēpi Jerusalén peo hue'ñana ju'ito.

34 J̄a Jerusalén Maija'quē yo'o ja'ñe quēacaicohua'ire huani j̄e darip̄ē! Cui'ne Maija'quē mē'ēni caquē j̄ejo daocohua'ire quēna p̄ēapi j̄e darip̄ē. Jaiye mēsarute oi cura mamajere oio cap̄ēa huē'ehuēna coyeje yo'osi'i caquē yo'oquēna, coehuē. 35 Mēsarute Maija'quēpi j̄eocaja'quē api. Cui'ne yē'ēre ña cōne peoja'cohua'i a'ē, ‘mēsarupi de'oquere pa'ni Ējaē mamirepa hue'equē daiquē’ ca maca t̄i'añe pato.”

Jesupi Coto Dahuë Ju'iquère Jujucayie

14 ¹Huajë mu'se ti'äena, Jesús saji'i, fariseo ëjaë huë'ena, ao as'i caquë. Saquëna, fariseohua'ipi huajë mu'se i yo'oquëna, ñañu'u cuasajë cui'ñani ñahuë. ²Ñajëna, i ñaquë ñu'i hue'ñare te'i coto dahuë ju'iquëpi paji'i. ³Pa'ina, Jesús seji'i, cuañese'e ye'yacohua'ire cui'ne fariseo pa'ire: “¿Jujuye de'oquë huajë mu'se pa'ito ju'iquère, mësarupi asato, pa'nita'a jujuye pa'ne?”

⁴Jaje caquëna, coa ai jerepa cama'pë paë'ë. Pa'ijëna, ipi ju'iquère jujuni capi, saijë'ë. ⁵Jaje se jujuni fariseohua'ire capi:

“¿Nepi mësaru acohua'i burropi pa'nita'a huequëpi cojena tomesiquère etoma'cohua'i a'ni, huajë mu'se pa'i do'ire?”

⁶Caquëna, ti sehuoye pa'huë.

Huejajëna, Soisiquë Yo'oye

⁷Soisicohua'ipi de'o ñu'i saina co'ejë ao ai saihuëna ja'rujëna, ñani Jesupi ja'ohua'ire ñeje yëhuopi, iohua'i asa ja'ñere:

⁸“Më'ëni yecohua'ipi huejajëna, ñaja'quère soisiquë pani de'o ñu'i saihuëna tëto sani ja'ruma'ë pa'ijë'ë. Ja'runi ñu'ina, më'ë jerepa pa'ini dani mësarute soisiquëpi cama'quëni: ‘Më'ë ñu'i saihuëre iquëna isijë'ë.’ ⁹Caquëna, më'ëpi pa'i ñajëna, huajëya'ye huëni ai jeteyo'jerepa ñu'i saihuëna sani ja'ruma'quëpi jaje yo'osi'ni. ¹⁰Jaje yo'oma'ë, huëosicohua'i pa'ito, jeteyo'je ñu'i saihuëna ja'rujë'ë. Jaje ja'rusiquëpi ñu'ina, më'ëre huëosiquëpi dani cajaquë: ‘Yë'ë cajei, ino de'o hue'ñana dani ja'rujë'ë.’ Jaje cato më'ëje sihuaquë i ja're coni ao ai saihuëna ja'rusicohua'i ñajëna, de'o ñu'i saihuëna ja'ruja'quë a'ë. ¹¹Jaje pa'ina, yë'ë a'ë jerepa pa'i caquë ija'a yo'osiquëpi coa ai jerepa co'aquë maca ponëne pa'iji. Cui'ne iti co'aquë teaye pa'i pa'isiquëpi jerepa pa'i ponëne pa'iji.”

¹²Capi, ite soisiquëreje:

“Aore aequë pani, pa'nita'a na'iquëna, aore aequë pani, soima'ë pa'ijë'ë, më'ë cajeohua'ire, cui'ne yo'je tsire cui'ne më'ë do'ijëre cui'ne më quëno maca jaiye co'amaña pacohua'ire. Më'ëpi jaje soisiquë pa'ito iohua'ije më'ëreje soija'cohua'i a'ë, aija'quère. Ja maca saise'ëje pa'ye pasipi. ¹³Jaje pa'i do'ire më'ëpi aore paquë pani soijë'ë, co'amaña peocohua'ini, co'a de'osicohua'i mañani, cu'ima'cohua'ini, cui'ne ñama'cohua'ini. ¹⁴Co'ye isiye ti paja'cohua'ini co'aijë'ë. Jaje pasicohua'ita'are, nuñe yo'ocohua'i ju'isicohua'ipi huëi maca më'ëje huëni sai cuañoja'quë a'ë, Maija'quëni.”

Aojajë Caquë Jai Pa'ire Soiye

(Mt. 22.1-10)

¹⁵Jaje iyere caquëna, asani ao ai saihuë ñu'icohua'i aquëpi capi, Jesure: “De'hue Maija'quë të'tere pa'i ao ai ja'quëpi sihuaquë pa'iji.”

¹⁶Caquëna, Jesupi capi, ite:

“Jai pai tsi'sirena, aosi'i caquë jai paire huëopi. ¹⁷Huëosiquëpi ao ai macarepa ti'aëna, i jo'yaëre capi: ‘Quërejajj'ë, huëosicohua'ire si'aye ne saohuë’ capi. ¹⁸Jaje casiquëta'are si'aohua'i paja'quë pa'ini ca huëohuë. Du'ru macarepa aquëpi capi: ‘Ja'arepa yejare huerohuë. Jaote sani ñañeque pa'iji. Care payë, yë'ëre oi cuasama'ë.’ ¹⁹Yequëpi capi: ‘Diez duruhuequëre huerohuë, yeja a'jiñe necohua'ire jaohua'ire neñañeque pa'iji. Yë'ëre ai cuasama'ë, pa'ijj'ë.’ ²⁰Yequëpi capi: ‘Ja'arepa huejahuë. Jaje pa'ina, saiye pañë.’ ²¹Ja maca i jo'yaë co'ini i asase'ere si'aye quëapi. Quëaquëna, Èjaëpi asani pëi i jo'yaëre capi: ‘Esa sani jaje pa'ito co'amaña peocohua'ini, cu'lima'cohua'ini cui'ne ñama'cohua'ini, si'aye ai yo'ojë pa'icohua'ini ti'ani dajj'ë, jai daripë cu'i ma'ña pa'icohua'ini.’ ²²Ai tsoe pa'i maca dani i jo'yaëpi capi: Èjaë më'ë cuañese'ejë yo'ohuë. Jaje pa'iquëta'are ja yë'ta'a peo sa'noa pa'iji, timëne peoye. ²³Jaje caquëna, ëjaëpi i jo'yaëre capi: ‘Sani iye daripëpi sai ma'ña pa'icohua'ini cuañejj'ë, dani yë'ë huë'le timëjjajj'ë.’ ²⁴Care payë, yë'ë du'ru huëosicohua'i aquë te'ijjë aïne peoji, yë'ë ao macarepa.”

Jesús Tui Do'ire

²⁵Jai pai Jesure tuijëna, ipi co'ye pönëni iohua'ire capi:

²⁶“Yë'ëre tuiye yëni ai yë'ëni oiye pa'iji, ja'quëre, ja'core, nëjore, mamajëre, yo'jeire, yo'jeore cui'ne co'ye pa'iyë oiye jerepa. Jaje yë'ëni oima'quë pani yë'ëre ye'yequë pa'iyë peoji. ²⁷Cui'ne yë'ë do'ire i pa'iyë ai yo'oye pa'itojë jare tusi'i cuasama'ë, coa tusi'i caquë yo'oque pani yë'ëre ye'yequë peoji. ²⁸Cui'ne mësarü acohua'ipi jai huë'le neñu'u cajë huëocohua'i pani du'ru ja'rüni dujë cuasacohua'i a'ni ¿Je ja'yepi curiquë neja'cohua'i a'ni cajë? ²⁹Jaje de'oye cuasama'pë, coa ja'a huëo macase'le neni, cui'ne jeteyo'je ne saoye pato, si'aohua'i iti ñasicohua'ipi cue'cue huëoja'cohua'i pa'ini, yo'o jujayere ñani. ³⁰Ja maca cue'cuejë caja'cohua'i a'ë: ‘Nesi'i caquë huëosiquëta'a ne sao ti'lama'ë pa'iji.’ ³¹Jaje pa'ina, cui'ne pai ëjaë yequë yeja ëjaë ja're uihuasi'i cani, ne ti'añe pa'iquë caquë ja'rüni cuasani, i soldado paire cuecúe ñaquëna, diez mil pai pa'iyë. Pa'ijjëna, ite huajo daquëpi paji veinte mil soldado paire. ³²Paquëna, neña jujani, ja yë'ta'a yequë ëjaë so'ore pa'ina, uihuaye pañu'u ca de'huaja'cohua'ire jëjo saoja'quë api. ³³Jaje cui'ne mësarü acohua'ipi si'aye ja'rë pa'ise'ere jëone coecohua'i pani, yë'ë yo'oye ye'yecohua'i peoyë.”

Asije Pa'i Ayere

(Mt. 5.13; Mr. 9.50)

³⁴Asi de'oye a'ë, saija'iñe pani. Jaje pa'iquëta'are sai ja'ñere carajaisico pani ¿me cui'naopi sai ja'ñe de'o cöco'ni? ³⁵Cui'ne me cöcaico'ni pu'cani nea ya'o neina, tañu'u cajë nesi tsu'supëjë, co'a de'ose'le pani. Jaje pa'ina, coa jëcöcöye pa'iji, yeja ne de'huaye cöcai ma'ñe pa'ito. Cajoro quë'iohua'i sëte cuasajë asajj'ë.”

Yëi Ñama Ne Huesësicore Ayere Ye'yaye
(Mt. 18.10-14)

15 ¹Pa'i do'ire curiquë secohua'i cui'ne co'aye yo'ocohua'i si'aohua'i Jesure asañu'u cajë tsio daë'ë, ì quë'rona. ²Jaje yo'ojëna, ñani fariseohua'i cui'ne cuañese'e ye'yacohua'i çoni cue'cuejë ñeje cahuë: "Iye ëmë co'aye yo'ocohua'ini yëquë tsioni ajji." ³Jaje cajëna, Jesupi paì yo'oyeje pa'ye neni quëapi, iye: ⁴"¿Nepi mësarü acohua'i aquëpi cien yëi ñamare paquëni te'i jaohua'i aquëpi ne huesëna ne huesëjaquë noventa y nueve pa'ijajë cani co'emaquë a'ni, tì'ama'ë pani? ⁵De'hue co'equë tì'ani sihuaquë tata tupëna çoa seoni. ⁶Ì huë'ena tì'ani ì cajeohua'ire cui'ne ì ja'ye pa'icohua'ire soihuë, yë'ë ja're çoni sihuajë'ë, ne huesësicore tì'a do'ire. ⁷Jaje pa'ina, co'aye yo'ouquëpi ja'rë pa'ise'ere jeoni ponëto huiñaohua'ipi ai sihuayë, noventa y nueve de'oye pa'icohua'ire sihuase'e jerepa.

Curi Tëqui Ne Huesësicore Ayere Ye'yaye

⁸Cui'ne çico nomiopi diez të'ña pasiconi te'o ne huesëni toa tsëoni si'a huë'e ñare paco yuaco co'ema'coa, tì'aja'coa'ë caco? ⁹Jaje de'hue co'eco tì'ani ìo cajeohua'i ja're çoni cui'ne ìo quëno maca huë'e acohua'i ja're çoni sihuaco casio: 'Yë'ë ja're çoni sihuajë'ë, curi të'qui ne huesësicore tì'ahuë.' ¹⁰Jaje pa'ina, cayë, cui'ne Maija'quë huiñaohua'i sihuaye pa'iji, te'i co'aye yo'ouquëpi ì pa'ise'e jeoni ponëto."

Posë Huesëquëpi Yo'oye

¹¹Jesupi capi, yequeje:

"Caya mamajë ëmëohua'ire paquë paji'i. ¹²Pa'ina, yo'jeipi capi pëca ja'quëre: 'Ja'quë isijë'ë, yë'ëre isija'a co'amaña ca nëose'ere.' Caquëna, pëca ja'quëpi co'amañare huahuecaji'i, paì ñape ìohua'i pa ja'ñe. ¹³Isisi jeteyo'je a'ri maña pa'iquëpi yo'jeipi ì yejare isipi, yecohua'ina. Ja do'ipi curiquë neni saji'i, ai so'o yejana. Jarona sani si'a curiquë co'ayere yo'ouquë nejo saopi. ¹⁴Jaje si'aye curiquë neja saosi maca jaiye ao peopi, ja yeja. Ja maca ipi ao ëa ju'i huëopi. ¹⁵Ja maca curi peoquë co'epi, co'amaña neñe ja yeja aquë co'amañare. Jaëpi ite cuañepi ì jo'ya sesere ñacajjë'ë caquë. ¹⁶Ja maca ai ao ëaye tì'aëna, sese aiñere atilñerepa nëji'i. Ite yecohua'lje ao aoñe pahuë. ¹⁷Ao ëa ju'i cuasa huëopi, 'ja'quë huë'e co'amaña necaicohua'i co'arepa ao ani huajëjë. Pa'ijëna, ìñore yë'ë teaye ao ëa ju'i pa'iyë.' ¹⁸Jaje pa'ito ja'quë pa'i huë'ñana co'ini ite casio: 'Ja'quë, më'ëre cui'ne Maija'quëre co'aye yo'ohuë. ¹⁹Më'ë mamaquëre caye peoji, yë'ëre. Më'ëre necaicohua'ire yo'oyepi cui'ne cuañejë'ë.' ²⁰Ja maca jaje cuasani co'ipi, ma'aja'a pëca ja'quë huë'ena.

Ja yë'ta'a so'ore pa'ina, pëca ja'quë ñani ite teayerëpa yo'oroja'quë'ni cuasani ite ñani, ja maca huë'huë tomejani su'cuaquë cui'ne tsu'suquë

sihuapi. ²¹Ja maca mamaquëpi ite capi: 'Yë'ë ja'quë co'aye yo'ohuë, Maija'quëre cui'ne më'ëreje. Jaje pa'ina, më'ë mamaquëre caye peoji, yë'ëre.' ²²Jaje caquëna, pëca ja'quëpi capi, i jo'yare: 'Esao maña de'lo cañare etoni suñacaijë'ë. Cui'ne i moñona aniño suñacaijë'ë, zapatoje suñacaijë'ë, i quëo. ²³Cui'ne duruhuequë tsj jujusiquëni dani huani jëojë'ë, añu'u jai pa' tsi'sini sihuajë. ²⁴Iquë yë'ë mamaquë ju'isiquëje pa'i pa'isiquëpi cui'naëpi pa'iji. Ne huesësiquëpi ti'asiquë pa'iji.' Jaje cani sihuaquëna, jaiye ao ne huëohuë.

²⁵Jaje yo'ojëna, i mamaquë du'ru aquëpi daji'i, co'amaña ne hueña pa'iquëpi. Huë'e ja'ye ti'aquë, asapi musica yo'oye cui'ne pairaye. ²⁶Asani posëohua'i aquëre soini seji'i. Iquere jaje yo'oye'ni jaro, caquëna. ²⁷Tsi posëpi ite capi: 'Më'ë yo'jeipi daji'i. Jaje daquëna, më'ë ja'quëpi huequë tsini huaijë'ë jujusiquëni cuañepi, i huajëquëpi cui'ne de'oye titasi do'i caquë.' ²⁸Jaje quëaquëna, majayëpi pëi cue'yoni huë'e cacaye coequëna, pëca ja'quë etani ite huë'ena cacani ñajë'ë caquë ai seji'i. ²⁹Seina, ipi pëca ja'quëre capi: 'Tsoe më'ëpi asayë, më'ëre yë'ë necai pa'iyë, ti josa coeyë peoyerepa. Jaje pa'iquëta'are te'e ñamareje yë'ë cajeohua'i ja're con'i fiesta neja'quëre isiye pahuë, më'ë. ³⁰Jaje pa'iquëta'are yure iquë më'ë mamaquë më'ë curiquë co'a nomiohua'ini yo'oquë neja saosiquëpi titaëna, sihuaquë duruhuequë tsj jujusiquëre huani jëoni yo'oyë ñañë. ³¹Caquëna, pëca ja'quëpi ite capi: 'Yë'ë mamaquë më'ë cato si'anë yë'ë ja're con'i pa'iyë. Jaje pa'ina, si'aye yë'ë paye më'ë co'amaña'ë. ³²Jaje pa'ina, yure nuñerepa fiesta neñe pa'iji, sihuajë. Më'ë yo'jei ju'isiquëje pa'i pa'isiquëpi cui'naëpi pa'i do'ire. Ne huesësiquë pa'isiquëni yure ti'asi do'ire.' Jaje yo'oyë."

I Co'amaña Ñacaiquë Neñe Ayere

16 ¹Jesupi capi, i ye'yacohua'ire:
 "Pa'iji, te'e ëmë co'amaña paquëpi ñacaiquëre paquë. Jaje pa'ini sani quëahuë, co'amaña paquëna. Më'ë co'amaña ñacaiquëpi co'aye yo'oquë saoji, asahuë cajë. ²Quëarena, asani ëjaëpi ite soini capi: '¿Iquere më'ë yo'oquëna, yë'ëre quëaye'ni? Dajë'ë, më'ë co'amaña nese'e toyase're ñasi'i, më'ë yë'ëre necaiquë pa'iyë peoji.' ³Ja maca co'amaña ñacaiquëpi ai cuasa huëopi: '¿Me neja'quë a'ni, yure yë'ë ëjaëpi co'amaña neñe peoyerepa eto huesoru? Tutuje peoyë, yeja neni tañeje. Cui'ne huajëya'ji yecohua'ini peoyë isijë'ë caquë senirojaiñeje ca'rayë' cuasapi. ⁴Cuasani capi: Tsoe cuasahuë. Jaje yo'osil'i, yë'ë co'amaña neñe peoquë pa'ina, iohua'i huë'ena pëpaja'cohua'ire. ⁵Cani ja maca soipi te'ohua'ise're, i ëjaë do'i pacohua'ire, du'ru aquëni seji'i: '¿Je ja'ye yë'ë ëjaëre do'i paquë a'ni?' ⁶Caquëna, sehuopi ipi: 'Cien jai quëna huëa hui'yape isiye pa'iji,' caquë co'amaña ñacaiquëpi capi, ite: 'Icoa, më'ë ja'në saija'a do'i caquë toyasico, jaote nejoni esa yecore toyajë'ë, coa cincuentase'e.' ⁷Ja jeteyo'je seji'i, yequëre: '¿Cui'ne më'ë je ja'ye do'i paquë'ni?' Caquëna, ipi capi: 'Cien trigo topëa isiye pa'iji,'

caquëna, capi: 'Icoa, më'ë ja'rë saija'a do'i toyasico yecona esa toyajë'ë, coa ochenta topëase'e.' ⁸Ja maca ñapi, i ëjaë jaë co'aquë i co'amaña ñacaiquëpi tsoe si'aye ne de'huasiquëpi paji'i. Jaje pa'ina, iye yeja acohua'i ta'ñe asani yo'ocohua'i a'ë, sehuosicohua'i yo'oye jerepa yo'ocohua'i a'ë.

⁹Jaje pa'ina, cayë, mësarute. Iye yeja co'amañapi isijë yecohua'ini cajeohua'ire nejë'ë. Jaje yo'ojë saosicohua'ipi ti'ajëna, ti pa'i hue'ñapi sihuaquë daijë'ë caquë Maija'quëpi pëpaja'quëre.

¹⁰De'oyerepa a'ri maña pa'ina, ñacaiquëpi cui'ne jaiye pa'itoje de'oyerepa ñacaiye pa'iji. Jaje a'ri mañare de'oye ñacaima'pë pani, jaiyere paje de'oye ñacaiye peoji. ¹¹Jaje pa'ina, mësarupi coa yeja co'amañare de'oye ñacaima'pë co'aye yo'ocohua'i pa'ito, çnepi mësarute de'hue necohua'i a'ë cuasaja'cohua'i a'ni, de'o co'amañare pare yo'oye pa'ito? ¹²De'oye yecohua'i tsere ñama'pë yo'oto, çnepi isija'cohua'i a'ni, mësaruru pa ja'ñe?

¹³Jaje pa'ina, ëjaohua'ire necaiquë pani caya ëjaohua'ire necaiye peoji. Jaje yo'oquë pani yequëni coequë cui'ne yequëni oiye pa'iji. Panita'a yeque, yequëni de'oye sehuocai yequëni sañope cayë pa'iji. Jaje pa'ina, te'ipi Maija'quëre cui'ne curiquëre necaiye peoji."

¹⁴Fariseo pai curiquë ai yëcohua'i sëte i cayere asani Jesús coa caji cajë cue'cuehuë. ¹⁵Ja maca Jesupi capi, jaohua'ire:

"Mësaruru a'ë, pai ña hue'ñase'e de'ocohua'i a'ë cajë yo'ocohua'i. Maija'quë cato ñaji, mësaruru joñoare, jaje yo'ojëta'are. Jaje pa'ina, pai jaiye de'oye yo'oyë cajë pa'iyere Maija'quëpi coequë api.

Moisés Cuñese'e Cui'ne Maija'quë Cuñe Te'te

¹⁶Juan pa'i macaja'a Moisés cuñese'e cui'ne Maija'quë yequë mu'se yo'o ja'ñere ca nëcohua'i ye'yajëna, asahuë. Ja maca yure quëa huëohuë, de'o cocare Maija'quë cuñe te'tena cacayere. Jaje quëajëna, asajë cacañu'u cajë si'aohua'i tutu yo'oyë.

¹⁷Ma'tëmo cui'ne yeja carajaiñe pa'iji. Jaje pa'iquëta'are Maija'quë coca cato carajaiñe peoyerepa. Ti'asipi, io cayejë.

Nëjore Jeocoye Ayere (Mt. 19.1-12; Mr. 10.1-12)

¹⁸Jaje pa'ina, ëmë huejasiquëpi nëjore jeoni cui'ne yecona se huejani, de'oye yo'oye paji. Cui'ne ëmëre jeocosiconi yequëpi huejani cui'ne co'aye yo'oji.

Ai Jaiyere Paquë Cui'ne Lázaro

¹⁹Paji'i, te'i ëmë jaiye paquë si'anë de'o caña cui'ne jai do'ire ju'iquë cui'ne si'a mu'seña fiesta nequë de'oyerepa yo'oquë pa'iquë. ²⁰Jaje pa'iquë pa'ina, cui'ne Lázaro ca'mi quë'ipi teaye yo'oquë pa'iquëje paji'i. Jaje pa'ipi jaiye co'amaña paquë huë'e eta sa'rore ñuji'i. ²¹Jaje iquë teaye pa'i

macapi go ëa ju'li go ai saihue tomeñere atiñnerepa nëina, ñapi. Cui'ne i a'sire jo'yaque daijè ne'nejëna, ñuji'i. ²²Jaje pa'liquëpi teaye pa'i maca juji'i. Juquëna, huññaohua'ipi sahuë, ma'tëmona Abraham ja're conì pa'ija'quëre. Jaje cui'ne jaiye paquëje juji'i. Juquëna, òahuë. ²³Jaiye co'amaña paquëpi juni saji'i, ju'isicohua'i ai yo'o hue'ñana. Jarore papi ñapi, Abrahamre cui'ne Lázarore.

²⁴Ja maca ñani cuipi: 'Ja'quë Abraham, yè'ëre oi ñajè'ë. Ai yo'oyë. Jëjo saojè'ë, Lázarore ocore i moño sa'nihuëna neni dani sësëye yè'ë tsemëñona ne huasojaquë. Ai yo'oyë, yè'ë toase'epi pa'ina.' ²⁵Jaje caquëna, Abrahampi capi ite: 'Tsihua'ë cuasajè'ë mè'ë de'oye pa'ise'ere ja yè'ta'a mè'ë huajèquë pa'inë, cui'ne iquë Lázaropi ai co'aye paji'i, jaro pa'i maca. Jaje pa'isiquëpi yure ipi de'oye pa'iji, iñore. Cui'ne mè'ëpi ai yo'oyë. ²⁶Cui'ne jaje si'aye iye mè'ë yo'ose'e pa'itoje pa'iji, cui'ne jai hua'que tètè'paje, yèquë tètò saiye peoyerepa cui'ne mè'ëje iñona tètò daiye peoye. Jaje pa'ina, iño pa'icohua'i jaro tètò saiye peoji, cui'ne jaro acohua'ije iño daiye peoji.'

²⁷Ja maca jaiye paquë pa'isiquëpi capi: 'Jaje pa'ito ja'quë Abraham mè'ëre señë, Lázarore jëjo saojè'ë, yè'ë ja'quë huë'ena. ²⁸Jarote cinco yo'je tsire payë. Sani quëacaijè'ë, iño yè'ë ai yo'o hue'ñana daima'pè caquë.' ²⁹Jaje caquëna, Abrahampi capi, ite: 'Jaohua'i cato payë, Moisés cuañese'e cui'ne yecohua'i Maija'quëre quëacaicohua'i toyase'ere, jare ñani sehuojajè.' ³⁰Jaje caquëna, jaiye paquë pa'isiquëpi sehuopi: 'Jaje pa'itoje ja'quë Abraham sehuoye pañë. Ju'isicohua'i aquëpi sani quëatota'a ja'në pa'ise'e jeoni ponëja'cohua'i pa'ini.' ³¹Jaje caquëna, Abrahampi capi, ite: 'Moisés cui'ne Maija'quëre quëacaicohua'i case'ere sehuoye coeni, me ju'isiquëpi huëtujë sehuoye'ni'."

Co'ayena Yo'oyena Tajiñe
(Mt. 18.6-7, 21-22; Mr. 9.42)

17 ¹Jesupi capi, i ye'yacohua'ire:
"Pai co'aye neñe carajaiñe peoja'coa. Jaje pa'liquëta'are co'ayere pa'liquëpi yecohua'ire se ye'yaquëna, co'aye ne do'ire teayererepa pa'ija'quë api. ²Jaje pa'ina, tsire co'aye ye'yama'në, jaje pa'ire ñaje təcana quëna pëpi sèani jairana jëo dëoto ai jerepa de'o'ñe pa'io. ³De'hua ñajè'ë. Mè'ë yo'jeipi mè'ëre co'aye yo'osiquë pa'ito yo'oma'ë quëajè'ë cui'ne ja'rë yo'ose'ere jeoni ponëna i yo'ose'ere sai de'huacaijè'ë. ⁴Cui'ne mè'ëni te'le mu'sere siete pa'ye co'aye yo'osiquë pani, cui'ne siete pa'ye dai caye pa'iji: 'Tijupë co'aye yo'oye pasi'i.' Jaje caquëna, i co'aye yo'ose'ere sai de'huacaiye pa'iji."

Nuñerepa Neñe Pa'iji Cuasayepi Tutu Quë'i

⁵Ite ye'yecohua'ipi cahuë, Èjaëre: Isijè'ë yèquëre ai nuñerepa neñe pa'iji cuasayere.

⁶Cajëna, Èjaëpi sehuopi jaohua'ire:

“Mësarupi neñe pa'iji cuasayere a'ri maña mostaza cajë pa'ye pacohua'i pani cayë, iye soquëre iye macapi etani jaira jopore pare sa nëcajë'ë. Ca maca asani sati'ñe pa'io.

Necaiquëpi Yo'oye Pa'iji

7 Mësarupi co'amaña necaiquëre pacohua'ini tsio co'amaña ne tëjini panita'a huequëre ña tëjini co'iquëna, ¿cacohua'i a'ni, 'da sani ja'rujë'ë, ai aija'quë?' 8 Jaje cama'pë coa ai jerepa cayë: 'Aore cua'cojë'ë, neato ai ja'ñere, yë'ë ao ai huëosi maca de'oye ao ja'ñere cui'ñajë'ë, yë'ë ani tëjisi jeteyo'je më'ëje ai cui'ne ucujaj'quë.' 9 Jaje cuañese'ere yo'quëna, necaire pahuë de'o'ji cajë pëpaye peoji jo'yaëpi cuañese'ere necaito. ¿Me de'o'ji caye'ni, jo'yaëpi cuañese'ere neto? 10 Jaje cui'ne pa'iji, mësarujë. Jaje pa'ina, Maija'quë cuañese'ere si'aye nescohua'i pani: 'Co'a jo'ya maña'ë, më'ë nejë'ë casi mañase'e nehuë,' caye pa'iji.”

Diez Ja'ju Dahuë Ju'icohua'ire Ne Co'yaye

11 Jesús ja yë'ta'a Jerusalénna sai Samaria cui'ne Galilea yejaña tëto saji'i. 12 Saiquëpi a'ri daripëna ti'iquëna, diez ëmëohua'i ja'ju dahuë ju'icohua'ipi sañope ti'ahuë. Ti'ajëta'a so'ona nëcajani, 13 cuihuë:

“¡Jesús, Ye'yaquë, yëquë mañare oijë'ë!”

14 Ja maca Jesupi ñani jaohua'ire capi:

“Sani Maija'quë huë'e ñacaicohua'i ëjaohua'ina ññojaijë'ë.”

Jaje caëna, ja saijë iohua'i ju'i dahuë peocohua'i tome huesëhuë. 15 Ja maca te'i jaohua'i aquëpi ju'i dahuë peo hue'ña tomesiquë pa'i ña jujani Maija'quëni tutu yë'opi caquë sihuaquë co'ipi. 16 Co'ini do're ja'rupi Jesús ña hue'ñana cui'ne i tsiapi yejare pana në meni Maija'quëre de'o'ji caquë sihuapi. Iquë ëmë iti sihuasiquë Samaria yeja aquë pajli. 17 Ja maca Jesupi capi, ite:

“¿Mësaru diez pa'iohua'i pa'ima'pë pate, iti ju'icohua'i? ¿Yecohua'i nueve jerore pa'iyë'ni? 18 ¿Iquë yequë yeja aquëse'e Maija'quëre sihuasi'i caquë co'isiquë pa'iquë?”

19 Jaje cani ite capi:

“Huëni saijë'ë. Jujuquë api, më'ë cuasani yo'o do'ipi co'yasiquë sëte.”

Maija'quë Cuañe Te'te Pa'i Ti'añe

(Mt. 24.23-28, 36-41)

20 Fariseo paipi Jesure se'i'ë: ¿Je yëhua Maija'quë te'te ayepi ti'ajaj'co'a'ni? Jaje sejëna, ipi sehuopi:

“Maija'quë cuañe te'te ayere ti'ñarepa ñañe peoji, co'amaña ñañeje pa'ye. 21 'Iñore tsoe pa'iji' panita'a 'jetore pa'iji' caye peoji. Jaje pa'ina, tsoe Maija'quë cuañe te'te ayere mësaru joponi pa'iji, yure.”

22 Jaje pa'ina, ire ye'yecohua'ire capi:

“Ti'ajaj'coa, co'a mu'seña Pai Mamaquë yo'quëna, ña ëa mu'seña. Jaje ña ëaquëta'are ñañe paja'cohua'i a'ë. 23 Jaje ña ëaquëna, pa'ijëna, caja'cohua'i a'ë:

‘Iñore pa’iji’ panita’a ‘jetore pa’iji’. Jaje catoje saima’pë, cui’ne tuima’pë pa’ijë’ë.
 24Ma’tëmopi mujuë ye’hueyeje pa’ye pasipi. Pai Mamaquë tita mu’sè cato asa
 tayoye peoja’coa. 25Jaje pa’iquëta’are du’ru macarepa ai ai yo’oye pa’iji. Yure pa’iji,
 yure pa’i paipi yë’ère coejëna. 26Noé pa’i mu’sëña yo’ojë pa’ise’ëje pa’ye cui’ne
 pa’ija’coa, Pai Mamaquë daija’a mu’sëñaje. 27Ja mu’sëña je’quë ao aijë cui’ne ucujë,
 huejajë cui’ne mamajëre huejojë yo’ohuë. Jaje yo’ojëna, Noé jai yohuëna cacapi.
 Cacasi maca, jai co’je ti’aëna, jaohua’i si’aohua’i co’je jujuhuë. 28Jaje cui’ne Lot pa’i
 mu’sëñaje yo’ohuë: Ao aijë cui’ne cono ucujë huerojë cui’ne yecohua’ina se isijë,
 co’amaña tajë cui’ne huë’ña nejë paë’ë. 29Jaje yo’ojë pa’ijëna, Lot Sodomapi etani
 saji’i. Saisi maca ma’tëmopi oco tomeñeje pa’ye toapi tomequë si’aohua’ire huani
 jëapi, Sodoma pa’ire. 30Jaje cui’ne pa’ye pasipi, Pai Mamaquë ñaija’a mu’sëñaje.

31Ja co’a mu’sëña ti’aëna, huë’e hue’sere pa’ijëna, co’amañapi huë’e
 sa’nahuëre pa’ito ijañu’u cajë yo’oma’pë pa’ijë’ë. Cui’ne yecohua’ipi tsiore
 pa’icohua’i pani co’ima’pë pa’ijë’ë, huë’ena. 32De’hua cuasajë’ë, Lot
 nëjo yo’ose’ere. 33Jaje pa’ina, co’ye i pa’iyere ai cuasaquë cato si’aye ne
 huesëye pa’iji.

34Jaje pa’ina, cayë. Ja ñami cai saihuëna cayhua’i caicohua’i pa’ito
 te’ire saquë yequëni jëo saiye pa’ija’coa. 35Cui’ne caya nomiohua’i te’e
 toacohua’ini te’ore saquë cui’ne yeconi jëo saiye pa’ija’coa. 36Jaje cui’ne
 caya ëmëohua’i tsiore pa’ijëna, te’ire saquëna, cui’ne te’i jëo saisiquë
 pa’ija’quë api.”

37Jaje caquëna, iyere asani setëña:

“¿Jerona iye yo’o ja’ñe a’ni, Èjaë?”

Cajëna, ipi capi:

“Ju’isiquë ui hue’ña pë’përi tsi’siyeje pa’ye tsi’sija’cohua’i a’ë.”

Hual’jeopi Cui’ne Yo’oyere Ca Tëjiquë

18 1Si’anë Maija’quëre sejë pa’iye pa’iji, yo’o jujaye peoye caquë
 Jesús pai yo’oye ayena tiña caquë ñeje, ye’yapi. 2Ye’yaquë capi:

“Pa’iji, pai daripë pai yo’oye ñaquë, Maija’quëre ca’rama’quëpi, cui’ne
 yecohua’ireje oima’quëpi. 3Cui’ne jare ja daripëre paco’ë, hual’jeo. Jaopi
 pai yo’oye ñaquëna, iote sañope yo’oquëni quëaona ca de’huacaijaquë
 caco si’anëpi sacol’ë. 4Jaje saio yo’ocona, pai yo’oye ñaquëpi coepi.
 Coesiquëta’a jeteyol’je cuasapi: ‘Maija’quëre ca’rama’quëje cui’ne paireje
 oima’quëpi. 5Cocasi’i hual’jeore, josa si’anë daio yë’ë yequere cuasaquëna,
 cama’o pa’ija’core,’ cuasapi.”

6Jaje capi, iquë pai yo’oye ñaquë co’aquë. Jaje pa’ito Jesús capi:

7“¿Maija’quëre mu’sëñapi cui’ne ñamiñapi secohua’ire i jo’ya nescohua’ire
 cocaiye paja’quë aë? ¿Tsoe utejë’ë, caquë aë? 8Pani. Jaje pa’ina, cayë,
 ti tsoe nëñe peoye cocaija’quë api, Maija’quë. Jaje pa’iquëta’are ¿yë’ë
 iye yejana dai maca, de’hue yë’ère necaiquë api cuasacohua’i pa’ijëna,
 ti’aja’quë a’ni?”

Fariseo Cui'ne Pa'i Do'ire Sequë Ayere Quëaye

⁹Pai yo'oyeje pa'ye neni Jesús quëapi, de'ocohua'i a'ë cuasajë yecohua'ire co'acohua'i a'ë cajë coecohua'ire. ¹⁰Quëa huëoquë capi: “Caya ëmëohua'i Maija'quëre se huë'ena saë'ë, señu'u cajë. Te'i jaohua'i aquëpi fariseo pa'iji, cui'ne yequëpi pa'i do'i curiquë sequë paji'i, pai ëjaëre necaiquë. ¹¹Pa'ina, fariseopi coa nëcaquë seji'i, ñeje: ‘Ina, ja'quë më'ëre sihuayë, yë'ëre cato jaohua'i co'amaña ñacohua'i, cui'ne co'acohua'i cui'ne nomiohua'ire coa yo'ocohua'ije pa'i peoyë. Cui'ne jaë pa'i do'i sequëje pa'i ti peoyë. ¹²Cui'ne te'e semanare cayaye ao aima'quëpi sei cui'ne yë'ë yo'oquë curiquë neñeje Maija'quë huë'ena diez pa'ye neni te'ore isiquë a'ë, de'hue.’ ¹³Jaje seina, pa'i do'ire sequëpi so'o macana pëani ñaco ca mañaje ma'tëmona se mëani ñama'ë coa ai jerepa coti saihuëna të'caquë ñeje caquë seji'i: ‘Ina, yë'ë Ja'quë yë'ëre oijë'ë, yë'ë maca ai co'aquë a'ë.’ ¹⁴Jaje pa'ina, cayë, mësarute. Iquë pa'i do'ire curiquë sequë cato Maija'quëna i co'aquë pa'iyë quëa toni Maija'quë ja're pa'i sihuaquë colipi. Jaje coliquëta'are fariseo cato ti sihuama'ë paji'i. Jaje pa'ina, co'ye yë'ë jerepa pa'i a'ë cuasacohua'ire cato coa ai jerepa meñe neñe pa'iji. Jaje pa'iquëta'are yë'ë teaye pa'i a'ë cuasaquëni ai jerepa pa'ire neñe pa'iji.”

Jesús Tsire De'oyerepa Cacaiye

(Mt. 19.13-15; Mr. 10.13-16)

¹⁵Jesús quë'rona tsire dahuë, papijaquë cajë. Jaje yo'ojëna, i ye'yacohua'ipi ñani iti tsire dacohua'ire yo'oma'pë pa'ijë'ë ca huëohuë.

¹⁶Jaje cajëna, Jesús jaohua'ire soini capi:

“Coa ñajë'ë, ësema'pë tsire, iohua'ise'e daijajë yë'ë quë'rona. Maija'quë quë'ro jaohua'ije pa'iohua'ise'e cacaye pa'iji. ¹⁷Jaje pa'ina, nuñerepa cayë, mësarute. Tsi de'oji cajë yëyeje pa'ye yo'oma'cohua'i pani ti cacaye peoji, Maija'quë cuãne hue'ña.”

Posëpi Jaiye Co'amaña Paquëpi Jesure Case'e

(Mt. 19.16-30; Mr. 10.17-31)

¹⁸Pai ëjaohua'i aquëpi seji'i, Jesure:

“De'o ye'yaquë, ¿me yo'oni ti pani huesëye ti'aja'quë a'ni?”

¹⁹Jesupi ite capi:

“¿Me yo'oquë yë'ëre de'oquë caquë'ni? Peoji, te'ijë de'oquë. Coa te'i Maija'quëse'e de'oquë pa'iji. ²⁰Asaquë a'ë, Maija'quë cuãñese'e: ‘Nomiore yo'oma'ë nëjore peoni, paire huani jeoma'ë, co'amaña ñama'ë, coa cosoma'ë, cui'ne ëjaohua'ire ñajë oijë'ë, më ja'quëre cui'ne më ja'core.’ Jare më'ëpi asaë.”

²¹Jaje caquëna, iti sesiquëpi capi, ite:

“Si'anë iye tsihua'ë pa'inëpi de'oye sehuoquë a'ë.”

²²Jaje caquëna, Jesupi asani ite capi:

“Ja yè'ta'ta te'o carapi, mè'ère. Si'aye mè'è payere isijè'è, peocohua'ini. Jaje mè'è yo'onita'a Ma'tèmòre co'amaña paye pa'iji. Ja jeteyo'je dani tuijè'è, yè'ère.”

²³Jaje caquëna, iyere asani ai oi, jaiye co'amaña paquë sète. ²⁴Jaje oina, ñani Jesús capi:

“Airepa jëaye pa'iji, jaiye co'amaña pacohua'ipi Maija'quë cuañe te'tena cacaye. ²⁵Camellore miu ñaca cojeja'a etojaiñe ti peoji. Ja jëaye seña maca jëaji, co'amaña pacohua'ipi Maija'quë te'tena cacaye.”

²⁶Jaje caquëna, iti asasicohua'ipi cahuë:

“Jaje pa'ito çnepi huasosicohua'i pa'ija'cohua'i a'ni?”

²⁷Cajëna, Jesupi capi, jaohua'ire:

“Jaje pa'ina, paì ne ti'añe peoyere, Maija'quëse'e ne ti'añe pa'iji.”

²⁸Caquëna, Pedropi capi:

“Èjaë, yëquë pase'e si'aye jëohuë, mè'èni tuñu'u cajë.”

²⁹Caquëna ipi sehuopi:

“Nuñerepa cayë. Paìpi Maija'quë te'te do'ire i huë'e, ja'quëohua'ire, a'yëohua'ire, nējore, mamajëre jëosiquë pani, ³⁰yequë yejana pa'iyë huëo maca ti pa'iyere ti'aja'quë api.”

Jesús I Ju'i Ja'ñere Quëaye

(Mt. 20.17-19; Mr. 10.32-34)

³¹Jesús paì peo huë'ñana i ye'yacohua'ire soini, capi:

“Yure sañu'u, Jerusalëna. Jaron a si'aye ti'aja'coa, Paì Mamaquëre yo'o ja'ñere Maija'quëre quëacaicohua'i toyajë pa'ise'e. ³²Jaron a yè'ère isija'cohua'i a'è, judío paì peocohua'ina. Isirena, cue'cuejë yo'oja'cohua'i a'è yè'ère co'aye cajë, cui'ne copi tse'seja'cohua'i a'è. ³³Tè'ca tējini huani jëoja'cohua'i a'è. Jaje yo'osicohua'ita'are toaso mu'seña pa'i maca huëija'quë a'è.”

³⁴Jaje caquëna, jaohua'i coa huesë asahuë, iquere caquë'ni cuasajë. Ipi tiña asaye ësequëna.

Jesús Ñama'quëre Jujuse'e

(Mt. 20.29-34; Mr. 10.46-52)

³⁵Jesupi Jericó daripë quëno macare pa'ina, te'li ñama'quëpi ma'a yè'quë macare ñu'li curiquë da saicohua'ire seji'i. ³⁶Sequëpi jai paì saijë cajëna, asani seji'i, iquere jaje yo'ojë cayë'ni caquë. ³⁷Seina, ite quëahuë. Jaroja'a Jesús Nazaret aquëpi daina, yo'ojë cayë. ³⁸Cajëna, ja maca asani cuiipi:

“Jesús, David mamaquë yè'ère oijë'è. Ai yo'oyë.”

³⁹Jaje cuiquëna, yecohua'ipi du'ru saicohua'ipi ite cahuë, cuima'ë pa'ijë'è. Ja cajëta'are ipi ai jerepa ja yè'ta'api cuiipi:

“David mamaquë yè'ère oijë'è. ¡Ai yo'oyë!”

⁴⁰Caquëna, asani Jesús nëcajani, quërëjani dajë'è caquë jëjo saopi, te'ire. Dasi maca ite seji'i:

41 “¿Me nejaquë cuasaquë'ni, më'ë yè'ëre?”

Caquëna, ñama'quëpi sehuopi:

“Ëjaë, ñaco care de'huacaijë'ë. Ñasi'i, yè'ë.”

42 Caquëna, Jesupi capi, ìte:

“¡Ñaquë pa'ijë'è! Më'ë nequë api cuasaquë ca do'ipi.”

43 Jaje ca macapi, tsoe ñaquë paji'i, ñama'quë pa'isiquëpi. Jà maca Jesure tuji'i, Maija'quëre sihuaquë. Cui'ne si'aye iye yo'oye ñasicohua'ijë Maija'quëre ai sihuahuë.

Jesús Cui'ne Zaqueo

19 1 Jà maca Jericó daripëna Jesús cacani tëto saina, 2 cui'ne jarote jaiye co'amaña paquë Zaqueo hue'equëjë paji'i, curiquë pa'i do'i secohua'i ëjaëpi. 3 Jaë cato Jesure ñañe yëquë paji'i. Jaje yëquëta'a me ñaquë'ni pai ja'i maña pa'ijëna, Zaqueo nëhuiquë paji'i. 4 Jaje pa'ipi du'ru huë'huëni soquë yëna mëji'i, Jesús ja'ye tëto saija'tona ñani. 5 Jà maca Jesús jaroja'a saiquëpi ñani Zaqueore capi:

“Esa cajej'ë, yure më'ë huë'ena sani pëaja'quëpi saiyë.”

6 Jà maca Zaqueo esa cajeni sihuaquë Jesure ì huë'ena sai sapi. 7 Jà maca iyere yecohua'i ñani si'ahua'i de'oye yo'oma'aji'i cahué, Jesupi co'aye yo'oquë huë'ena pëasi'i caquë, saquëna. 8 Jà maca Zaqueopi huëni nëcane capi, Ëjaëre:

“Ina Ëjaë, yè'ë paye jopore paja'a isisi'i co'amaña peocohua'ire, cui'ne yè'ë coa cosoquë jerepa nese'e pa'lito co'yosi'i cuatro pa'ye jerepa yè'ë se jiosiquëre.”

9 Jaje caquëna, Jesupi capi, ìte:

“Iye mu'se tìtapi iye huë'e huasoye cui'ne iye ëmë cato Abraham tsëcapë aquë api. 10 Jaje pa'ina, Pai Mamaquë daji'i, ne huesësicohua'ire co'equë huasosi'i caquë.”

Curiquë Yo'ose'e Ayere Quëaye

11 Jà yè'ta'a Jesús cayere pai asajë cuasahuë, yure Maija'quë cuañe te'te tì'aja'coa cajë. Jaje cuasahuë, Jesupi Jerusalén ja'yere pa'i do'ire ñajë. Jaje cuasajëna, ìpi pai yo'oyeje pa'ye caquë quëa huëopi. 12 Jà maca capi:

“Paji'i, te'e pai de'o tsëcapë aquë. Jaëpi so'o yejana saji'i, pai ëjaëresi maca, pai ëjaë de'oni cui'naëpi co'i cosi'i caquë. 13 Jà yè'ta'a saima'në, diez pa'iohua'ire ì jo'ya acohua'ini soini, pai ñapere isipi jai do'i curiquë tē'ñare te'e tē'ñase'e isiquë capi: ‘Iye curiquëpi se hueroni yeque jaiye nej'ë, yè'ë co'i macaja'a.’ 14 Jaje casiquëta'are ì yeja pa'i paipi ìte coejë, ì saisi jeteyo'je jëjo saohuë, quëaja'cohua'ipi: ‘Coeyë, më'ëre yëquë ëjaë de'oye’ cajë.

15 Jaje casicohua'ita'are pai ëjaë de'osiquëpi co'ipi, ì yejana. Tìtani cuañe saopi, ì curiquë isisicohua'ire quërëjaijë'ë caquë. Asasi'i, je ja'ye pai ñape ja curiquëpi nere'ni caquë. 16 Soina, du'ru macarepa tìtaquëpi capi: ‘Ëjaë, më'ë curiquëpi diez pa'ye jerepa se ne cohüë.’ 17 Pai ëjaëpi sehuopi: ‘Ai de'oji, më'ë

de'lo jo'yaè'è. Mè'è a'ri mañare de'oye ñacaisi do'ire, mè'ère diez daripëa cuañequère neñè.' 18 Yequëpi dani capi: 'Ëjaë, mè'è curiquëpi cinco pa'ye jerepa nehuë.' 19 Cui'ne iquëreje sehuopi: 'Mè'è cato cinco daripëa cuañequë pa'ijë'è.' 20 Ja maca yequëpi dani capi: 'Ëjaë, iye pa'iji, mè'è curiquë pañuelo ca'tipëna deani de'huase'e. 21 Mè'ëpi pa'ire oima'è yo'oquë mè'è isi ma'ñere tsi'soni, cui'ne mè'è ta ma'ñere coa tëaquë, yo'oquëni ca'raqüë pahüë.'

22 Caquëna, pa'ï ëjaëpi capi: 'Co'a jo'yaë, jare mè'è case'epi iñoji, mè'è co'aquë pa'iyë. Jaje yè'è pa'ire oima'è yo'oquëpi yè'è ne ma'ñere tsi'soquë cui'ne yè'è ta ma'ñere coa tëaquë yo'oye asaquë sète. 23 ¿Me yo'oquë curiquë isirena, itipi ne do'ire co'ye sai hue'ñana tëoma'è paquë'ni, yè'è dani iti mañaque neja'quëta'are huë'e titasi maca?' 24 Jaje cani iti maca pa'icohua'ire capi: 'Jiojë'è, curi tël'quire. Jioni isijë'è, diez tël'ña paquëna.' 25 Caquëna, jöhua'ipi cahuë, ite: 'Ëjaë, tsoe diez tël'ña paquëre me ai jerepa isiye'ni?' 26 Cajëna, pa'ï ëjaëpi sehuopi: 'Nuñerepa cayë, paquëni ai jerepa se isiye pa'iji. Jaje pa'ina, cui'ne peoquëni coa ai jerepa se jio coñe pa'iji, si'aye i payeje peo hue'ñarepa. 27 Cui'ne yecohua'i yè'ère ëjaë de'oye coesicohua'ire quërëjani iñona dani yè'ëque ñaquëna, huani jëajë'è, capi.'

Jesupi Jerusalén Cacase'e

(Mt. 21.1-11; Mr. 11.1-11; Jn. 12.12-19)

28 Jaje iye se ca tējini Jesús Jerusalénna saji'i. 29 Tsoe Betfagé cui'ne Betania daripëa cui'ne Olivos hue'yosi cutihuëa ti'añe ja'i maca pa'ï i ye'yacohua'ire cayaohua'ire jëjo saopi. 30 Ñeje caquë:

"Ja maca ja'ye daripëna saijë'è. Ti'a maca jarote pa'ijä'quë api, burro séasiquëpi, pa'ije ja yè'ta'a tuima'quëpi. Ti'ani joyeni dajë'è. 31 Joyejëna, yecohua'ipi me neja'quëni saye'ni secohua'i pa'ito, cajë'è, Ëjaëpi yo'oye pa'iji."

32 Ja maca i ye'yacohua'ipi sani Jesús case'eje ti'ahuë. 33 Ti'ani burroni joyejëna iti tse acohua'ipi se'è:

"¿Me neñu'ju joyeye'ni?"

34 Cajëna, iohua'ipi sehuohüë:

"Ëjaëpi yo'oye pa'iji, caëna, yo'oyë."

35 Jaje quëani joyeni Jesús quë'rona sahuë. Sani cañapi burro jetena jajeni Jesure mëo ñohüë. 36 Ja maca ñu'i saji'i. Saina, pa'ï cañare i saija'a ma'ana jajehüë. 37 Olivos cutihuë perepë cajeye ja'i macare pa'ina, si'ahua'i ite asani tuicohua'ipi Maija'quëre sihuajë cui huëohüë, pa'ï yo'o ti'a ma'ñere yo'oquëna, ñasicohua'ipi. 38 Ñeje cajë:

"De'oquëre papi pa'ï Ëjaë daiji, Maija'quë jëjo daoquëre papi, de'oye pa'iyere papi con'i. Jaje pa'ito sihuañu'u, ite ma'tëmo acohua'ijë sihuajëna."

39 Ja maca fariseohua'i pa'ï jopore con'i pa'icohua'ipi cahuë, ite:

"Ye'yaquë, mè'ère tuicohua'ire cama'pë cajë'è."

40 Jaje cajëna, Jesupi sehuopi:

"Nuñerepa cayë. Icohua'ipi cuiye jëcohua'i pa'ito quëna pëapi cuija'coa."

⁴¹Ja maca Jesús Jerusalén quëno maca tì'acquè iti daripëre ñani ojilì.

⁴²Ñeje caquë:

“jìye mu'se mè'è de'hue asato yè'è isiye de'ora'pi. Mè'è de'oye pa'iyè tì'ara'huè, isiye! Jaje pa'iquèta'are yure cato yahuese'e pa'iji. Jaje pa'ina, mè'è ña tì'añe peoji. ⁴³Co'a mu'se tì'aja'coa, mè'ère. Mè'ère sañope yo'ocohua'ipi quëna tēhuopaje pa'iore tē'yaja'cohua'i a'è. Jaje yo'oni coa si'a tē'ñapi etaye peojajè cajè yo'ocohua'i a'è. ⁴⁴Jaje yo'ojè yejana si'aye quëna pëa ne tao oaja'cohua'i a'è, huani jeaja'cohua'i a'è, mè'è mamajère, huesè pa'isi do'ire Maija'què mè'ère do'i daisi maca.”

Jesupi Maija'què Huè'ere Tsoa Tose'e
(Mt. 21.12-17; Mr. 11.15-19; Jn. 2.13-22)

⁴⁵Ja maca Jesús Maija'quère huè'ena cacani iti huè'ena co'amaña isijè cui'ne huerojè yo'ocohua'ire peo hue'ñarepa eto saopi, hue'sena.

⁴⁶Yo'oquè capi, jaohua'ire:

“Toyase'e caji, ñeje: ‘Yè'è huè'e cato Maija'quère sè huè'e a'è.’ Jaje pa'iotà'are mësaru cato, co'amaña ñaohua'i tu'aro neni yo'oyè.”

⁴⁷Si'a mu'seña Jesús ye'yapi, Maija'quère sè huè'ena. Jaje ye'yaquëna, Maija'què huè'e ñacaicohua'i èjaohua'i cui'ne cuañese'e ye'yacohua'i cui'ne pai daripè èjaohua'ijè me neni huani jeoja'cohua'i a'ni cuasajè co'ehuè, iti yo'o ja'ñere. ⁴⁸Jaje co'ejèta'a tì'ama'pè paè'è, ite ne ja'ñere. Si'a pai ise'ere asajè cui'ne sehuojè yo'ojèna, ñajè.

Jesús Cuañeñerepa Pa'iyè
(Mt. 21.23-27; Mr. 11.27-33)

20 ¹Te'e mu'se Jesús Maija'quère sè huè'ere paire ye'yaquè cui'ne huaso cocare quëaquè pa'ina, tìtahuè, Maija'què huè'e ñacaicohua'i èjaohua'i, cuañese'e ye'yacohua'i cui'ne aiohua'i conì. ²Jaohua'ipi tìtani cahuè:

“¿Quèajè'è, ique tutupi cuañequèrepa pa'i yo'oquè'ni, iye? ¿Iqueipi iye cuañe tutu isina, yo'oquè'ni?”

³Cajëna, ja maca Jesupi jaohua'ire capi:

“Yè'ère cui'ne sèsi'ì, mësarute. Sehuojè'è, yè'è cato: ⁴¿Nepi cuañere'ni, Juan oco doquè pa'i ja'ñe? ¿Maija'què panita'a pai?”

⁵Caquëna, sehuoye pajè coa sa'ñe iohua'ija'a cahuè, ñeje:

“¿Me caja'cohua'i a'ni? Maipi Maija'quèpi jèjo daopi cacohua'i pa'ito ipi sehuoja'què pa'ini: ‘¿Jaje pa'ita'are me yo'ojè sehuoye pare'ni?’ ⁶Cui'ne maipi paipi cuañesiquè paji'ì catojè, si'a pai huèni maire quëna pëapi jeajè huani jeaja'cohua'i pa'ini, si'aohua'i Juanre Maija'què coca quëaquèrepa paji'ì cuasajè cahuè.”

⁷Jaje cuasani cahuè: “Huesëyè. Ne sa'api Juanre oco doquè pa'i ja'ñe cuañehuè.” ⁸Cajëna, Jesujè capi, jaohua'ire:

“Yè'èjè mësaru sese'e quëaye pa'ñè.”

Co'acohua'i Yo'oye Ayere Quëaye

(Mt. 21.33-44; Mr. 12.1-11)

⁹Ja jeteyo'je Jesús pa'ire coca ca huëopi. Pai yo'oyeje pa'ye neni quëapi, ñeje:

“Paji'i, te'i tsio paquëpi cuiya'i tani i co'amaña necaicohua'ina isi nëoni sani huesëquë. ¹⁰Tëaye ti'asi maca saisiqüëpi i jo'yaëre jëjo daopi, co'amaña necaicohua'ire seni tëani dajë'ë, yë'ëre nëocaise'ere caquë. Jaje cani jëjo daosiquëni jaohua'ipi coa tarapi tël'cani jëjo saohuë, peoquëre. ¹¹Ja maca iti tse aquëpi yequë jo'yaëre jëjo dao copi. Cui'ne jaëteje tarapi tël'cani jëjo saohuë, ti isima'pë. ¹²Iti tse aquëpi tijupë yequë jo'yaëre jëjo daoruje co'amaña necaicohua'ipi ñani jaëteje tël'cani hue'sena quërë eto saohuë, pëijë. ¹³Ja maca ña jujani iti yeja tse aquë capi: ‘¿Me neñe jaje pa'ito? cani i oi mamaquëre pani jëjo saopi. Jaëni ñanita'a ca'rajë de'oye sehuoja'cohua'i a'ë.’ ¹⁴Jëjo sauna, ipi ti'acquëna, tsio ñacaicohua'ipi ñani sa'ñe cahuë: ‘Iquëpi iye tsio tse aquë de'oja'quë api, huani jeoñu'u. Jaje yo'oni ti ñese maipi iti tse acohua'i de'oñu'u cahuë.’ ¹⁵Jaje cani tsio peo hue'ñana etoni ite huani jeohuë.”

Jaje quëani Jesupi seji'i:

“¿Jaje yo'osi do'i me yo'oja'quë a'ni, iti tsio aquë jaohua'ire?”

¹⁶Caní capi, ipi:

“Dani co'amaña necohua'ire huani jëani yecohua'ina isija'quë api, i yeja.”

Jaje caquëna, iyere asani cahuë:

“¡Jaje yo'oto Maija'quëje coeni!”

¹⁷Jaje cajëna, Jesús iohua'ire ñani capi:

“Jaje mësarú cuasato, ¿iquere caquë'ni, toya pëpë, pa'iyë ñañu'u? Ñeje caji:

Huë'e necaicohua'i ne jujani nejosi quëna pëpi

Jaopi yure quëna pë iorepa pa'iji.

¹⁸Jaó quëna pë ëmëje'na paipi tomecohua'í pani, tome jë'yeye pa'iji.

Cui'ne quëna pëpi pai ëmëje'na tomeço pani peo sëpëarepa neñe pa'iji.”

Pa'i Do'ire Saíne Ayere Ye'yese'e

(Mt. 21.45-46; 22.15-22; Mr. 12.12-17)

¹⁹Maija'quë huë'e ñacaicohua'í ëjaohua'í cui'ne cuañese'e ye'yacohua'í Jesure iti macapi tseani coñu'u maini caquë jaje quëaji. Cuasajëta'a paini ca'rajë yo'oye pahuë. ²⁰Ja maca yahue de'o pairepa cayeje cajë coa cosoja'cohua'ire jëjo saohuë. Jaohua'ipi sejëna, ipi tayo caëna, ja do'ire pai ëjaëna tseani isiñu'u cajë. ²¹Ite seni ñañu'u cajë saiscohua'ipi cahuë:

“Ye'yaquë, më'ë paire nuñerepa caquë ye'yaquëpi cui'ne paireje si'ahua'ire si'a yël'quë maca caquëpi coa ai jerepa nuñere pare Maija'quë cocare ye'yaquëna, asayë, yëquë. ²²Jaje pa'ina, señë. Quëajë'ë: ¿De'oquë pa'i do'ire pai ëjaë Césarna saíne, panita'a co'aquë?”

²³Cajë sejëna, tsoe Jesús asapi, iohua'í co'aye cuasajë señë. Jaje ñani capi:

“¿Me yo'ojë yë'ère jaje neñañu'u cajë yo'oye'ni? ²⁴Ĩñojë'ë, curiquë të'quire. ¿Ne tsiare hue'eco'ni? ¿Cui'ne ne mamire toyase'eje hue'eco'ni?”
Caquëna, ìohua'ipi sehuohuë:

“Romano pài ëjaë mamire toyasicoa.”

²⁵Cajëna, ja maca ìpi capi:

“Jaje pa'ito ìsijë'ë, romano pài ëjaëna ì tseco pa'ito. Cui'ne Maija'quë tse pa'ito Maija'quëna ìsijë'ë.”

²⁶Jaje pài ña hue'ñana si'aye ìohua'ì cosojë neñu'u cajë yo'ose'ere sehuoquëna, ñani ai ta'ñe asaji cuasajë ca'rajë jerepa cama'pë paë'ë.

Ju'isicohua'ì Huëiye Pa'iquë Cajë Señe

(Mt. 22.23-33; Mr. 12.18-27)

²⁷Jeteyo'je Saduceohua'ìpi Jesure sani ñahuë. Jaohua'ì Saduceohua'ì cato ju'isicohua'ì huëiye peoji cacohua'ì paë'ë. Jaje pa'ìohua'ìpi cahuë, Jesure:

²⁸“Ye'yaquë, Moisés toyani yëquëre jeocaji'ì, ñeje: Te'ì ëmëpi mamajëre pama'ë nëjore jeoni ju'isiquë pa'ito ì yo'jeipi hua'jeore huejani mamajëre pacaiye pa'ìji, maja'yë do'ire, toyapi careña. ²⁹Jaje pa'ìna, te'e tsëcapëre siete ëmëohua'ìpi ñeje yo'ohuë: Maja'yëpi huejapi. Huejani mamajëre peoquë ju'ìi. ³⁰Juquëna, jeteyo'je aquëpi hua'jeore huejani cui'ne jaëje ju'ìi, mamajëre peoquë. ³¹Ja maca toasoñe aquëpi huejapi ìote jaëje cui'ne yo'opi. Jare jajese'e siete pa'ìohua'ì huejajë mamajëre peocohua'ì juju sahuë. ³²Ai jeteyo'jerepa nomio juco'ë. ³³Jaje pa'ito ju'isicohua'ì huëi maca ¿nepi jaote nëjore pajà'cohua'ì a'ni, si'ahua'ì siete pa'ìohua'ì huejasicore?”

³⁴Cajëna, ja maca Jesupi sehuopi, jaohua'ìre:

“Iye yeja cato ëmëohua'ì cui'ne nomiohua'ì huejajë. Cui'ne nomiohua'ìre huejojë yo'oyë. ³⁵Jaje pa'iquëta'are sehuosicohua'ìpi ju'isicohua'ìpi huëisicohua'ìpi ma'tëmo tì'ani huejaye peoji, cui'ne mamajëre pajë huejoye peoji. ³⁶Jaro cato huiñaohua'ìje pa'ìohua'ì pa'ìja'cohua'ì a'ë ju'isicohua'ìpi huëisi do'ire Maija'quë mamajërepa pa'ìja'cohua'ì a'ë, ju'ìma'cohua'ì. ³⁷Jaje pa'ìna, soquë yëpi tsë'ìsi maca, Moisés ñaquë palise'ere toyase'e acopi caji, ñeje: 'Ëjaëpi ca'ajì'ì. Yë'ë cato Abraham, Isaac, Jacobo, Diosu a'ë. Ja do'ire asayë, ju'isicohua'ìpi huajëcohua'ì huëiye.' ³⁸Jaje pa'ìna, Maija'quë ju'isicohua'ì Diosu peoji, coa ai jerepa huajëcohua'ì Diosupi. Jaje pa'ìna, ìte cato si'ahua'ì huajëcohua'ìse'e pa'iyë. Peoji, ju'isiquë ìpi ñato.”

³⁹Ja maca cuañese'e ye'yacohua'ì acohua'ìpi cahuë:

“Ye'yaquë, de'oyerepa cahuë, mè'ë.”

⁴⁰Jaje cani ai jerepa jaiye seña pahuë, ca'rajë.

Ne Mamaquë A'ni, Cristo

(Mt. 22.41-46; Mr. 12.35-37)

⁴¹Jesupi capi, jaohua'ìre:

“¿Me yo'ojë Cristore David tsëcapë api caye'ni? ⁴²Jaje ìpi David ñeje casiquëta'are Salmos toya pëpëna:

Ējaēpi capi, yè'è Ējaère:

Ja'rujè'è, yè'è ěja te'tena.

43 Mèl'ère sañope yo'ocohua'ire yè'èpi mè'l'è quèo tè'ya me macaja'a.
44 ¿Jaje pa'ito me yo'oquè Cristo David tsècapè aquè pa'iquè'ni, tsoe jare ipi Davidpi Yè'è Ējaè cato?"

Ju'isicohua'i Huèiye Ayere Señe

(Mt. 23.1-36; Mr. 12.38-40; Lc. 11.37-54)

45 Si'a pai asahuè, Jesús i ye'yacohua'ire jaje cajèna:

46 "Cuañese'le ye'yacohua'i cato tsoa caña suñani cui'ne de'oyerepa jai pai pa'i huè'ñapi pèpajèna, cui'yere yècohua'i a'è, cui'ne pai tsi'si huè'ñaji ai de'o ñu'i saina co'ejè ja'ruyere yècohua'i a'è, jerepa pa'iohua'i a'è cajè. Jaje yo'oye mèsaruta'a de'hua ñajè'è. Cui'neje yo'oma'pè pañu'u cajè.

47 Cui'ne hua'jeohua'ireje iohua'i huè'ña jiojè yo'ocohua'i a'è, cui'ne paipi de'ocohua'i a'è cajajè cajè, tsoerepa secohua'i a'è. Jaje pa'ina, jaohua'i a'è, iti co'ayerepa sai cuañoja'cohua'i."

Peocopi Maija'quère Isiye

(Mr. 12.41-44)

21 ¹Jesús ñapi, jaiye pacohua'ipi Maija'quère se huè'ena cacajè, mahuèana curiquè ayajè Maija'quère isijèna. ²Cui'ne ñapi, te'o hua'jeo macapi caya a'ri tè'ña mahuèna ayacona. ³Ñani Jesupi capi:

"Nuñerepa cayè, mèsarute. Ico hua'jeo ti peocopi si'ahua'i isiye jerepa isio. ⁴Jaje pa'ina, jaohua'i si'ahua'i isihuè, iohua'i huero jujajèna, nèañere. Jaje pa'iquèta'are jao ti peocopi isio, si'aye io paco pa'i mañare."

Maija'què Huè'e Nejosico Pa'i Ja'ñe

(Mt. 24.1-2; Mr. 13.1-2)

⁵Yecohua'ipi cocare cahuè, Maija'quère se huè'e ayere, cui'ne io de'o quèna pèapi nesico pa'yere cui'ne Maija'quère coa isisi co'amañapi nesico pa'yere. Jaje cajèna, Jesupi capi:

⁶"Yequè mu'se mèsaru ñase'le peo huè'ña nejo ja'ñe ti'asipi, yequè quèna pè èmjè'le tuiyeje peoyerepa."

Ja Yè'ta'a Yeja Carajaima'ñè Iño ja'ñe

(Mt. 24.3-28; Mr. 13.3-23)

⁷Jaje caquèna, sei'è, ite:

"¿Ye'yaquè, je yèhua jaje mè'l'è case'eje yo'oja'coa'ni? ¿Me yo'o iñoñe pa'lja'coa'ni, iye yo'oye ti'lañe ja'i maca pa'ito cahuè?"

⁸Cajèna, Jesupi capi:

"De'hua ñajè'è, mèsarute cosojè. Jaje pa'ina, cayè. Jai pai yè'è mamire cajè yo'oja'cohua'i pa'lja'cohua'i a'è, 'yè'è a'è, Cristo,' cui'ne 'yure a'è.

Tsoe ti'api' caja'cohua'i a'ë. Jaje catoje, sehuoma'pë pa'ijë'ë. ⁹Yeque yejapi cui'ne yeque yejana uihuaye pa'ina, cui'ne sa'ne iti yeja acohua'ija'a uihuaye pa'ina, asani, quëquëma'pë pa'ijë'ë. Jaje iyepi du'ru tëto saiye pa'ija'coa. Jaje pa'iquëta'are ja yë'ta'a carajaiñerepa ti'añe paja'coa."

¹⁰Ai jerepa yequeje ñeje capi:

"Te'e jai yejapi cui'ne jai yejana se uihuaye pasipi. Cui'ne yeque paipi yeque pai ja're uihuaja'cohua'i a'ë. ¹¹Pasipi, yeja ñu'cueyeje, ao ëa ju'iñe. Cui'ne coa si'a hue'ña ju'i dahuë pasipi. Cui'ne ma'tëmopi huajëya'ye yo'oye pa'ina, ñaja'cohua'i a'ë. Cui'ne jaiye ti ña ma'ñere ñaja'cohua'i a'ë.

¹²Ja yë'ta'a iye si'aye yo'oma'në, mësarute tseajë cui'ne josa yo'oja'cohua'i a'ë. Jaje yo'ojë co'acohua'i a'ë cajë saja'cohua'i a'ë, pai tsi'si hue'ñana. Paire co hue'ñana coja'cohua'i a'ë. Jaje yo'ojë pai ëjahua'i quë'rona, cui'ne cuañecohua'i quë'rona saja'cohua'i a'ë, yë'ë mami do'ire. ¹³Jaje yo'ojëna, mësarute yë'ë cocare quëacaija'cohua'i a'ë. ¹⁴Jaje pa'ina, tsearena, ca ja'ñere ne de'huañu'u cajë ai cuasama'pë pa'ijë'ë. ¹⁵Jaje pa'ina, yë'ëpi ta'ñe coca caye isiquëna, mësarute sañope yo'ocohua'ire sañope de'hue sehuoye peoyerepa cui'ne quëcoye peoyerepa caja'cohua'i a'ë, mësarute. ¹⁶Jaje pa'iquëta'are mësarute ja'quëohua'ipi, yo'je tsipi, do'ijëpi cui'ne cajeohua'ipi, tseani yecohua'ina isija'cohua'i a'ë, cui'ne yecohua'ini huani jeaja'cohua'i a'ë. ¹⁷Cui'ne si'a pai mësarute coeja'cohua'i a'ë, yë'ë do'ire. ¹⁸Jaje yo'ojëta'are mësarute siopë naña me macaje te'ojë ne huesëye pasipi. ¹⁹Yo'ojama'pë nuñerepa pa'isicohua'i pani, ti pa'iyere pana ti'aja'cohua'i a'ë.

²⁰Jerusalén daripëre soldado paipi tëhuo tël'jaisico pa'iona, ñani ja maca cuasajë'ë, yure maca nejosico pa'ija'coa cajë. ²¹Ja maca Judea pa'icohua'ipi catiye pa'iji, jai cutihuëna. Jerusalén daripë pa'icohua'ipi etani saiye pa'iji, yeque hue'ñana. Cui'ne tsio pa'icohua'ipi co'iyë peoji, cui'na daripëna. ²²Ja mu'seña cato iohua'i yo'osi do'ire sai mu'seña pasipi. Jaje yo'o mu'seña si'aye toyase'e ti'asipi. ²³Co'ayerëpa ja mu'seña tsi ëta pëa maña cui'ne tsi tu'ña pacohua'i maña ai yo'oja'cohua'i a'ë, Maija'quë pëi ai yo'oye nesi maca. ²⁴Jaje pa'ina, huajore huajë yecohua'i huahuoja'cohua'i a'ë, yecohua'ini coa tseajë coa si'a hue'ñana saja'cohua'i a'ë. Cui'ne judío pai peocohua'ipi Jerusalén daripë tsa'cu huesoja'cohua'i a'ë, Maija'quë ña nëosi tëcahuë, carajai macaja'a.

Pai Mamaquë Dani Coñe

(Mt. 24.29-35, 42-44; Mr. 13.24-37)

²⁵Ja maca ëse yo'oye, cui'ne ñañë yo'oye cui'ne ma'ñocohua'i yo'oyere ñajë iye yeja pa'icohua'ipi cuasa co'me huesësicohua'i pa'ija'cohua'i a'ë, jai tsiayapi co'poco ai pisiqüëna, asajë quëquësicohua'i pa'ijë. ²⁶Pai coa quëquë huesëjë ju'ise'eje pa'iohua'i dahuëra etajajëna, yo'oja'cohua'i a'ë, iye yeja carajai yo'o maca, ma'tëmo tuture paque tsasija'coa. ²⁷Ja maca ñaja'cohua'i a'ë, Pai Mamaquë sirija'a tutu quë'ire papi cui'ne i de'oye

pa'iyepi daina. ²⁸Jaje pa'ina, iyepi si'aye yo'o huëoquëna, ñani sihuajë'ë, cui'ne siopëa maña mëani ñajë'ë, tsoe de'oye pa'iyepi mësarute isija'quëpi daija'quë api cajë."

²⁹Ja maca quëapi, pai ñajëna, soquë yë yo'oyeje pa'ye ñani quëaquë capi:

"Higuera soquë yë yo'oyeje pa'ye yo'oja'coa. Tsoe mësarupi ta'ñe asacohua'i a'ë, io yo'oye. ³⁰Jaje pa'ina, ja'opi mëa huëoquëna, ñani ometëcahuë ti'añe ja'yere pa'iji, cacohua'i a'ë. ³¹Jaje cui'ne yë'ë case'epi ti'aque yo'o huëoquëna, ñani tsoe ti'aji. Ja'yere pa'iji, Maija'quë cuañe te'te.

³²Nuñerepa cayë. Si'aye iye jaje yo'o saoja'coa. Ja yë'ta'a yure iye yo'o huëo ñasicohua'i pa'icohua'i juju sama'në. ³³Jaje pa'ina, ma'tëmo, yeja pani tējini carajaija'coa, yë'ë cocata'a ti pani huesëja'coa.

³⁴De'hua ñare pajë pa'ijë'ë, më joñoare jëa joyo neñere, co'aye yëyere, çono cuepeyere cui'ne iye yeja pa'ijë de'oye pañu'u cayere, ja mu'se ti'aqueña, cuasama'pë yo'oyepi. ³⁵Trampana sioñeje yo'oja'coa, ja mu'se si'a hue'ña yeja pa'icohua'ire. ³⁶Ne de'huasicohua'ipi pa'ijë'ë, Maija'quëre si'anë sejë, iye tëto saitoje jëasicohua'i pa'icohua'ipi Pai Mamaquë daina, de'oyepi iñoja'cohua'i."

³⁷Ja mu'seña cato Jesús ye'yapi, Maija'quëre se huë'e Jerusalén pa'icóna. Cui'ne ñamire Olivos hue'yosi cutihuëna sani pëapi. ³⁸Jaje pa'ina, si'a nea hue'ña paipi daë'ë, Maija'quëre se huë'ena i quëaquëna, asañu'u cajë.

Jesure Tseña Cuasayere

(Mt. 26.1-5, 14-16; Mr. 14.1-2, 10-11; Jn. 11.45-53)

22 ¹Jujuma' ao aiñe ti'añe ja'i maca pa'iji, ja cato. Egípto pai mamajëse'ere huai Israel pai mamajëre huaiye pase'ere co'ye cuasajë sihuajë yo'oye pa'iji. ²Ja mu'seña Maija'quë huë'e ñacaicohua'i ëjaohua'i cui'ne cuañese'e ye'yacohua'ipi, Jesure me neni huani jëoja'cohua'i a'ni cuasajë co'ehuë, ite asa pa'ini ca'rajë.

³Ja maca huati ëjaëpi Judas cui'ne yequë mami Iscariote hue'equëna cacapi, doce Jesús soisicohua'i aquëna. ⁴Cacaquëna, jaëpi saji'i, Maija'quë huë'e ñacaicohua'i ëjaohua'i quë'rona cui'ne Maija'quëre se huë'e ñacaicohua'i quë'rona sani jaohua'i ja're çoni Jesure ñeje yo'oni tseani mësarü jëñana isi'ñe pa'i api capi. ⁵Jaje caquëna, asani jaohua'i ai sihuajë curiquë sañu'u ca neohuë, ite. ⁶Cajëna, ipi sehuoni ite tseja ja'ñere me pai peo maca ite tseani isija'quë a'ni cuasaquë i yo'o ja'ñe co'epi.

Na'i Maca Jesús Aise'e

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷Jujuma' ao aijë cui'ne yëi ñamare huani Maija'quëre isijë se mu'se ti'api. ⁸Ti'aëna, Jesupi Pedrore cui'ne Juanre jëjo saquë capi:

"Sani ne de'huajë'ë, na'iquëna ai ja'ñere Israel pai fiestare cuasajë."

⁹Jaohua'ipi ite se'i'ë:

“¿Jerona ne de'huaye'ni?”

¹⁰Cajëna, Jesupi sehuopi:

“Mësaru jai daripëna caca maca tì'aja'cohua'i a'è, te'i èmëpi yurupëna oco saquëni. Tì'ani ì huè'ere pana tuijè'è. Ipi cacacuëna, ñani te'le cacajè'è. ¹¹Cacani ja maca ìti huè'le aquère sejè'è: ‘¿Jerore pa'ico'ni, yè'è ye'yacohua'i ja're conì na'iquëna, Israel pai fiestare cuasajè aija'a tu'rihuè? Capi ye'yaquëpi, cajè'è. ¹²Jaje cajëna, ipi ñnosipi, èmëje'le tu'rihuëpi, jai hue'ñapi tsoe si'aye pa'iconi. Ñani jarona ne de'huajè'è.”

¹³Jaje caëna, jaohua'ipi sani ja're Jesús case'eje tì'ahuè. Tì'ani Israel pai fiesta yo'oyere cuasajè ne de'huaè.

¹⁴Ao aïne tì'asi maca Jesús cui'ne ì ye'yacohua'i conì ja'ruhuè, ao ai saihuëna. ¹⁵Ja maca Jesupi capi, jaohua'ire:

“Mësaru ja're conì iye fiesta na'iquëna, aïne yèhuè. Ja yè'ta'a yè'è ai yo'oye tì'ama'nè. ¹⁶Jaje pa'ina, cayè, mësarute. Tijupè cui'naëpi mësaru ja're conì iye fiesta yo'o coñe paja'què a'è, iye yejana. Iye yo'oye Maija'què te'tena ne sao maca ja maca ani co'si'.”

¹⁷Ja maca jaje canì ucu duruhuè ìni Maija'quère de'o'ji, se pëpani capi:

“Iyere ìni huahuejè'è. ¹⁸Care payè, mësarute. Tijupè cui'naëpi cuiya'i cono ucuma'è pa'ija'què a'è, Maija'què cuañe te'tena yo'oye tì'añe pato.”

¹⁹Ja jeteyo'je panpè ìni Maija'quère de'o'ji se pëpani ipi hua'quequè jaohua'ina isipi. Isini capi:

“Iye yè'è ca'è. Iye yo'oyeje pa'yere yo'ojè'è, yè'ère cuasajè.”

²⁰Jaje cui'ne ucu duruhuèje ani tējini ìni capi:

“Iye ucu duruhuè cato huajèye yo'o ja'ñere ca nèoñe a'è, yè'è tsiepi mësaru de'oye pa'i ja'ñere caquè nejoja'a do'ipi.

²¹Jaje pa'ina, yè'ère cosoquè tseani yecohua'ina isija'què ñnore pa'iji, yè'è ja're te'le ao ai saihuëna tèose'epi. ²²Jaje yo'oye pa'iji, Pai Mamaquè cato jare ìte quèa nèosi ma'aja'a saiji. Jaje pa'iquèta'are ìteaye pa'i pa'iji, ìti yehuoja'què!”

²³Ja maca jaje caëna, iohua'ija'a sa'ñe sei'è, “¿nepi mai aquè yehuoja'què a'ni?” cajè.

Nepi Jerepa Pa'iquè Api Sa'ñe Caye

²⁴Ja maca sa'ñe cajè, “¿nepi ai jerepa pa'i pa'ija'què a'ni?” cahuè.

²⁵Cajëna, Jesupi sehuopi:

“Yejaña èjaohua'ipi ìti necaicohua'ire cajè cuañecohua'i a'è, cui'ne ìti yeja de'oye pa'i ja'ñere cajè necaicohua'ipi, cajeohua'ire hue'yocohua'i a'è, iohua'i èjaère. ²⁶Jaje pa'iquèta'are mësaru cato jaje yo'ocohua'i pa'iye peoji. Coa ai jerepa ñeje yo'oye pa'iji. Ìti ai jerepa pa'ipi mësaru aquè cato tsì posèje pa'i pa'iye pa'iji, cui'ne ìti cuañequëpi coa necaiquèje pa'i pa'iye pa'iji. ²⁷Jaje pa'ito, ¿ne a'ni, ai jerepa pa'i, ao ai saihuëna ja'runi ñu'i aiquè, panita'a ìti aore sa aiquè? Jaje pa'ina, mësarupi ñato ao ai saihuè ñu'iquè api jerepa pa'iji, cayè. Jaje pa'iquèta'are yè'è cato mësarute necaiquè pa'iyè.

28 Mësaru a'ë, yè'ère ai yo'oye pa'ina, si'anè yè'è ja're çoni pa'isicohua'ipi. 29 Jaje pa'ina, mësarute yè'èpi cuañecohua'i pa'i ja'nere, ja'què yè'ère isise'jeje isiyè. 30 Yè'è ja're çoni ao ai saihuèna, yè'è cuañe hue'nana aijajè cui'ne ucuja'cohua'ini cui'ne cuañecohua'i ñu'i saire pana ja'rujajè doce Israel pai tsècapè acohua'i yo'ose'ere ña de'huaja'cohua'ini pa'ija'cohua'i a'ë, mësaru."

Pedro Jesure Ñama'què A'ë, Caye

(Mt. 26.31-35; Mr. 14.27-31; Jn. 13.36-38)

31 Èjaèpi yequeje capi:

"Simón, Simón Satanáspi mè'ère trigo ñu'cuyeye pa'ye yo'osi'i caquè seji'i. De'hua ñajè'è. 32 Jaje pa'iquèta'are yè'èpi mè'èni caquè Maija'quère seçacaè'è, mè'è cuasayepi de'oye pa'ijaquè caquè. Mè'èpi ja yo'oye tètò sani yè'èna ponèsi maca. Coçaijè'è, mè'è yo'je tsìre nuñerepa pa'ija'cohua'ini."

33 Jaje caquèna, Simónpi capi:

"Èjaè, yè'è cato mè'è ja're çoni co hue'ña cotoje co cuañosi'i cuasayè, cui'ne ju'iñe pa'itoje te'e ju'iñere yèyè."

34 Caquèna, Jesupi capi, ite:

"Pedro, care payè. Mè'ère iye ñata tome maca ja yè'ta'a cura yè'ima'èna, toasoñe pa'ye cosoja'què a'ë, mè'è ñama'què a'è ite, yè'è caquè."

Ti'a Tèjiji, Jesús Ai Yo'oye

35 Jesupi seji'i, jaohua'ire:

"Mësarute topèa peocohua'ire cui'ne curiquè peocohua'ire, cui'ne zapatoje peocohua'ire jèjo saosi maca ¿mësarute co'amaña jopo caraè?"

Jaje seina, iohua'ipi cahuè:

"Pani."

36 Cajèna, capi, jaohua'ire:

"Jaje yo'ose'e pa'iquèta'are yure cato ti'ne yeque yo'oye pa'iji. Jaje pa'ina, topè paquè pani saye pa'iji. Cui'ne curiquè ayacore paquè pani saye pa'iji. Cui'ne hua'ti peoquè pani dèi ju'i care isiquè curi neni hueroye pa'iji, hua'tije. 37 Yè'èna tsoe toyajè pa'ise'ere ti'añe pa'iji. Ja toyase'epi caji: 'Co'acohua'i ja're çoni cuècuehuè.' Jaje pa'ina, si'aye toyase'e nuñerepa ti'añe pa'iji, yè'èna."

38 Jaje caquèna, jaohua'ipi cahuè:

"Èjaè, iñore caya hua'ña pa'iji."

Jaje cajèna, ipi sehuopi:

"Tsoe ti'api."

Jesús Getsemaní Què'rona Señe

(Mt. 26.36-46; Mr. 14.32-42)

39 Ja maca saji'i, etani Olivos cutihuèna noni i sai hue'nana. Saina, i yelyacohua'ije çoni tuè'è, ite. 40 Iti hue'ña ti'ani, jaohua'ire capi:

“Sejè'è, huati neña maca taiñe paja'cohua'i.”

41 Cani ja jeteyo'je Jesús jaohua'ire jeoni saji'i, quèna pè jeoñe ja'i macana. Jaron a do're ja'runi seji'i, Maija'quère. 42 Ñeje caquè:

“Ja'què, mè'èpi iye sèje cono da'ca nejocaiye pa'ito nejocajjè'è, ai yo'o ja'ñere. Ja yè'ta'a yè'è cuasase'je yo'oma'è pa'ijjè'è. Coa ai jerepa mè'è cuasase'ere yo'osi'l.”

43 Jaje pa'ina, Maija'què huíñaèpi ma'tèmopi ñaipi, ite tutu isisi'i caquè.

44 Jaje ai oi yo'oquè ai jerepa tutu Maija'quère seji'i cui'ne i ai èsè cajeyeje pa'ye tsiepi yejana cajepi.

45 Jaje Maija'quère seni tējini huèni saji'i, i ye'yacohua'i què'rona. Ti'acquè ñaquèna, oiyepi quèco huesouna çaisicohua'ipi paè'è. 46 Pa'ijjèna, ja maca capi, jaohua'ire:

“¿Me yo'ojè çaisicohua'ipi uíñe'ni? Huèijjè'è. Huèni sejè'è, huatipi neñaquèna, tājima'pè pa'ija'cohua'ipi.”

Jesure Tseñe

(Mt. 26.47-56; Mr. 14.43-50; Jn. 18.2-11)

47 Jesupi ja yè'ta'a cocare caèna, jai pai ti'asi macaje Judas hue'equè doce i soisicohua'i aquèpi du'ru daji'i. Daina, yecohua'i jeteyo'je daè'è. Jaèpi ti'ani Jesure tsu'susi'i caquè tsio daji'i. 48 Tsio dai maca Jesús ite capi:

“Judas, ¿coa tsu'suquè sihuayeje pa'yepi yo'oquè yehusosi'i caquè yo'oquè Pai Mamaquère, mè'è?”

49 Ja maca Jesús ja're conì pa'icohua'ipi ñani seì'è:

“Èjaè, ¿hua'ñapi jaohua'ire huaiye de'oquè?”

50 Jaje se maca iohua'i aquèpi tsoe Maija'què huè'e ñacaicohua'i èjaè jo'yaèni èja te'te cajorona tètopi, peo te'terepa. 51 Jaje yo'oquèna, Jesupi capi:

“Jeojè'è, tsoe de'oji.”

Ja maca Jesús Maija'què huè'e ñacaicohua'i èjaè jo'yaè cajorore cui'naoni ini tuacaji'i. 52 Ja jeteyo'je Maija'què huè'e ñacaicohua'i èjaohua'ire cui'ne Maija'què huè'e ñacai soldado pai èjaohua'ire cui'ne aiohua'ire Jesupi capi, ite tseani sañu'u cajè daisicohua'ire:

“¿Co'amaña ñaère yo'oyeje pa'ye mèsaru tarapi, hua'ñapi conì date? yè'ère tseañu'u cajè. 53 Yè'è mèsaru ja're conì si'a mu'seña Maija'quère se huè'e pa'ina, mèsarupi yè'ère pu'pema'pè pa'isicohua'ita'a jaje yo'o macapi ti'aèna, mèsaru yo'ojè neañepi quèco huesosi maca.”

Pedro Cosose'e

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Ja maca Jesure tseani coñu'u cajè sahuè, Maija'què huè'e ñacaicohua'i èjaè huè'ena. Sajèna, cui'ne Pedroje tujì'i, so'o maca se ñaquè. 55 Jaro hue'se daripè tēhuo sitopi toa suahuè. Suani ja'ru tè'ijaè'è, ioja'a. Cui'ne Pedroje iohua'i ja're conì ja'rupi. 56 Ja maca te'o huè'e necaicopi toa yè'què macare ja'rusiquèpi toa mia hue'ñare ñu'ina, ise'ere ai ñani cao:

“Iquë Jesús ja're coní pa'isiquë api.”
 57 Jaje cacona, Pedropi cosoquë capi:
 “Ñama'quë a'ë, ite.”
 58 A'ri maña tsoe pa'i maca yequëpi sani cui'ne capi:
 “Më'ëje Jesús ye'yacohua'i aquë a'ë.”
 Jaje caquëna, Pedropi capi:
 “Pani. Yë'ë yequë a'ë.”
 59 Te'e hora tëto sai maca yequë cui'ne títani capi:
 “Nuñerepa më'ë ì ja're coní pa'isiquë a'ë. Cui'ne jaje pa'ipi Galilea aquë a'ë, më'ë. Asayë, më'ë cocana.”
 60 Caquëna, Pedropi capi:
 “Huesëyë, yë'ë më'ë caye. ¿Iquere caquë'ni, jaje pa'ye?”
 Ja yë'ta'a itire Pedro caquëna, cura yëji'i. 61 Yë'ina, ja maca Èjaëpi co'ye ponëni ñapi, Pedrorre. Ja maca Pedro Èjaë case'ere cuasa ñajaji'i: “Ja yë'ta'a cura yë'ima'ëna, toasoñe pa'ye cosoja'quë a'ë, më'ë case'ere.” 62 Ja maca Pedro hue'sena etani ai oji'i, ì tayose'ere co'a ju'i.

Jesure Cue'cueye

(Mt. 26.67-68; Mr. 14.65)

63 Jesure tseani pacohua'ipi cue'cuejë cui'ne ite tara pëapi të'cahuë.
 64 Itë ñaco ça cañapi sëani tsiana mosicapi të'cajë cahuë:
 “¿Se ca ñajë'ë. Nepi të'care'ni?”
 65 Cui'ne jaiye yequë cocajë cahuë, ite tea ju'ijë.

Judío Pai Ca Tëjicohua'ipi Jesure Yo'oye

(Mt. 26.59-66; Mr. 14.55-64; Jn. 18.19-24)

66 Mu'se pa'i maca Judío iohua'i Maija'quë huë'e ñacaicohua'i ëjaohua'i, cui'ne cuañese'e ye'yacohua'i tsi'sini Jesure sahuë. Jerepa ëjaohua'ipi ca tëjicohua'irepa quë'rona, sëni asañu'u cajë, sani cahuë:
 67 “Quëajë'ë. ¿Më'ë aë, Cristorepa?”
 Cajëna, ipi sehuopi, jaohua'ire:
 “Yë'ë ì a'ë catojë mësarú coa caji cuasaye pa'iji. 68 Cui'ne yë'ëpi mësaruni sequë pa'ito yë'ë señere sehúo tì'añe peoji, cui'ne joye saoyeje paja'cohua'i a'ë. 69 Jaje pa'isicohua'ita'are yureta'a Pai Mamaquë Maija'quërepa ëja tē'tere ja'rusiquëpi ñu'lja'quë api, Èjaërepa pa'lja'quëpi.”
 70 Jaje caquëna, ja maca si'ahua'i ite se'ì:
 “¿Jaje pa'ito më'ë aë, Maija'quë mamaquë?”
 Sejëna, Jesupi sehuopi:
 “Jaje pa'ijë'ë. Yë'ë a'ë, mësarú cayeje.”
 71 Caquëna, ja maca iohua'ipi cahuë:
 “¿Iquere cajë ai jerepa ì caquëna, asasicohua'ire co'eye'ni? Tsoe maipi asahuë, ì yë'ore pare cahuë.”

Pilatona Jesure İsiye

(Mt. 27.1-2, 11-14; Mr. 15.1-5; Jn. 18.28-38)

23

¹Ja maca jaje cani si'ahua'i huëni Jesure sahuë, Pilato quë'rona.

²Jarona co'acquëre papi ca huëohuë, ñeje cajë:

“Iquë co'aye yo'oye ti'ahuë, yëquë p̄aini co'a de'huaquë cui'ne pai do'i saïma'pë pa'ijë'ë, romano p̄ai ëjaëre caquë. Cui'ne, jare ipi yë'ë Cristo, p̄ai ëjaëre pa'ë caquë api.”

³Jaje caquëna, Pilatopi seji'i, ite:

“¿Më'ë a'ë, judío p̄ai ëjaë?”

Caquëna, Jesupi sehuopi:

“Jaje pa'ijë'ë, më'ë case'je.”

⁴Caquëna, ja maca Pilato capi, jaohua'ire Maija'quë huë'e ñacaicohua'i ëjaohua'ire, cui'ne p̄aire:

“Iquë co'aye yo'oye ti'ama'ë pa'iyë.”

⁵Caquëna, johua'ipi ai tutu cahuë:

“I ye'yapi si'a Judea p̄aire co'a de'huaquë sañope ëjaohua'ire, yo'ocohua'ire nequë api. Jaje pa'ipi yure ñona cui'ne yo'oji, Galileapi huëosiquëpi.”

Herodesna Jesure İsiye

⁶Pilatopi jare asani, jaje pa'ito iquë Galilea aquë a'ë capi. ⁷Jaje pa'ina, mësarupi jaro aquë api carena, Herodes quë'rona jëjo saosi'i, Galilea daripë cuañequëna, capi. Ja mu'seña cato jaëje Jerusalénre paji'i. ⁸Sarena, Herodespi ñani ai sihuaquë ai tsoe coa ña ëa ju'i pa'iquëpi i yo'oyese'e cajëna, asaquë paji'i. Jaje pa'ipi p̄ai yo'o ti'a ma'ñere yo'oquëna, ñasi'i caquë pa'iquë paji'i. ⁹Jaje pa'ipi jaiye seji'i. Sequëta'are Jesús te'oreje sehuoma'ë paji'i. ¹⁰Cui'ne jarote Maija'quë huë'e ñacaicohua'i ëjaohua'ipi cui'ne cuañese'e ye'yacohua'ipi jaohua'ipi ite ai sañope cacohua'i pa'ë. ¹¹Ja maca Herodes cui'ne i soldado p̄ai tea ju'ijë co'aye yo'ohuë. Coa ñni cue'cueñu'u cajë suñahuë, de'o cañare p̄ai ëjaohua'i ju'i care. Ja jeteyo'je cui'naëni Pilato quë'rona jëjo saopi. ¹²Ja mu'se Pilato cui'ne Herodes cajeohua'i de'ohuë, ja'rë p̄eicohua'i pa'isicohua'ipi.

Jesure Huaiye Pa'iji, Caye

(Mt. 27.15-26; Mr. 15.6-15; Jn. 18.39-19.16)

¹³Ja maca Pilato Maija'quë huë'e ñacaicohua'i ëjaohua'ire cui'ne p̄ai ëjaohua'ire tsi'soni, ¹⁴capi:

“Mësarupi dahuë, iquëre yë'ë quë'rona co'aye p̄aire yo'oji cajë. Jaje pa'iquëta'are yë'ëpi seni asasi'i caquë mësarupi ñajëna, yo'ohuë. Jaje pa'ina, tsoe mësarupi ñahuë, do'i peoquë pa'ina. Jaje pa'ito ique do'ire ite co'aye caye'ni. ¹⁵Jaje pa'ina, Herodesje ti co'aye yo'oma'quë pa'ina, ña jujani jëjo daopi. Jaje pa'ina, iquëre huani jëone peoji. ¹⁶Jaje pa'ina, coa si'seni jeteyo'je joye saoja'quë a'ë, pa'ija'quëre.”

17 Jaje fiesta mu'seña cosicohua'ire te'ire eto saoque pajil'i, paire de'oye yo'osil'i caquë. 18 Jaje caquëna, si'ahua'i cui huëohuë:

“¡Jaëte huani jeoñe pa'iji! ¡Barrabásni eto saojë'è!”

19 Iquë Barrabás cato paire huaisiquëni cosiquë paji'i. Cui'ne ja daripë pai ìohua'i ëjaohua'ire uihuaye huëoquëpi. 20 Pilato cato Jesuni etoye yëpi. Jaje pa'ina, tijupë ca cöpi. 21 Caquëna, ai jerepa tutu cuihuë:

“¡Queja'quë api, queja'quë api!”

22 Toasoñe aye Pilato capi, jaohua'ire:

“¿Iquere co'aye yo'o u'ni, i? Yë'ë ì co'aye yo'ose'e tì'ama'ë pa'iyë. Jaje pa'ire çme coa huaiye'ni? Jaje pa'ina, coa ai si'seni jëjo saosil'i, pa'ija'quëre.”

23 Jaje caquëna, ai jerepa tutu cuihuë, queja'quë api cajë. Jaje ai cui do'ipi Maija'quë huë'e ñacaicohua'i ëjaohua'i case'e ja yo'oye tì'ahuë. 24 Ja maca Pilato ìohua'i yëjë cayeje yo'ose'e pa'ijaquë cuasapi. 25 Cuasani jaje ìohua'i casiquëni eto saopi, paire huaiquë co'aquëni. Ja maca Jesuni ìohua'i yëyeje huaija'quëre isipi.

Ite Quese'e

(Mt. 27.32-44; Mr. 15.21-32; Jn. 19.17-27)

26 Ja maca Jesure queja'quëre sajëna, Cirene aquëpi Simón hue'equëpi sañope daina, tì'ani tseani cuañehuë, Jesure queja'core cruzu hue'equë saja'quëre cajë Jesupi du'ru saina.

27 Jaje saina, jai pai tuë'ë. Cui'ne nomiohua'ije jai pai oijë cuijë saë'ë, ìni co'a ju'ijë. 28 Jaje oijëna, Jesús ñani capi, jaohua'ire:

“Jerusalén nomiohua'i oima'pë pa'ijë'ë, yë'ëre. Coa ai jerepa mësaruja'a cui'ne mësaruru mamajëni oijë'ë. 29 Yequë mu'se ñeje caye tì'aja'coa: ‘Nomiohua'i mamajëre peocohua'i, tsì pama'pë pa'isicohua'i, cui'ne ojeje tsosama'pë pa'isicohua'i jerepa sihuaja'cohua'i a'ë.’ 30 Cajëna, paipi ca huëoja'cohua'i a'ë, ai cutire: ‘Yëquëna quëñojë'ë’ cui'ne a'ri cutihuëare caja'cohua'i a'ë, ‘Yahuejë'ë, yëquëre.’ 31 Huajë soquë yëje pa'ini yë'ëre jaiye yo'oni me mësarute paja'cohua'i a'ni cuënisil'i soquë yëje pa'iohua'ire.”

32 Jesús ja're cöni huaija'cohua'ire caya paire sahuë, co'amaña yahue ñacohua'ire. 33 Ja maca Pai Siöpë hue'yosil'i hue'ñana tì'ani Jesure quehuë. Cui'ne caya co'a paire cöni, yequëni ì ëja te'tena cui'ne yequëni ì ari te'tena nëcohuë. 34 Ja maca ìte quejëna, Jesupi capi:

“Ja'quë oijë'ë, jaohua'ire ìohua'i yo'oye huesëjë yo'ocohua'ire.”

Soldado paipi Jesús ju'l'i care dutani sa'ñe ìohua'ija'a nepi, iote paja'cohua'i a'ni cajë yo'ohuë. 35 Jaje yo'ojëna, paipi ai ñahuë. Cui'ne pai ëjaohua'ique cue'cuejë cahuë:

“Yecohua'ire huasopi. Yureta'a co'ye huasoyere paji, nuñerepa Cristo Maija'quë tsequërepa pani co'ye huasoye pa'ini.”

36 Cui'ne soldado paije cue'cuejë ìte o'sa cuiya'i conore ocuasi'l'i cajë yo'ohuë. 37 Jaje yo'ojë ìte cahuë:

“Judío pai ëjaë pani më'ëja'a co'ye huasojë'ë.”

³⁸Cui'ne ì siopë ìmëje'ere toyasico paco'ë, griego, latín cui'ne hebreo cocapi ñeje: IQUË JUDÍO PAI ÈJAËPI.

³⁹Co'aye yo'ocohua'i aquëre que deosiquëpi ìti maca dequëpi tea ju'i co'aye capi, ñeje:

“Më'ëpi Cristorepa pani më'ëja'a co'ye huasoni jeteyo'je yëquëre huasojë'ë.”

⁴⁰Jaje caquëna, yequëpi ì cajeire capi cama'ë:

“¿Maija'quëre ca'rama'quë, më'ëje cui'ne ju'ija'quë me casi'ni? ⁴¹Mai cato nuñerepa co'aye yo'ocohua'ipi yo'o cuañoñë, jare mai co'aye yo'osi do'ire saijë. Jaje pa'iquëta'are iquë ti co'aye yo'oma'quëpi yo'o cuañoji, ñaquë më'ë.”

⁴²Cani ja maca capi:

“Jesús huanëyema'ë pa'ijë'ë, yë'ëre më'ë cuañe huëo maca.”

⁴³Caquëna, Jesupi capi, ìte:

“Nuñerepa cayë, më'ëre. Yurepi yë'ë ja're conì pa'ija'quë a'ë, de'o hue'ñiare.”

Jesús Ju'ise'e

(Mt. 27.45-56; Mr. 15.33-41; Jn. 19.28-30)

⁴⁴Mu'se joporepa pa'i maca si'a yeja ñamije pa'iorepa de'opi, tres pa'i macaja'a na'iquëna. ⁴⁵Èsëje miañe pani cui'ne ta'tëpo capi Maija'quëre se huë'e Maija'quë pa'i sito tëhuosicoje jopore paja'a tsata saji'i, ìmëje'epi meñe huë'ehuëre pana. ⁴⁶Ja maca Jesupi cui'pi:

“Ja'quë, Ja'quë yë'ë joyo më'ëna ìsi nëoñë.”

Jaje cani juni huesëpi.

⁴⁷Ja maca capitán, romanopi iye yo'ose'ere ñani Maija'quëre sihuaquë capi:

“Nuñerepa iquë ti co'aye yo'oma'quë paji'i.”

⁴⁸Si'ahua'i ja maca pa'isicohua'ipi ìte yo'ose'ere ñani quëquë huesëjë coti saihuëana të'cajë saë'ë. ⁴⁹Jaje saijëta'are si'ahua'i Jesús ñacohua'ipi cui'ne nomiohua'i Galileapi tuisicohua'ipi so'ona pëani ñahuë, iye yo'oye.

Jesure Tase'e

(Mt. 27.57-61; Mr. 15.42-47; Jn. 19.38-42)

⁵⁰Paji'i, te'i nuñerepa yo'oquëpi ì mami José hue'equëpi, Judea yejare Arimatea daripëre pa'iquë. Jaë cato judío pai ëjaohua'i aquë paji'i. ⁵¹Iquë José cato Maija'quë te'te aye yo'oye ñasi'i cuasaquë utequë paji'i. Jaje pa'ipi yequë ëjaohua'i Jesure huai ja'ñere cajëna, te'e cui'ne cuasaye papi. ⁵²Jaje pa'ina, ëjaëpi Pilatore sani seji'i, Jesús capë ta ja'ñere caquë. ⁵³Cruzu dequëre casani jai cañapi ca'neni quëna yejana coje nesicono oapi, ja yë'ta'a paire tama'a cojena. ⁵⁴Huajë mu'se pa'ija'conì ne de'hua mu'se paji'i. Ja mu'se cato tsoe huëoye ja'i maca pa'iji.

⁵⁵Galileapi Jesure nomiohua'i tuisicohua'ipi sani tasi daripë ñahuë, me oare'ni, ì capë cajë. ⁵⁶Ñani ja maca huë'ena col'ini huëo së ma'ña ne de'huahuë. Ne de'huani huajë mu'se huajëhuë, ìti cuañese'e pa'iyeye.

Jesús Ju'isiquëpi Huëise'e
(Mt. 28.1-10; Mr. 16.1-8; Jn. 20.1-10)

24 ¹Du'ru macarepa co'amaña ne mu'se pa'i maca cui'naohua'ipi saë'ë, tasi daripë quë'rona nea hue'ñarepa hueo sëne ne de'huase'ere sajë. Cui'ne yecohua'i nomiohua'i conì saë'ë. ²Ja maca ti'ajë ñajëna, quëna pë daripë siosicopi tìrore pa'iona, ti'ahuë. ³Ti'ani cacajë Èjaë Jesús capëre ti'ama'pë. ⁴Peoquëna, ai quëquëhuë, me nei'ni cajë. Jaje quëquëjë ñajëna, jarote caya ëmëohua'i mia ju'i caña ju'icohua'ipi ìohua'i ja're conì nëcahuë. ⁵Jaje ña quëquëni yejare pana në me huesëjëna, ñajë jaohua'ipi, cahuë:

“¿Iquere co'eye'ni, ju'isicohua'i quë'ro? Tsoe huajëquëpi pa'iji. ⁶Ñore pa'ima'ë pa'iji. Tsoe huëji'i. Cuasajë'ë. Ja yë'ta'a Galilea pa'ima'ca ì ca'ñere, ⁷ñeje: ‘Paì Mamaquë co'aye yo'ocohua'i jëñana isisiquë pa'ija'quë api. Pa'ina, jaohua'ipi queja'cohua'i a'ë, soquë sarahuana. Jaje yo'osiquëta'a toaso mu'seña pa'i maca huajëquë huëija'quë api.’ Tsoe jare quëapi”.

⁸Jaje caëna, ja maca Jesús ca'ñe cuasa ñajaë'ë. ⁹Ja jeteyo'je daripë ñasicohua'ipi co'ini si'aye ìohua'i ñase'ere quëahuë, once soisicohua'ire cui'ne si'ahua'i ìti maca conì pa'icohua'ireje. ¹⁰Iye coca ì soisicohua'ire sani quëasicohua'i cato paë'ë: María Magdalena, Juana, María, Jacobo pëca ja'co, cui'ne yequë nomiohua'i conì. ¹¹Jaje quëajëna, ì soisicohua'ipi jaohua'i quëaye asani sehuoma'pë paë'ë, coa cuepejë cayeje pa'ye nëina.

¹²Jaje nuñerepa cayë cuasama'quëta'a Pedropi etani huë'huëquë saji'i, tasi daripëre ñasi'i caquë. Sa ti'ani ñaquëna, ìte ca'nesi caña tìrona ne saose'epi paji'i. Pa'ina, ñani ai cuasaquë saji'i, huë'ena.

Emaúsna Sai Ma'ana Yo'oye
(Mr. 16.12-13)

¹³Jare ja mu'se caya ëmëohua'i Emaús daripëna saë'ë, Jerusalénpi once kilómetro sai hue'ñana. ¹⁴Saijë Jesús ayere cajë saë'ë. ¹⁵Jaje cajë saijëna, jare ìpi Jesús jaohua'ire tsiojaji'i. Tsiojani ìohua'i ja're conì saji'i. ¹⁶Saina, a'ri maña carapi, ìohua'i ña ti'are paye ìte. ¹⁷Ja maca sai Jesupi jaohua'ire seji'i:

“¿Iquere sa'ñe cajë saiye'ni, ma'aja'a saini? ¿Me yo'ojë oicohua'i pa'iyë'ni?”

¹⁸Caquëna, jaohua'i aquë Cleofas hue'equëpi sehuopi, ìte:

“Si'a yeja Jerusalén daripë iye mu'se yo'ose'e asayë. ¿Jaje pa'iquëta'are cui'ne më'ëse'e ìti hue'ña pa'inije asama'ë pani sequë?”

¹⁹Caquëna, ja maca ìpi capi, ìte:

“¿Me yo'ore'ni?”

Caquëna, ìohua'ipi cahuë:

“Jesús Nazaret aquëpi, Maija'quëre quëacaiquëpi, si'aye tutu quë'ipi cui'ne ì cayeje Maija'quë ña hue'ñana, nuñerepa caquëpi si'a paì ña hue'ñana caquëre pare yo'ose'ere cayë. ²⁰Jaje pa'ini, quëni huani

jeohuë, Maija'quë huë'e ñacaicohua'i ëjaohua'i maire cuañecohua'i cui'ne si'a ëjaohua'i huani jeoñe pa'iji cajëna. ²¹Yëquë cato jaëpi Israel paire huasoja'quë api cajë utecohua'i paë'ë. Yure jaje pa'ijëna, si'aye iye co'aye yo'ohuë, coa toaso mu'seña ite yo'ose'e tëtosaigi, yure. ²²Jaje yo'ose'e pa'itoje ai jerepa ai cuasaye pa'iji. Yëquë ja're conì nomiohua'i pa'icohua'ipi nea hue'ñarepa sani ña quëquëhuë, tasi daripë. ²³Jesús capë peoco pa'ina, jaje ñani jaohua'ipi dani yëquëre quëahuë. Huëo canì ñañeje pa'ye huiñaohua'ire ñajëna, jaohua'ipi Jesús huajëquëpi pa'iji cahuë cajë. ²⁴Ja jeteyo'je yëquë cajeohua'ije tasi daripëre sani ñajëna, jare jaje nomiohua'i case'eye pa'ye pa'ina, ti'ani ñahuë. Jesureta'a ñama'pë paë'ë.”

²⁵Jaje quëaquëna, ja maca Jesupi capi, jaohua'ire:

“Asa ti'ama'cohua'ire pa'ni, mësarü. Je yëhua asani sehuoja'cohua'i a'ni Maija'quëre quëacaicohua'i cajë pa'ise'e. ²⁶¿Mësarupi cuasato Cristo ai yo'oye pajä'quë paquë si'aye iye ja yë'ta'a i de'o hue'ñarepa saima'ë pani?”

²⁷Jaje se canì ja maca quëa huëopi, si'aye ite yo'o ja'ñere cajë toyase'ere. Moisés toyaquë pa'ise'epi huëoni cui'ne yecohua'i Maija'quë quëaquëna, toyasicohua'i toyajë pa'ise'e conì quëapi.

²⁸Iohua'i cajë saisi daripëna ti'ani, Jesús ja yë'ta'a i sai hue'ña sasi'i caquë yo'oyeje yo'opi. ²⁹Jaje yo'oquëna, jaohua'ipi soihuë:

“Yëquë ja're conì pëajë'ë na'iji, coa ñami de'o tëjiji.” Asani ja maca Jesús iohua'i ja're conì cacani pëapi. ³⁰Pëasiquëpi ao ai sailhuëna iohua'i ja're conì ja'rusi maca ipi panpë ini Maija'quëre se pëpani jëyoni jë'yequë jaohua'ire aopi. ³¹Jaje i yo'o maca ña titahuë, ire papi cuasajë. Jaje cuasa maca tsoe peo hue'ña huesëpi. ³²Ja maca iohua'ija'a sa'ñe cahuë:

“Maipi asahuë, mai joñoa ai sihua ëaye nëiñe, ma'aja'a dai toyase'ere ipi quëaquëna.”

³³Jaje ñani ti uteye peoyerepa ma'aja'a dai huëoni daë'ë, cui'naohua'ipi Jerusalëna. Titajëna, jarote paë'ë, once Jesús soicohua'i tsi'sisicohua'ipi iohua'i cajeohua'i ja're conì. ³⁴Pa'ijëna, titani asajëna, jaohua'ije cahuë:

“Nuñerepa Jesús huëji'i. Cui'ne ise'ere iñopi, Simónre.”

³⁵Cajëna, ja maca iohua'ije quëahuë, ma'aja'a saijëna, yo'ose'ere. Cui'ne Jesupi panre jë'yequëna, ñani ite ña titase'ere.

Jesupi Ñaiñe, Ire Ye'yecohua'ina (Mt. 28.16-20; Mr. 16.14-18; Jn. 20.19-23)

³⁶Ja yë'ta'a iti yo'ose'ere cajëna, Jesús iohua'i jopore pana ñai nëcapi. Ja maca pëpapi, ñeje caquë:

“De'oye pa'ija'cohua'i a'ë, mësarü.”

³⁷Caquëna, jaohua'ipi ai quëquë huesëhuë, i pa'isi joyore ñañe cuasajë. ³⁸Jaje cuasajëna, Jesupi jaohua'ire capi:

“¿Me yo'ojë quëquë huesësicohua'i pa'iye'ni? ¿Me yo'ojë mësarü joñoa jëa coeyequë hue'eye'ni? ³⁹Ñajë'ë, yë'ë jëñare cui'ne yë'ë quëore. Jare yë'ë i a'ë,

mësarü ñasiqüërepa. Patoni cui'ne ñajë'ë. Joyo cato çapë cui'ne tara peocöa. Mësarupi yë'ëre ñajëta'a çapë tara hue'equë pa'iyë. Yë'ë a'ë, me joyo pa'iyë'ni."

⁴⁰Jaje cani jaohua'ire ñöpi, jëña cui'ne quëo ìte quëse'ere. ⁴¹Jaje yo'oquëna, ja yë'ta'a ìre papi cuasaye pa_huë, ai sihua do'ire, cui'ne quëquë do'ire. Jaje pa'ina, Jesupi jaohua'ire capi:

“¿Ai maña paye, ñö?”

⁴²Caquëna, ñi isihuë, tsiaya hua'i tsaro sëyosiconi. ⁴³Isijëna, ñi iohua'ique ñajëna, aji'i. ⁴⁴Ja jeteyo'je capi, jaohua'ire:

“Ja yo'ose'e cato yë'ë mësarü ja're ja yë'ta'a çoni pa'i case'ere yo'ohuë. Si'aye Moisés cuañese'e cui'ne Maija'quëre quëacaicohua'i toyase'e, cui'ne Salmos toyase'e si'aye ti'añë paji'i. Me paquë'ni, nuñerepa case'e. Jaje pa'ina, yo'ohuë.”

⁴⁵Ja cato quëapi, toyase'e cayere nuñerepa asa ti'ajajë caquë. ⁴⁶Jaje pa'ina, quëaquë jaohua'ire capi:

“Ñeje toyase'e pa'iji. Cristo ai yo'oquë juni huesëye pa'iji. Jaje ju'isiquëta'a toaso mu'seña pa'i maca cui'naëpi huëija'quë api. ⁴⁷Jaje pa'ina, Cristo mamire cajë quëaye pa'iji. Si'a hue'ña pa'icohua'ire Jerusalén paire quëa huëoye pa'iji. Huëosicohua'ipi ñeje cajë: Ja'në cuasase'e jëoni ponëjë'ë. Jaje yo'ojëna, mësarü co'aye yo'ose'ere saï de'huacaiye pa'ija'coa. ⁴⁸Jaje pa'ina, mësarü a'ë, yure iye ñasicohua'irepa. ⁴⁹Îna, yë'ëpi, ja'quë ca nëose'e jëjo daoja'quë a'ë, mësaruna. Jaje pa'ina, saima'pë ñö Jerusalén daripëre pa'ijë'ë, ma'tëmo jëjo dao tuture utejë'ë, mësarü suña ja'ñere.”

Ma'tëmona Sa Cuãñoñe

(Mr. 16.19-20)

⁵⁰Jesupi sai sapi, jai daripë Betaniare pana. Jarona jëña mëani Maija'quëre secacaji'i, jaohua'ire. ⁵¹De'oye pa'ijë'ë, cani jaohua'ire jëoni ma'tëmona sa cuãño. ⁵²Ja jeteyo'je Maija'quëre seni tëjini co'ihuë, Jerusalëna ai sihuajë. ⁵³Cui'ne si'anë Maija'quëre së hue'ere pa'ijë Maija'quëre de'oquë api cajë sihuajë paë'ë. De'oji. Ca tëjihüë.